

乾隆淮安府志

淮安府志卷之三十

藝文

御製詩

南巡晚經淮陰

康熙二十三年

淮水籠烟夜色橫  
棲鴉不定樹頭鳴  
紅燈十里帆檣滿  
風送前舟奏樂聲

賜總河靳輔

防河紆肝食六御  
出深宮緩轡求民隱  
臨流嘆俗窮何年  
樂稼稽此日是疏  
通已著勤勞意安  
瀾早奏功

再過淮南

康熙二十八年

嚮者巡省江左道出淮南軫念窮簷憫懷澤國今見居  
民景象較前稍豐良慰朕懷

前來歷茲境斯民似未遂今日再經過風土覺有異統  
褐旣充體廬舍各完置擁道歡趨迎扶老與携穉咸云  
獲休息近免徭役累水患日就平田疇可耕植一飲與  
一食莫不歌帝賜素念切民依時爲勞寤寐大造本無  
私濫恩欲廣被聞言聊自寬庶慰省方意

淮城曉霜聞雁

天際晨光水月連帶霜歸雁向前川  
孟城曉發寒仍在  
談笑春風雜紫烟

念淮揚居民特留漕糧二十萬以濟之回鑿之日復諄

諭所司使布實惠

康熙二十八年

廣廈豈不樂何事駕飛爐意惟悉民隱遑問歷道途淮揚皆巨郡地本號饒腴居人百萬家土狹濱衆湖禾麥苟不登老幼日待舖恩意宜涯沛拯濟留天儲實惠布州邑遠邇均有無諄諭嚴再三毋徒飽吏胥茅屋有起色比戶充黍稌願茲瘠壤農皞皞躋唐虞

泛洪澤湖偶詠

積水空明浸太虛輕舸間泛進徐徐菰蘆絕岸柴門小  
終歲生涯業捕魚

賜總河高斌

乾隆五年十月

禹功萬古仰平成疏濬隨時賴俊英  
淮浦建牙資保障黃流奏績久澄清  
息機早是無穿鑿順性猶然矢樸誠  
潘靳嘉猷編簡在千秋惟爾繼賢聲

歷朝詩上

晉

韓信贊

孫楚

淮陰屈節盤於幽賤秦失其鹿英雄交戰踐楚知亡  
撫戈從漢遂寤明主超然虎奮威震趙魏擒項平難  
劍據山川稱孤南面惜哉遊疑一朝書叛

齊

塞客吟 鎮淮陰特作

高帝

寶緯紊宗神經越序德晦河晉力宜江楚雲雷兆壯  
天山繇武直髮指秦關凝精越漢渚秋風起塞草衰  
鵬鴻思邊馬悲平原千里顧但見轉蓬飛星嚴海淨  
月澈河明清輝映暮素液凝庭金笳夜厲羽鞞晨征  
幹清潭而悵泗柵松洲而悼情蘭馭風而瀉豔菊籠  
泉而散英曲繞首燕之歎吹軫絕越之聲秋園琴之  
孤弄想庭藿之餘馨青關望斷白日西斜恬源覩霧  
壘首暉霞戒旋鶴躍還波情綿綿而方遠思裊裊而

送多粵擊秦中之筑因爲塞上之歌歌曰朝發兮江  
泉日夕兮陵山驚颯兮溇汨淮流兮滌浚胡埃兮雲  
聚楚旆兮星懸愁墟兮思宇惻愴兮何言定寰中之  
逸鑿審雕陵之迷泉悟樊籠之或累悵遐心以栖平  
北齊

濟黃河應教

蕭 愨

大藩連帝室驟駕奉皇猷未明驅羽騎凌晨方畫舟  
津城渡維錦岸柳夾緹油鐘聲颺別島旗影照蒼流  
早光生劒劍朝風起節樓滔滔細波動喬喬輕舫浮  
迴棹避近磧放舳下前洲全疑上天漢不異謁蓬邱

望知雲氣合，聽識水聲秋。  
從君何等樂，喜共神仙遊。  
隋

早渡淮

煬帝

平水既淼，曉露復霏霏。  
淮甸未分色，泱泱共晨暉。  
青霞轉孤嶼，錦帆出長圻。  
潮魚時躡浪，沙禽鳴欲飛。  
會待高秋晚，愁因逝水歸。

唐

和杜學士旅次淮口

李嶠

夕吹生淮浦，清淮上暝潮。  
迎風欲舉棹，觸浪反停橈。  
淼漫烟波闊，參差林岸遙。  
日沉丹氣歛，天蔽白雲消。



水雁銜蘆葉沙鷗隱荻苗客行殊未已行路已迢遙

初宿淮口

朱之問

孤舟汴河水去國情無已晚泊投楚鄉明月清淮裏  
汴河東瀉路窮茲洛陽西顧日增悲夜聞楚歌思欲  
斷况值淮南木落時

漂母岸

崔國輔

泗水入淮處南邊古岸存秦時有漂母於茲飯王孫  
王孫初未遇寄食何足論後爲楚王來誓欲報母恩  
事跡遺在此空傷千載魂茫茫水中渚止有一孤墩  
遙望不可到蒼蒼烟樹昏幾年崩塚色暮日落潮寒

古地多湮圯時哉不敢言  
向夕泪沾裳只宿蘆洲村

夜渡淮

閻邱曉

舟人自相報落日下芳潭  
夜火連河市春風滿客帆  
水窮滄海畔路盡小山南  
且喜鄉園近言榮意未甘

淮陰書懷寄王宗城

李白

沙墩至梁苑二十五長亭  
大舶夾雙鷁中流鷺鶴鳴  
雲天拂空碧川岳涵餘清  
飛鳥自西來適與佳典并  
眷言王喬鳥苑戀故人情  
復此親懿會而增交道榮  
沿洄且不定飄忽恨徂征  
暝投淮陰宿欣將漂母迎  
斗酒烹黃雞一餐感素誠  
予爲楚壯士不是魯諸生

有德必報之千金耻爲輕  
緬書羈孤意遠寄棹歌聲

寄淮南友人

紅顏悲舊國青歲歇芳洲  
不待金門詔空持寶劍遊  
海雲迷驛道江月隱鄉樓  
復作淮南客因逢桂樹留

漣上別王秀才

高適

飄飄驚遠道客思滿窮秋  
浩蕩對長漣君行殊未休  
崎嶇山海側想像無前儔  
何意照乘珠忽然欲暗投  
東路方蕭條楚歌復悲愁  
暮帆使人感去鳥兼離憂  
行矣當自愛壯年真悠悠  
予亦從此辭異鄉難久留  
附言豈終極慎勿滯滄洲

蓮上題樊氏水亭

蓮上非所趨，偶爲世務牽。  
經時駐歸棹，日夕對平川。  
莫論行子愁，且得主人賢。  
亭上酒初熟，厨中魚每鮮。  
自說宦遊來，因之居住偏。  
煮鹽滄海曲，種稻長淮邊。  
四時常晏如，百口無饑年。  
菱芋藩籬下，漁樵耳目前。  
異縣少朋從，我行復迤邐。  
向不逢此君，孤舟已言旋。  
明日又分首，風濤還渺然。

宿龍興寺

綦毋潛

香刹夜忘歸，松青古殿扉。  
燈明方丈室，珠繫比丘衣。  
白日傳心靜，青蓮喻法微。  
天花落不盡，處處鳥銜飛。

張檢討山陽志云潘曾守淮陰而郡城有古龍興寺相傳晉時所建潘宿此作也

漂母墓

劉長卿

昔賢懷一飯茲事已千秋古墓樵人識前朝楚水流  
渚蘋行客薦山木杜鵑愁芳草年年綠王孫舊此遊  
春宵燕萬年吉少府中孚南館 韋應物

始見斗柄迴復茲霜月霽河漢上縱橫春城夜迢遞  
賓筵接時彥樂宴凌芳歲稍愛清觴滿仰嘆高文麗  
欲去返郊扉端爲一歡滯

淮上卽事寄廣陵親故

前舟已渺渺欲渡誰相待秋山起暮鐘楚雨連滄海

風波離思滿宿昔容髮改獨鳥下東南廣陵何處在

淮上遇洛陽李主簿

結茅臨古渡臥見長淮流窓裏人將老門前樹已秋  
寒山獨過雁暮雨遠來舟日夕逢歸客那能忘舊遊

淮上喜遇梁州故人

江漢曾爲客相逢每醉還浮雲一別後流水十年間  
歡笑情如舊蕭疎鬢已斑何因不歸去淮上對秋山

寄淮上蔡母三

滿城憐傲吏終日賦新詩請報淮陰客春帆浪作期

按蔡母潛守淮陰本

傳無攷此詩可證

淮上秋夜

劉方平

旅夢何時盡，征途望每賒。  
晚秋淮水上新月，楚人家  
猿嘯空山近，鴻飛極浦斜。  
明朝南岸去，應折桂枝花。

晚春送吉校書歸楚州

中孚會  
爲道士

李嘉祐

詩人饒楚思，淮上及春歸。  
舊浦菱花待，閒門柳絮飛。  
高名鄉曲重，少事道流稀。  
定向漁家醉，殘陽臥釣磯。

登楚州城望驛路十餘里山邨竹林相次交映

十里山村道，千峰櫟樹林。  
霜濃竹枝亞，歲晚荻花深。  
草市多樵客，漁家足水禽。  
幽居雖可羨，無那子牟心。

送吉中孚歸楚州舊山

中孚自仙  
官入仕

盧綸

青袍芸閣郎談笑挹侯王舊籙藏雲穴新詩滿帝鄉  
名高閑不得到處人爭識誰知冰雪顏已雜風塵色  
此去復如何東臯岐路多藉茅臨紫陌回首憶滄波  
年來倦蕭索但說淮南樂竝檝湖中遊連棹月下泊  
沿溜入閭門千燈夜市喧喜逢隣舍伴遇語問鄉園  
下淮風自急樹杪分郊邑送客隨岸行離人出颿立  
漁村繞水曲澹浦隔晴烟欲就林中醉先期石上眠  
林昏天未曙但向雲邊去暗入無路山心知有花處  
登高日轉明下望見春城洞裏草空長塚邊人自耕  
寥寥行異境過盡千峰影露色凝古壇泉聲落葉井



仙成不可期多別自堪悲爲問桃源客何人見亂時

送吉中孚拜官歸楚州

李端

才子神骨清虛疎眉眼明貌應同衛玠鬢且異潘生  
初戴莓苔幘來過丞相宅滿堂歸道師衆口宗詩伯  
須臾里巷傳天子亦知賢出詔升高士馳聲在少年  
自爲才哲愛日與侯王會匡主一言中榮親千里外  
更聞仙士友往往東回首驅石不成羊指丹空斃狗  
孤帆淮上歸商估夜相依海霧寒將近天星曉欲稀  
潮頭來始歇浦口喧爭發鄉樹尙和雲鄰船猶帶月  
到洞必傷情巡房見舊名醮疎壇路澁汲少井瀾傾

別我長安道前期共須老方隨水向山肯惜花辭島  
悵望執君衣今朝風景好

送吉中孚拜官歸業

南入華陽洞無人古樹寒吟詩開舊帙帶綬上荒壇  
因病求歸易沾恩更隱難孟宗應獻鮓家近守漁官  
山中期吉中孚

行人路不同花落到山中水暗蒹葭霧月明楊柳風  
年華驚已擲志業颯然空何必龍鍾後方期事遠公  
宿淮浦憶司空文明

愁心一倍長離憂夜思千重戀舊遊秦地故人成遠

夢楚天涼雨在孤舟諸谿近海潮皆應獨樹邊淮葉  
盡流別恨轉深何處寫前程惟有一登樓

宿淮陰南樓酬常伯能

皇甫冉

淮陰日落上高樓喬木荒城古渡頭浦外野風吹入  
戶窓中海月早知秋滄波一望通千里畫角三聲起  
百憂佇立分宵絕來客煩君步履忽相求

洪澤館

見故禮部  
尚書題詩

底事洪澤壁空留黃卷詞年年淮水上行客不勝悲

晚次淮陰

張繼

微涼風葉下楚客轉清閑候館臨秋水郊扉掩暮山

月明湖漸滿露濕雁初還浮客了無定萍流淮海間

津亭有懷

耿 漳

津亭一望鄉淮海晚茫茫草沒栖洲鷺天連映浦檣  
往來通楚越旦暮易漁商悵望被書畢何人向洛陽

入泗口

李 紳

洪河一派清淮接蔓草蘆花萬里秋烟樹蒼茫分楚  
澤海雲明滅見揚州望深江漢連天遠思起鄉關滿  
眼愁惆悵路岐真此處夕陽西沒水東流

送元使君自楚移越

劉 商

露冕行春向若耶野人懷惠欲移家東風二月淮陰

郡惟見棠梨一樹花

歲杪將發楚州呈樂天

劉禹錫

楚澤雪初霽楚城春欲歸  
清淮變寒色遠樹含晴暉  
原野已多思風霜潛減威  
與君同旅雁北向刷毛衣

送李中丞之楚州

緹騎朱旗入楚城  
士林皆賀振家聲  
兒童但喜迎賓客  
故吏猶應記姓名  
萬頃水田連郭秀  
四時烟月映淮清  
憶君初得崑山玉  
同向揚州携手行

罷郡歸洛途次山陽留辭郭中丞使君

自到山陽不許辭  
高齋日夜有佳期  
管弦正合看書

院語笑方酬各詠詩銀漢雪晴褰翠幕清淮月影落  
金卮洛陽歸客明朝去容赴城東花發時

楚州開元寺北院枸杞臨井繁茂可觀羣賢賦

詩因以繼和

僧房藥樹依寒井井有香泉樹有靈翠黛葉生籠石  
發殷紅子熟照銅瓶枝繁本是仙人杖根老新成瑞  
犬形上品功能甘露味還知一勺可延齡

渡淮

白居易

淮水東南地無風渡亦難孤烟生乍直遠樹望多圓  
春浪棹聲急夕陽帆影殘清流宜映月今夜重吟看

枸杞井

山陽太守政嚴明吏靜民安無犬驚不知靈藥根成  
狗怪得時聞吠夜聲

楚州鹽壚古堦望海

長孫佐輔

混沌本冥冥泄爲洪川流雄哉大造化萬古橫中州  
我從西北來登高望蓬邱陰晴乍開合天地相沉浮  
長風卷繁雲日出扶桑頭水淨露鮫室烟消凝蜃樓  
時來會雲翔道蹇卽津遊明發促歸軫滄波非宿謀

宿淮陰水館

張祐

積水自成陰昏昏月映林五更離浦棹一夜隔淮砧

漂母鄉非遠，王孫道豈沉。不當無健姬，誰肯儼前心。

送淮陰縣令

周賀

隋隄楊柳烟，孤棹正悠然。蕭寺通淮戍，蕪城枕楚田。  
魚鹽橋上市，燈火雨中船。故老青葭岸，先知宓子賢。

韓信廟

殷堯藩

長空鳥盡將軍死，無復中原入馬蹄。身向九原還屬漢，功超諸將合封齊。荒涼古廟惟松柏，咫尺長陵又鹿麋。此日深憐蕭相國，竟無一語到金閨。

送淮陰丁明府

杜牧

之官未入境，已有愛人心。遣吏廻中路，停舟對遠林。



鳥聲淮浪靜，雨色稻苗深。暇日公門掩，惟應伴客吟。

淮陰阻風寄呈楚州韋中丞

垂釣京江欲白頭，江魚堪釣却西遊。劉伶臺下稻花  
晚，韓信廟前楓葉秋。淮月未明先倚檻，海雲初起更  
維舟。河橋有酒無人醉，獨上高城望庾樓。

夜泊淮陰

項斯

夜入楚家烟，烟中人未眠。望來淮岸盡，坐到酒樓前。  
燈影半臨水，箏聲多在船。乘流向東去，別此易經年。

夕次淮口

馬戴

天涯孤光盡，木末群鳥還。夜久遊子息，月明歧路間。

風生淮水上帆落楚雲間此意今誰見行行悲故關

將謁商州李郎中道出楚州獻韋中丞

方干

江流盤復直浮棹出家林商洛路猶遠山陽春已深  
青雲應可望白髮未相侵才小知難薦終勞許郭心

過陳琳墓

溫庭筠

曾於青史見遺文今日飄零過古墳詞客有靈應識  
我霸才無主始憐君石麟埋沒藏秋草銅雀荒涼對  
暮雲莫怪臨風倍惆悵欲將書劍學從軍

贈少年

江表月示 卷之三十一 三  
江海相逢客恨多，秋風葉下洞庭波。  
酒酣夜別淮陰市，月照高樓一曲歌。

淮上送人歸滄洲

李頻

風色忽西轉，坐爲千里分。  
高帆背楚落，寒日逆淮曛。  
斷燒綠喬木，盤鵬隱片雲。  
鄉關百戰地，歸去始休軍。

宿淮陰

陳羽

秋燈點點淮陰市，楚客聯檣宿淮水。  
夜深風起魚鼈腥，韓信祠堂明月裏。

淮浦漁者

鄭谷

白頭波上白頭翁，家逐船移淮浦風。  
一尺鯉魚新釣

得見孫吹火荻花中

途次淮口

吳融

寒流萬派碧南渡見烟光人向隋宮近山盤楚塞長  
有村皆綠暗無樹不紅芳已帶傷春病如何更異鄉

漂母塚

羅隱

寂寂荒墳一水濱蘆洲絕島自相親青娥已落淮邊  
月白骨甘爲泉下塵原上荻花飄素髮道旁菘葉碎  
羅巾雖然寂寞千秋魄猶是韓侯舊主人

宋

渡淮

范仲淹

好在長淮水十年三往來功名真已矣歸計亦悠哉  
今日風憐客平時浪作堆晚來洪澤口桿索響如雷

淮上遇風

唐 介

聖宋非狂楚清流異汨羅平生仗忠信今日任風波  
舟楫顛危甚魚龍出沒多斜陽幸無事沽酒聽漁歌

淮上雜詩三首

梅堯臣

宿雲未全歛微雨入船疎問伴失前後暝行隨疾徐  
相親沙上雁自樂水中魚亭午日光透遠分林際居

其二

輕舟晚投處聒聒渚禽嘶橡子隨薪束蔬科帶土携

岸幽雲滿石潮落蚌生泥客思無慘極惟將魯酒迷

其三

野雁不知數翳然川上鳴曾無設羅意空自見船驚  
渺渺拍波去紛紛孤嶼盈苦寒非塞外霜落夜淮清

淮陰侯廟

漢家天下將廟古像公主百戰自亡楚一時空王齊  
鄉人奏簫鼓舟子賽豚雞不改寒潮水朝平暮復低

淮甸南遊

林逋

幾許搖鞭興淮天晚景中樹林兼雨黑草實着霜紅  
膽氣誰憐俠衣裝自笑戎寒威敢相掉獵獵酒旗風

淮甸城居寄任刺史

擾擾非吾事，深居斷俗情。  
石莎無兩瘦，秋竹共蟬清。  
劍在慵閑拂，詩難憶細評。  
寥然獨搢枕，淮月上山城。

發洪澤中途遇大風復還

蘇軾

風浪忽如此，吾行欲安歸。  
挂帆却西邁，此計未爲非。  
洪澤三十里，安流去如飛。  
居民見我還，勞問亦依依。  
携酒就船賣，此意厚莫違。  
醒來夜已半，岸木聲向微。  
明日淮陰市，白魚能許肥。  
我行無南北，適意乃所祈。  
何勞弄澎湃，終夜搖窓扉。  
妻孥莫憂色，更典篋中衣。

次韻徐仲車

惡衣惡食詩愈好，合似霜松嚼春鳥。  
蒼蠅莫亂遠雞聲，世人誰如公覺早。  
八年看我走三州，月自當空水自流。  
人間擾擾真螻蟻，應笑人呼作鬪牛。

送表弟程六知楚州

炯炯明珠照雙璧，當年三老蘇程石里人。  
下道避鳩杖，刺史迎門倒皂烏。  
我時與子皆兒童，狂走從人覓梨栗。  
健如黃犢不可恃，隙過白駒那暇惜。  
醴泉寺古垂橘柚，石頭山高暗松櫟。  
諸孫相逢萬里外，一笑未解千憂積。  
子方得郡古山陽，老手風生謝刀筆。  
我正含毫紫微閣，病眼昏花困書檄。  
莫教印綬繫餘年，去



掃墳墓當有日功成頭白早歸來共藉梨花作寒食

十月十六日記所見

風高月暗雲水黃淮陰夜發朝山陽山陽曉露如細  
雨炯炯初日寒無光雲收霧捲已亭午有風北來寒  
欲僵忽驚飛雹穿戶爛迅駛不復容遮防市人顛沛  
百賈亂疾雷一聲如頽墻使君來呼晚置酒坐定已  
復日照廊恍疑所見皆夢寐百種變怪旋消亡共言  
蛟龍厭舊穴魚鼈隨徙空陂塘愚儒無知守章句論  
說黑白推何祥惟有主人言可用天寒欲雪飲此觴

正月一日雪中過淮謁客回作

十里清淮上長堤轉雪龍水崖落屐齒風葉亂裘茸  
萬頃穿銀海千尋度玉峰從來修月斧合在廣寒宮

淮上曉發

淮月傾雲曉角哀小風吹面碧鱗開此生合向江湖  
老默數淮中十往來

韓信

黃庭堅

韓信高才跨一世劉項興亡翻手耳終然不肯負沛  
公頗似雍容得天意成臯日夜望救兵取齊自重身  
已輕躡足封王能早悟豈惜淮陰十千戶雖知天下  
有所歸獨憐身與噲等伍蒯通狂說不可據陳豨孺

子胡能爲予嘗貰酒淮陰市韓信廟前柏十圍千年  
事與浮雲去想見蕭侯決是非丈夫出身佐明主用  
舍行藏要自知功名邂逅軒天地萬事常觀失意時  
韓信沉鷲非悍勇笑出胯下良自重滕公不斬世未  
知蕭相自追王始用成安書生自聖賢左仁右義兵  
在咽萬人背水亦書意獨驅市井收萬全功成廣武  
坐東鄉人言將軍真漢將兔死狗烹姑置之此事已  
足千年垂君不見丞相商君用秦國平生趙良頭雪  
白

徐仲車食於學官吏或以爲不可欲罷去之太

守不聽遇如初感之而作

秦觀

許丞老病聲督郵白欲廢賢哉黃次公鑒裁實精詣  
殷勤謝督郵此丞乃廉吏重聽庸何傷善助無失意  
古人骨已朽來者復誰繼仲車天下士固非許丞類  
至行通神明問學有根柢若充老更聘自革風俗弊  
太守前已聞粟帛俄見賜奈何少年子輒效督郵事  
道喪賢哲窮聞之爲流涕人心如其面難以一律廢  
所望在次公督郵何足議

寄張文潛右史

解手亭臯幾幾月春風已復動林塘稍遷右史君何

黍初闕除書國爲狂日出想驚儒發塚風行應罷女  
爭桑東坡手植千年柳聞說邦人比名棠

書徐仲車先生詩編後

鄒

浩

字道卿

古人往矣名空存邇來冠帶誰其倫語言淵濶行跡  
躋俯仰不愧何繽紛先生道義完且潔去彼取此非  
今人事親豈但綵衣戲刻木定省長悲辛拋官却掃  
醉經史胸中無復留纖塵履穿袍敝突不墨辭幣與  
粟甘清貧自從秀髮到白首造次於是如一晨當知  
有昊憫澆散先生故出援斯民嗟予稟賦雖不敏管  
窺偶幸知所因講聞先生亦已久云爲輒以書諸紳

揭來廣陵兩閱歲所得比舊尤加親此篇雅什盈數  
百覃思成誦驚余神恍如聽樂周太廟黃鍾大呂噉  
且純又如典瑞出圭璧璀璨溢目非玦珉偉哉固足  
信萬一髣髴想見容彬彬吾皇圖治急遺逸空谷相  
望推蒲輪先生高臥焉得遂細札匪日頌嚴闈重慚  
疆鎖脫無計灑掃猶阻致此身願言師法不少懈異  
日有立逃涇淪

長淮謠爲徐先生詠

馬存

字子才  
鄆陽人

長淮之水綠如苔行人但覺心眼開湘江豈無水魚  
腹忠魂埋但見愁雲結雨猿聲哀浙江豈無水鷗草

胥漂骸但見潮頭怒氣如山來孤臣詞客到江上何  
以寬心懷長淮之水送楚流先生家住湖上頭黃金  
萬斛浴明月碧玉一片含清秋酒花入面歌一聲淮  
上百物無閑愁

垂虹亭楚州作

米芾

斷雲一葉洞庭帆玉破鱸魚霜破柑好作新詩寄桑  
亭垂虹秋色滿東南

淮上喜雪

趙抃

落雪紛紛甚羽毛相逢淮上繫輕舸壓低酒力威稜  
健助謠詩懷氣象豪兩岸遠山供玉嶂一天長水盡

雲濤蹄歎喜見豐年瑞南顧無煩帝力勞

發淮陰追寄道史諸公

汪藻

曠曠木末暎朝霞  
沄沄水底翻樓鴉  
孤帆夕映楚山遠  
我行正以船爲家  
去年長安雪盈尺  
弄晴楊柳先春芽  
今年淮陰雨如霧  
黃蘆凍笋穿烟沙  
東風不作分別態  
客從天上來  
天涯尊前所恨故人澗  
一杯且屬江梅花  
月明何似故人好  
遠隨驛使朝京華  
余方零亂淮壅月  
夜寒疎影空橫斜

淮上春日

戴復古

邊寒客衣薄  
漸喜暖風回  
社後未聞燕  
春深方見梅



壯懷頻撫劍孤憤強銜杯北望山河語天時不再來

淮村兵後

小桃無主自開花烟草茫茫帶曉鴉幾處敗垣圍故  
井嚮來一一是人家的

寄趙楚州

趙師秀

承明雖妙古云勞小借臨邊却自豪韓信所封兵尙  
勁劉伶曾住酒應高牽來寶馬通言語放去雕弓落  
羽毛別有異時人憶處萬株楊柳綠春壕

長淮晚眺

王清叔

目斷長淮渺漭中孤城突兀倚層空寒砧幾處遞秋

信漁笛一聲生晚風龍吐青雲嵐氣白鴉翻落日水  
天紅扁舟今夜宿何處赤壁斷磯蘆葦叢

過淮陰縣題韓信廟

楊萬里

鴻溝祗道萬夫雄雲夢何消武士功九死不分天下  
鼎一生還負室前鐘古來大斃愁無蓋此後禽空悔  
作弓兵火荒餘非舊廟三間破屋兩株松

望楚州新城

按此時已有新城之  
號當不始於明初也

已近山陽日漸昏湖光百里望千村人家四向皆臨  
水柳樹雙垂便是門全盛向來皆孔道雜耕今是一  
雄藩金湯再葺真良策此外猶須仔細論

淮安州

王清叔

平野圍淮甸雙城入楚州  
喉襟關重地鼓角動邊樓  
聞雁思鄉信歌魚撫蒯緱  
此行安所遇江海任浮鷗

張檢討山陽志云雙城卽  
今之新城舊城在宋已然

發淮安

文天祥

九月初二日車馬發淮安  
行行重行行天地何不寬  
烟火無一家荒草青漫漫  
恍如泛滄海身坐玻璃盤  
時時逢北人什伍扶征鞍  
云我江南客當軍身屬官  
北人適吳楚所憂地少寒  
江南有遊子風雪止燕山

小清口

乍見鶯征婦相逢遇楚兵北來鴻雁密南去駱駝輕  
芳草中原路斜陽故國情明朝五十里錯做五陵行

桃源道中

漠漠地千里垂垂天四圍隔溪輕騎過傍草野雞飛  
風露吹青笠塵沙薄素衣吾家白雲下都伴北人歸

崔鎮驛

萬里中原役北風天正涼黃沙漫道路蒼耳滿衣裳  
野澗人聲小日斜駒影長解鞍身似夢遊子意茫茫

陸樞密秀夫

有序  
集杜

樞密字君實文筆英妙自維揚幕入朝京師陷永

嘉推戴有力及駐厓山兼宰相凡朝廷事皆秀夫  
潤色綱紀之厓山陷與全家赴水死

文彩珊瑚鈎奉同郭給事靈欣作淑氣舍公鼎張九齡炯炯一心

在嚴武天水相與永漢陂西南臺

陸君實挽詩

方回字萬里河南人

亘古無斯事於今有若人龍綯同把手鮫室共沉身  
蹈海言能踐憂天志不伸曾微一杯土魚腹葬君臣

前題

鄭疇字叔範彭城人

蒼姬嗟訖錄漢火可能炎自古誰無死存孤志未厭  
力殫精衛石身殉鼎龍髯萬里烟濤濶忠魂貫海蟾

前題

俞德鄰

字宗大  
永嘉人

杞國天將壓蒼梧雲正愁龍胡垂可挽魚腹墓何憂  
萬死丹心在千齡正氣收元知精衛憤今古不能休

前題

七朝迷霧瘴一日倒狂瀾天意竟料皇圖不再安  
寧甘蹈東海不肯繫南冠自古誰無死從容就義難  
金

韓淮陰信感遇

李汾

仗劍淮陰去復還舉頭西望識龍顏堂堂竟握真王  
印未害男兒辱胯間

元

清河道中

趙子昂

揚於清河流開篷素秋曉爛斑被厓花委蛇順流藻  
天清去雁高野濶行人小故國歸有期客愁淨如掃

阻風崔鎮有感

薩都刺

逆風吹河河倒行阻風時節近清明南人北人俱上  
塚桃花杏花開滿城雖云年少慣作客便覺此日難  
爲情河魚邨酒亦足醉賴有同船好弟兄

過淮安暢曾伯都事幽居二首

萬事歸來好淮陰二畝園教兒書滿架遇客酒盈樽

野水到門外漁船繫樹根除書下香漢坐席恐難溫

前題

幽居有真趣何必在山邨楚竹深藏屋淮河直到門  
釣絲魚浪細書帙燕泥昏吟笑坐終日佳期誰與言

次崔鎮壁間韻

木落歲時晏黃雲欲雪天買舟河下客立馬渡頭船  
野迴風欺慢天寒袖裏鞭夜眠三鼓後花發五更前

黃河謠

陳孚

長淮綠如苔飛下桐柏山黃河忽西來亂瀉長淮間  
馮夷鼓狂浪崢嶸雪崖墮驚起無支祈腥涎沃鐵鑊



兩雄聞不死大聲吼乾坤震撼山岳骨摩盪日月魂  
黃河無停時淮流亦不息東風吹海波萬里湧秋色  
秋色不可掃青烟映蘆花白鳥亦四五長鳴下汀沙  
黃靈奠四瀆各剖盤古髓千載今合流神理胡乃爾  
漁翁一鬢霜扁舟依古樹隔浦欲叩之翩然凌波去

淮安州

孤帆下江北千里西風輕泊舟公路浦始見南昌亭  
青天下白露亂葉淒其聲汀洲結海色冉冉孤月生  
殘鴉感興廢斷腸悲飄零安得携美酒臺上呼劉伶  
百年一箕踞六合皆螟蛉

長淮有感

一笛山陽上東風  
蜃氣腥烟迷隋帝  
柳潮湧楚王萍  
曠市堆淮白秋郊  
獵海青古今愁不  
盡落日蓼花汀  
淮陰侯廟

漢家羅網正高張  
誰有助名紀太常  
戲爾築壇呼大將  
危乎操印立真王  
烟中草木疑殘幟  
沙上風濤憶故囊  
鐘室千年君莫怨  
未央宮殿已斜陽

淮安道中

何中

鐘聲起前林悠悠  
河南客天垂大野  
高月淡行路白  
雞犬淮上邨雲霞  
海邊色舊時寒垣  
地來往人馳驛

楚州夜泊

俞俊

漏鼓聲頻欲四更野航燈火對愁明城頭楚語驚鄉  
夢船尾吳歌動客情漠漠水雲隨雁度瀟瀟風雨自  
雞鳴離情遠道何嗟及未必江湖老此生

明

至淮安城南十五里述懷

陳基

欲向江湖覓釣磯此心常與世相違添丁未辦盧仝  
計算老空知伯玉非淮甸草肥宛馬地楚州人着漢  
官衣將軍奏罷平西捷還許山翁倒載歸

淮陰雜興

千里相逢淮海濱一枝誰寄嶺梅春  
老來易感山陽笛年少休輕胯  
下人失侶雁如秦逐客畏寒花似楚  
遺民每過百戰瘡夷地立馬西風爲損神

落木蕭蕭雁渡河西風嫋嫋水層波  
甘羅營裏秋聲急韓信城頭月色多  
淮市有魚聊可食楚山無桂木須歌  
古今無限關心事付與當年春夢婆

淮安道中

袁凱

花明野館靜樹暗流鶯語行雲千里來  
凌亂傷心緒傷心復何事家在江南渚  
日暮莫回頭脉脉江南雨

淮陰侯祠

楊基

朝登韓信城暮謁淮陰祠荒祠屋瓦落古木聲差差  
當時握漢兵劉項相交持舉足有輕重不負高帝知  
區區假王封何足遠見疑全齊七十城實爲陷阱機  
盧縮且稱王恥與絳灌隨居恒猶快快握手逢陳豨  
事起倉卒間不意咸誅夸呂后固不仁鄴侯亦忍爲  
先王重報功無乃此道虧至今淮水南落日啼鳥悲  
津頭有漂母一飯竟哀誰

發淮安

舟行日已晡帆影動檣烏河伯拋錢祭風神酌酒呼  
紅憐瓜似蜜白愛芡如珠且就篙師醉何妨問遠途

淮安新城候船

城郭遙遙曲遶河  
塵沙滿眼北風多  
行人淚落山陽笛  
逐客魂銷郢水歌  
江總歸東嗟老矣  
淮陰在楚奈貧何  
明朝又鼓征西棹  
帆影翩翩逐逝波

清口

張羽

豁達兩河口前與黃河通  
高岸忽斗折清淮匯其中  
甘羅城在南韓信城在東  
一爲秦人英一爲漢家雄  
人生有不死所貴在立功  
方其未遇時鹿鹿何異同  
時命非際會丈夫有固窮  
舍舟登高防歲暮百草空  
坡陀隴畝間一二老弱翁  
遺踪不可問但見荒榛叢

行行重回首目斷雙飛鴻

聞淮郡有警

劉崧

古剎蕭條隱石根荒城高下帶沙墩斷雲南雁日初  
出曠野北風天正昏羽檄屢傳淮甸警龍艘猶滯海  
門屯湖山不盡登臨興回首鄉園獨慘魂

夜泊淮陰

林鴻

泊舟淮水次津樹暗蕭蕭遠火明漁舫長吟倚客簫  
夜鐘聞古寺寒月照歸潮莫近啼猿處愁多夢更遙

淮陰驛

陳璉

晚泊淮陰驛灩灩白露零連城聞夜柝隔岸見秋星

月落林光黑風來水氣腥  
追思舊遊地當日有三亭

桃源

薄暮至桃源西山景漸昏  
鷺依沙嘴靜人語波頭喧  
日影初沉海樵歌稍出邨  
客中無限興此際向誰論

淮河與鄒緝仲熙登岸閑步

胡儼

旭日麗淮甸清風蕩朝霧  
青陽布春和藹藹見嘉樹  
捨舟陟平坂杖策縱閑步  
人烟散遠墟麥苗被廣路  
噉噉度雲雁交集桑扈崇  
岡斷復連野徑涉還住  
鷺禽忽雙飛村叟時一  
遇提壺與挈榼往來樂生聚  
偶茲登眺間觸景得佳趣  
迤邐續微吟逍遙釋煩慮



物色既可娛佳辰幸遊豫僕夫戒前征揚帆不可住

清口驛

夜渡清河驛寥寥犬吠幽人家散墟落舟楫倚汀洲  
薄霧浮空起長河帶月流悲歌何處發不覺動離愁

晚泊洪澤

雨後淮山數點青便從雲氣望蓬瀛湖平兩岸風初  
定人倚孤舟天正明客裏尋常勞遠夢天涯次第數  
歸程夜涼酒醒聞征雁一寸鄉心白髮生

淮安舟中

尾聯  
時作

曾 棨

遠戍鷄聲曉遙隄柳色濃斷雲京口樹殘月廣陵鐘

蕭鼓官船發圖書御寶封朝臣多扈從冠劍日相逢

淮安別回御史

王英

遠別悠悠鄉夢頻逢君况是異鄉春可憐河畔青青柳又折長條別故人

鹽城觀海

高穀

瓢城東泛水漫漫暇日登臨眼界寬萬馬挾兵開地脉六鰲擎日上雲端濤聲吹雨滄溟濕霧氣橫空白晝寒塵世不須傷往事桑田更變幾回看

淮陰祠弔古

涂相

朝發廣陵城暮至淮陰道春橈艤芳渚萋其王孫草

慨然思韓侯於焉薦蘋藻英雄困草莽惡少故相恤  
按劍不一施千金還自保行營萬家墓猛志寧在小  
聊投城下釣六合期電掃時來築高壇橫空馳騖襄  
談笑七十城一呼全齊倒四面雞鳴歌垓下收旗纛  
還報隆準公腰佩黃金寶颯爽瞻英姿淮波濺清昊  
衝冠一長嘆振風舒鬱抱

送林思承二守之任淮安

柯潛

昔爲冀州守今作淮陰佐朝回騎馬出都門滿地落花  
新雨過綠柳高館張錦筵看山酌酒薰風前醉時  
一笑各分散明日相思隔暮烟君行不畏觸炎暑應

念饑民久延佇

淮陰阻風

楊守陳

杪春渡淮陰寒威尙云厲日月朔風嚴雲霾黯無際  
長川沸波濤畫舫行復繫拚關避驚沙高眠不成寐  
耿耿余隱憂非緣客程滯畿甸苦繁徭閭閻日憔悴  
年登庶可生歲歉將焉濟邇者天恒暘況此時令異  
粼粼悉已槁黍稷何當藝俛仰獨徬徨一飯三嘆喟  
焉得谷風和一灑甘雨霑

淮陰嘆

李東陽

營門晝開齊犬吠蒯生相人先相背古來烏盡良弓

蔽近時勿頸陳與張功成四海身無地歸楚楚疑歸  
漢忌極知猶豫成禍胎時乎時乎不再來君王恩深  
辨士走淮陰胷中血一斗婦人手執生殺機赤族不  
待君王歸君王歸神爲惻獨不念秋毫皆信力舍人  
一族彭王殂淮陰之辭真有無噫吁噫淮陰之辭真  
有無

夜舟 淮安作

王守仁

隨地看山一葉舟夜深霜月亦兼愁翠華此際遊何  
地畫角中宵起戍樓甲馬尙屯淮海北旌旗未散楚  
江頭洪濤滾滾乘風勢容易開帆不易收

渡淮

何景明

津口風翻旆春陰鬱未開淮流衝古岸沙店倚長臺  
鳥向平蕪下人隨返照回未忘舟楫興臨路獨遲廻

韓信城

韓信荒城雉堞隳當時功業已成非假王本爲安齊  
計躡足翻成赤族機草昧尙知尊漢主太平焉肯助  
陳豨至今淮水潺湲處猶帶哀聲送落暉

初見淮水

淮安知府薛 鏊

崑崙欲倒星海微黃龍走出人間飛奔馳坐使禹無  
力竟入東海挽不歸偶上仙槎入淮浦欲見清流自

古今月示 卷之三十一 三  
千古但令河伯知我心莫把泥沙溷茲土

節孝書院

曙色蒼蒼晚近簷儀容隱隱坐垂簾過庭草色螢光  
避落檻松聲鶴語兼安定舊傳心法在政和新印口  
碑占水香璜泮芹花碧猶有春風到里閭

西湖烟艇

海翁橫楫泛湖湖裏烟濃午未消楊柳渡迷人語  
暗杏花邨暝酒旗遙漫牽漁網歸前浦忽載菱歌出  
小橋偶上高樓瞻海曙楚州風物正蕭蕭

趙殿宅

春江密雨織輕羅  
垂柳陰陰覆短蓑  
不見枚舉舊階  
宅水寒風細篴聲多

淮陰瑞雪

山陽學  
教諭 陳艮山 莆田人

小窓夢覺青綾冷  
剡藤光照玲瓏影  
開門一白三尺  
深砌路鋪珪千萬  
井天上何人吹落  
梅笛聲轟裂瓊  
瑤臺老龍驚起  
明珠落湖山點綴  
無纖埃君不見去  
年憂旱使君禱應  
日甘霖澤枯槁  
今年冬旱使君憂  
一禱神祇爲點頭  
紛紛六出三朝夕  
薦瑞銷氛壓螟  
蝻騰敷錫三農大有  
年普濟斯民仁壽域  
古來循良能  
格天祇今一德天心  
懸他時留書太史編  
此日歌謠



萬戶傳

泊淮上

金鑾

愁輕遊冶興老重別離情野戍寒更盡河橋春水生  
斷雲疎雁影殘月亂雞聲明發應千里蕭蕭過楚城

漂母廟

古渡臨祠廟長淮接市門旌旗搖白日風雨鎖黃昏  
貧賤求知已榮華少故恩潮邊逢牧豎猶自說王孫

淮上泊舟

唐順之

楓林望盡見蒼山桐柏飛流入楚關潮散海門孤島  
出月明渡口數帆還祇驚客夢青門遠長羨滄波白

鳥開聞道淮南多桂樹朝來策杖一相攀

過淮陰廟

蔡汝楠

王孫舊遊處祠廟樹蒼蒼尙訝殲名將終疑乞假王  
世方逢戰罷人豈惜弓藏唯是歌風日空傷猛士亡

同張羽王司理沈嘉則孫兆孺魏季朗三文學

飲韓侯祠

淮安知府陳文燭

荒城古祠暮相投霜清滿地寒飈飈遺碑剔蘚讀復  
周酒酣起舞歌悠悠如侯心事明千秋蒯生之言良  
足羞饑時一飯尙欲酌况乃大將成炎劉弓藏鳥盡  
何所尤鐘室寧甘兒女謀猛士一去四方憂大風之

歌思故侯于今土宇誰鴻溝于今母冢高做頭眼前  
若有漢家邱淮水亦應西北流

淮陰侯廟

歸有光

吾如淮陰祠清槐蔭朱戶當時長樂宮千載有餘怒  
五年戰虎龍結束在內俎努力赴功名功成良自苦

淮上作

長淮餞落日圓光正如赭傾紅注流波殊景不可寫  
淮水自西流黃河從北下併合向東行終日無停瀉  
哀此千里客春至復已夏獨立空惆悵所與晤言寡

漂母祠

金大車

王孫去不返淮水亦東流宿草封遺塚行人說故侯  
荒祠黃葉暗寒渚白蘋秋一飯猶懷德空悲雲夢遊

淮陰侯祠

王世貞

咸陽傾城塋祖龍嬖嬙掩泣千花紅十二金人銷不  
盡揭竿斬木飄于風是時韓生業釣者其志固已無  
山東轅門執戟重瞳子巴蜀登壇隆準公白帝雄圖  
久成滅烏江獨馬非爲功歸來故鄉高築宮黃金如  
山一日空齊趙諸侯在指掌俛仰宇內無英雄三奪  
軍權再被縛束手不待如發蒙迺知天授豈人力代  
相之約何匆匆當時幸不烹蒯通嗚呼餘子焉足數

往往鐵券埋膏斧驪山刑容布乎王長安徽侯噲等  
伍徵時猶營萬家墓貴日翻慳一坏土尙令黃河羞  
漢帶日夜崩濤奪鉦鼓乍可吾徒設瓣香莫令兒童  
陳姓酷荒堦突兀見老檜乾坤熒熒日漸吐五陵王  
氣橫亘天亦復寂寞成今古

薄暮發古城卽所見志懷

一水天末明餘霞亂相射錯落披金膏噴流蕭瑟瑟  
長嘯招天風爲我馭海席吳越指掌間黃花正秋色

送趙戶部出守淮陽

李攀龍

仙郎起草漢明光幾載軍儲事朔方五馬新爲淮海

郡三臺舊署度支章  
行車麥秀隨春雨  
臥閣花深對夕陽  
時憶上林詞賦客  
鴻書遙下楚雲長

張檢討山陽志云趙大綱以嘉靖二十八年由戶部郎爲淮安太守詩題稱淮陽誤

淮陰祠二首

張如蘭

劍鏑模糊洗血痕  
頽垣如見舊精魂  
誰知寥廓無雙士  
猶自徘徊一飯恩  
咳唾山河歸赤帝  
解推衣食悞王孫  
吁嗟此意空千古  
淮水淒涼白日昏

天心草草困英雄  
把釣應難比夢熊  
宰肉有謀偏躡足  
分羹何忍况藏弓  
謀臣無計留高鳥  
猛士空勞詠大風  
蒯徹佯狂樂布少  
何人哭向未央宮

入鹽城漫述

楊瑞雲

何勒竹馬候閏閏酌國慚余計益疎入望波濤俱禹  
貢到來黎庶是周餘流鶯樹樹歡迎雨布穀村村趨  
荷鋤遭際太平無寸補對君能得不沾裾

鹽漬感事

鹽漬還堪問蕭蕭風葦間繞城惟見水臨海故無山  
村落遺空室征求日叩關署中尊酒綠那得破愁顏

夜泊桃源

陶望齡

迢遞憐行役其如客思何孤雲將短檝十月渡黃河  
水泊兼鷗宿霜清聽雁過更堪寒夜盡欹枕遠鐘多

淮陰侯祠

袁去道

秋郊兔盡韓盧窘三尺青蛇捲鋒穎到手山河擲與  
人却向雌雞納腰領英雄恹足歸羅網辨士舌端空  
來往本將衣食畜王孫未許肝腸敵亭長一局殘棋  
了項秦五湖西子白綸巾貪他一顆真王印賣却淮  
陰胯下人

白洋河

鄒緝

白洋河下春水碧白洋河中多估客東風二月柳條  
新却念行人千里隔岸上居人纔數家茅茨深處見  
桃花少婦河邊汲新水老翁門外看雛鴉桑田禾青



麥苗綠牛羊散落邨墟牧行客年年任往來居人自  
在洋河曲

韓侯祠

周京

未央悽斷草痕荒一劍橫飛六月霜呂雉計先鋤壯  
士漢廷誰復悟高皇悲歌不盡淮流碧英氣常存楚  
樹蒼古廟有人崇伏臘松杉清泛白蘋香

隰西草堂

萬壽祺

字年少  
徐州人

淮浦西邊開草堂荻柴槿樹列爲墻意中笠澤千頭  
橘夢裏成都八百桑唐室京華淹北斗楚人歌舞思  
東皇優游卒歲聊稱隱處處蒹葭水一方

清江浦

千里清淮一綫縈  
濁河鼓浪未能清  
誅求北地無商舶  
疏鑿南漕因水衡  
數遣黃門勞白帟  
誰從鴻雁問蒼生  
往來盡屬悠悠者  
牽纜長隄自在行

天阿閣書懷

獨憐淮水上風雨  
日愁余天地今如此  
江湖未易居故人  
春雁濶世事夜燈疎  
禁足雙林寺年來懶  
報書

晚泊

倪之煌

字天章

天清澤國蓼花紅  
欲渡南湖浪正雄  
野老賣魚依晚市  
遊人沽酒對秋風  
維舟兩岸蒹葭外  
落日千家烟

火中坐聽水聲心自遠暮城鼓角到孤篷

抵舍張虞山過草堂風雨留宿夜話

三徑無塵徧蘇痕草堂風雨易黃昏隔江感舊懷瑤  
瑟入夜論詩對綠樽花落香殘蝴蝶夢春歸血老杜  
鵑魂天涯久客疎知己我正思君君叩門

聽楊太常彈琴詩

王猷定  
字于一  
南昌人

七十僧行脚居然老太常自稱楊業後醉臥幾沙場  
百戰防山海三餐侍帝王聞聲不敢讚天語過師襄

前題

誰令韓王地蕭蕭易水風一聲作變徵雙淚到深宮

眼看黃河北心隨大海東  
叩關無片語冥寄在絲桐

前題

佩解何時印音傳舊鼓  
擊孤城懸落日萬里見巴西  
觸手川雲亂回頭楚水低  
鸞叢休入奏萋草更萋萋

八月八日同天章飲虞山張子齋中歸經一草

亭夜談

杜濬

字于皇  
黃岡人

步出蓬蒿徑還過一草亭  
僧扉知不遠客屐恰須停  
夜雨傳杯靜秋燈說鬼青  
征鴻太嘹唳幸得醉中聽

題萬年少隰西草堂

閻爾梅

字古古  
滄縣人

素壁承兼瓦朱欄紐石藤  
求羊三徑客詩酒六朝僧

澤濁難窺岸山遙不辨層旅堂春綠晚餅食看魚蟹

清河夜泊

劉文焰

字雪舫  
宛平人

孤舟離緒又清明一挂蒲帆千里程去住向誰商出  
處飄零到我負生平雲連海氣天無色風鼓河流夜  
有聲襍被春寒眠不穩悽然雙淚落三更

清江浦

顧炎武

字寧人  
崑山人

此地接邳徐平江故蹟餘開天成祖代轉漕北京初  
牖下三春盡湖存數尺緒淮安城西有五牖每歲糧  
船以春月北上夏初開牖  
以防黃水灌入裏河俟秋水退九月開牖回舳廬道  
空牖內所儲皆高郵寶應諸湖南來之水  
國命倉廩峙軍儲陵谷天行變山川物態疎黃流侵

內地清口失新渠米麥江淮貴金錢帑藏虛蒼生稀  
土著赤地少耨鋤廟食思封券河防重墾書路旁看  
父老指點問舟車

寄張文學弔時淮上有築堤之役

冬來寒更劇淮堰比何如遙憶張平子孤燈正勘書  
江山雙鬢老文字六朝餘愁絕無同調蓬飄久索居

國朝

淮陰舟中憶龔聖予遺事書贈張伯玉

吳偉業

號梅村  
太倉人

幕府遺民盡古邱長淮南北恨悠悠龍媒畫得神應

取魚腹詩成鬼亦愁青史高文留劫火綠林微贊寄  
陽秋對君桑海繙餘錄老淚平添楚水流

清江關

岸東穿流急帆遲幾日程石高三板浸鼓急萬夫爭  
善事監河吏愁逢橫海兵

時有事兩粵兵過海上

我非名利客

歲晚肅宵征

過淮陰有感

落木淮南雁影高孤城幾日亂蓬蒿天邊故國愁聞  
笛市上兒童笑帶刀世事真成反招隱吾徒何處續  
離騷昔人一飯猶思報廿載恩深感二毛

舟至淮陰與家弟孝積小飲

龔鼎孳

字芝

殘星明曉閣語笑卜更闌  
蒿酒輸淮苦梅花近北寒  
沙馳門外路水鱸客中盤  
蕭瑟憐兄嫂長歌行路難

舞陽歌輓潘若稚大夫

徐振芳

字大

江湖起立嵩華走日潛月匿魍魎  
吼地坼天崩奈若何澆以英雄血  
數斗潘大夫偉男子來自星辰降  
淮水自負龍逢捧日心天與常山  
罵賊齒三尺青萍七尺身敢爲舞  
陽守孤壘舞陽之人人而豕不爲  
官使爲賊使令長初來民未親縛  
以迎賊賊色喜賊欲勿殺公逾怒  
數以大義詈不已豈有降賊潘若  
稚生不



徒生死不死有頸自足當汝刀有胸自足當汝矢剖  
取赤心還九廟白骨長留撐地紀誰知腸腎是風霆  
化作青虹照青史大夫死忠子死孝信有人間好喬  
梓黃河之水流湯湯前有睢陽後舞陽父老傳其事  
聞者共嗟傷尸祝陳歌舞俎豆有輝光忠魂義魄塞  
天地天地有盡神洋洋此崇禎癸未九月事也邗方  
上其事贈僉憲故稱大夫名  
宦鄉賢  
兩事之

天妃鬧歌

施閏章字愚

黃河怒流動地軸十舟九舟愁翻覆  
磯作閘爲道舟水急還憂石相觸  
挽舟沂浪似升天子夫力盡舟

不前巫師跳叫作神語舟人膽落輸金錢梨園唱盡  
迎神曲猶殺牛羊啖水族不爾作難在須臾鯨鯢張  
口待人肉嗟爾運漕於國爲咽喉粟米力役家家愁  
願持尺牒問陽侯

聖主勞兮瓠子塞河兮河兮當努力

淮口舟夜

風便不能發柁聲連夜長關河迷去住鷗鷺得行藏  
烟盡初冬月天寒未晚霜尊鱸鄉路近客思倍難忘

次淮上

夜泊孤帆津吏喧高城明月浪中翻天浮吳楚連江

甸地擁魚鹽，歷海門。枚叔里前寒，草綠王孫臺。呼暮  
雲昏，蒼茫極目，干戈後叢桂蕭條，不可論。

書清河縣客舍

疎烟寒照一荒邨，小邑無城野色昏。久廢驛庭稀馬  
跡，新營官舍總蓬門。地連河岸漁家少，草滿田園井  
稅存。誰信江南此風景，舟車絡繹不堪論。

渡淮作

王士禛  
字阮亭

凌風下淮口，舟子莫相催。杳杳水天合，蒼蒼葭菼來。  
帆飛公路浦，鳥下淮陰臺。亦是乘槎客，中流思轉哀。

韓侯釣臺歌

西風吹淮水倒流落帆一弔淮陰矣棘叢藤蔓斷碑  
蝕三尺釣臺成古邱嗟昔英雄悲蓐食垂竿憔悴無  
顏色壯懷不屑典連敖形容安用時人識一朝騰蹕  
起風雲登壇突兀驚三軍帝子晚能知大將漂母早  
解哀王孫雲蒸龍變陳倉道京索榮陽疾于埽已聞  
傳檄定三秦拔幟還驚下全趙丈夫生卽爲真王刷  
通豈必謀非臧食人之食死人事不知烏盡良弓藏  
左右早能分楚漢雲夢之遊可三嘆全身惜不如文  
成意氣殊羞伍絳灌千秋鐘室淚滂沱乃公感激大  
風歌夷黥醢越事已矣縱有猛士當如何雉雒宮中

恨終古白日蒼茫照淮浦有酒但酌韓侯臺不灑長  
陵一坏土

淮安新城有感

澤國陰多暑氣微一城烟靄盡霏霏春風遠岸江蘼  
長暮雨空堤燕子飛四鎮垂沙成底事五王龍種竟  
無歸行人淚墜官橋柳披拂長條已十圍

開國當年據上游建牙賜爵冠通侯卽看別院連雲  
起更引長淮作帶流荒徑人稀麋鹿嘯野塘風急荻  
蘆秋永嘉南渡須臾事忍向新亭問楚囚

淮陰雪夜

昨歲釣臺大風雪今來風雪又維舟枚舉里畔樹不  
辨淮陰祠前水亂流俛仰古今可太息側身天地多  
煩憂苦聞渤海金笳動故國何因得散愁

九月十九日登淮陰城東程將軍塚

毛奇齡

層雲盪晴空涼風薄枯草我登淮陰城秋衣振縹緲  
淮陰城東有高阜九日初過又重九聞君父子好探

奇

聞修齡若  
疎父子

邀我登高共飲酒籬頭黃菊堆酒卮風

前重把茱萸枝雙携銀榼墜鸚鵡頻開鑊椀燒正蟻  
飄飄千里試一望射澤鹽陂減秋漲烟浮蒼靄到海

平日湧黃河向天上紫霄高闕凌貝宮霓裳羽節吹  
長風圯橋再見赤松下淮王自坐丹霞中前臨巨塚  
近千尺半倚城根半葦陌水落難知王氏墳道傍猶  
暗滕公宅閭君本屬唐相餘稱言此是將軍墟神堯  
定鼎齋麟閣程氏高勳析珪爵曾留淮海鎮徐方因  
釋金龜莖繁弱千秋甲冑掩黃土猶抱旌走風雨  
介馬嘗隨龍虎號銜花近見牛羊舞秋風酌酒瀉玉  
餅陶思還視飛鴻翎昭陵西望久寂寞鼎湖南去愁  
青冥銅笙一曲倚桃竹戲馬臺空散黃鵠把酒頻看  
琥珀紅拂盡殘碑不忍讀

淮陰李貞女詩

上海圖書館藏

春城狹巷種烏漆秦氏樓頭閉朝日碧葉垂絲斷未  
連紅襟小燕飛難匹長淮嬌女年甫笄當窓便詠共  
姜詩行廬拖帳早相失單帆複衿誰與施淮流活活  
向東去三十春風等閑度若問城南陌上桑但指山  
前女貞樹

元日登淮陰城樓眺望

首旦招同契乘城眺遠空淮流千里逝楚服八州雄  
曲磴搖星閣城有魁星樓在角樓左層臺控帝宮烟花明滅裏  
形勝去來中萬瓦飛鱗脊諸圻錯繡叢橫欄虛隱霧



高鐸響迎風隔岸烽墩合前樓戍鼓通天連平楚白  
日射遠波紅繞郭迴檣櫓翻雲翳雁鴻丹牀憐斗粟  
食邑重良弓魯地原迤北吳關死在東升垣誰屬耳  
劃界笑重瞳柏酒留時令椒盤驗歲豐登臨能賦詠  
端的藉群公

過桃源作

柳色驚春至桃源傍晚過茫茫垂白日滾滾見黃河  
野戍廻鴻雁飛塵暗馬駝當墟多美醞不醉奈愁何

楊氏澹園雅集聯句

客淮者與淮之君子臘月遊澹園亭臺雅勝友朋

融好遂共聯長律以紀命姓限韻大可初名姓

策杖尋幽壑携樽渡野塘

張仍煒雲子

堤開楊柳幕徑轉

薜蘿墻

周麟喬嶽

良會追金磻名園是辟疆

毛姓大可

步方通

草閣香已拆梅房

劉漢中勃安

合殿迴山磴抽琴到石牀

童衍蕃微

懸崖飛墜雪古木落寒霜

戴金龍質

瀨淺魚全伏天

空雁自翔

黃世貴劉知

平臺虛掩幔曲閣靜飛觴

施有光爾賓

對酒耽思僻看山引興長

蔡爾趾子拂

遐心通埤垵高韻

起蒼筤

劉知

飲勝杯浮羽歌豪曲繞梁

龍質

開欄調野鶴

汲水煮河魴

蕃微

峰轉流雲碧亭銜落日黃

雲子

歸人爭

晚渡文鳥下斜陽

子構

客藉應劉美詞凌鮑謝香

爾賓

掌分履舄暝吹動笙簧

喬嶽

一水橫烟鎖千村帶霧藏

勃安驪駒方待駕明月早相望

大可

### 過安東

倪長犀

漣水經過地陂塘二月秋荒城斜倚岸舊市淺通舟  
絡索行人少聯拳宿鷺稠  
脚泥新燕入紅翠失飛樓

### 清河署中

劉漢藜

郢陵人

小邑遙通海編氓僅百家四郊多斥鹵一境半荒沙  
署閣閒飛浪公庭見遠槎  
澤鴻猶未集極目野烟遮

### 淮上詠古

田雯

滿地斜陽瑟瑟波人傳此地是甘羅土墻留得空城

在十里寒蘆宿雁多

甘羅

野日荒祠迹已陳棠梨涇口水粼粼  
哀鴻亦灑王孫淚  
泝泝何曾遇婦人

漂母

淮泗天連衰草秋射陂雲上楚山頭  
欲尋枚叔家何處  
鴉黑楓紅水怒流

枚乘

有酒如淮莫辭醉拚傾三百淺深盃  
昨朝蕩槩青蓮浦  
今上伯倫臺上來

劉伶

捉鼻狂吟湖上遊  
經春花鳥已深愁  
殘星長笛秋風老  
交付詩人趙倚樓

趙嘏

清河

白浪奔清口紅霞接海天  
哀傷孤雁叫安穩老蛟眠  
溝洫垂功日宣勞下詔年  
不知穿蟻穴何以算緡錢

安東

斗大安東縣荒城數尺高  
是田皆斥鹵有地但蓬蒿  
夜雨連鹽漬秋風泣石壕  
縷堤幸不潰十日水歸槽

漕船

朱彝尊

字竹垞

國家歲轉漕每船六百石  
官船計所儲爲斛千二百  
其初由海運險越虎蛟春  
波濤恒簸蕩日月互跳擲  
所以造舟時不復算尋尺  
八明改從河水次盡置驛  
不見真州佑浮江販豆麥  
縮之僅得半滿載未爲窄

安用萬斛寬邪許百夫役過牖遊上魚迎風退飛鷁  
臘開徂暑到久而垂鼠咋惟以便輓丁夫婦得泛宅  
南去挾臬絲北來收果核誰爲迂緩圖因循匪朝夕  
吾聞琴瑟敝絃者必更易國計在鼎司何時建良策

淮南感事

城樓高見碧湖懸淮堰將傾近百年比歲凶荒耕未  
得向來修築計誰先預愁四瀆江河合直恐三吳財  
賦捐開濟何人輪上策升虛急誦楚宮篇

張鞠存曲江樓雨後賞牡丹

宋

竿字枚仲

空林雨過送春寒別墅追隨訪謝安待月杯從芳徑

設撩人花似故園看漁歌乍逐清風起鶴夢閑思碧  
海寬向夕振衣高閣上珠湖烟水正瀾漫

洞橋

查慎行

字初白

風色轉河壩春光滿淮甸阪被菜花黃籬窺野桃  
朝陽出疎樹蘆屋烟中見饌無登盤魚戶有啣泥燕  
從人問前路已近清河縣

淮上曉發

統如五鼓催船發輪仄高城下弦月已聞兩岸過鈴  
聲燭燭曉星光未沒依稀枕上續歸夢尙隔江湖浩  
難越起來照影向清淮愁見塵顏映華髮往還勝下

橋邊路萬事回頭總飄忽只有年光不負人  
鱖魚絮  
煖蓴絲滑

秋杪重至王家營

十日征程滯故鄉大河西北又嚴裝  
千家轉徙留三  
戶萬柳榮枯在一霜  
斷岸無橋頻待渡  
泗沙有憤尙  
犁荒驚心八月歸舟路  
夜下荏苒百里黃

雨泊淮關

鎖鑰嚴關閉裝囊獨客輕  
市樓傳柝暗鄰舫吐燈明  
酒罷人初靜風高浪不驚  
淮南今夜雨好片滴篷聲

淮陰侯廟下作



滅楚還封楚破齊曾王齊英雄歸駕馭股掌若孩提  
失國嗟烹狗麋身付牝雞土人憐至骨廟像儼公圭

發清江浦

南來步步遠風霾川路長征一倍佳竹筵蒲帆渾不  
用櫂聲如雁下長淮

編蘆縛荻聚成堆大舸多從江外來試開老堤堤畔  
柳年年辛苦爲誰栽

淮安上船

厭聽鈴聲愛入舟只應洗耳向清流  
糝香夜靄淮神

廟夢穩江南第一州

王家營

查嗣璣

五年三到三移渡心折驚濤打岸聲莫笑客行無定  
向主人身世亦浮萍

題淮陰侯祠

蔣

楷

字荆名

長堤風塵昏車馬日馳驟上有古釣臺片石當寒溜  
●云昔淮陰侯家貧志未就于此獨垂綸功名立宇宙  
旁卽漂母祠基廢莫堂構殘碑臥草間半被泥沙覆  
入城甲第多冠蓋亦輻輳中餘韓侯祠開府署其右  
早暮鼓吹喧荒祠無俎豆榱桷久崩頽相尋成外廡  
庭除漉渤富未許蓬蒿茂侯雖馬上來雄畧本天授

不忘一飯恩千金以爲壽安得遇高賢揮金用意厚  
憑弔各經心修明復厥舊

新城懷古

滄桑遞變誰與期螻蛄朝菌夫何如我來淮陰逾二  
紀鄉殊物換星屢移卜居新城類邨野坵垣曠土連  
洿池東隣父老向余道此城全盛今非時粉蝶初新  
起百雉人烟輻輳如布碁翬飛鱗次陽翟賈輕裘肥  
馬邯鄲兒豈無城南韋與杜鏘金鳴玉聲華垂一朝  
大帥立藩鎮飛揚跋扈生瘡痍革命迄今遂瓦解屨  
樓海市安可追更聞黃河咆哮西北郭于今遷去漣

水湄廢興消長各有數曠觀身世歸希夸登陴翹首  
一長嘯吾欲乘風飛上扶桑枝

重修韓侯祠詩

徐 恕

淮陰城頭日欲沉淮陰城下波千尋韓侯遺跡知何  
許榛菅如束狐兔語當年置塚營萬家此日荒祠更  
無主劉項中原爭逐鹿大將登壇如破竹收魏舉趙  
包青齊龍且授首重瞳蹙智勇坐困滎陽城假王真  
操天下衡震主身危遊說切背德不祥大義明楚歌  
四起功獨冠鳥盡弓藏動悲怨鐘室含冤呂后慘大  
風製曲高皇憾噫吁嘻圯橋遺履黃石公漂母一怒

機緘同解人會意得終始區區望報非深衷少年勝  
下曾不怒封侯却羞曾等伍英雄雖然未學道俎豆  
馨香亘今古淮壖草綠憶王孫鼎新祠宇傷我神世  
間多少安樂者何似于秋廟食人

過南齋感懷舅氏大理公

喬崇烈

外家梨栗記當年竹馬枝枝競着鞭歲月漸多人半  
鬼齋廊無改樹叅天遺交自過勤箋疏幼子還能校  
簡編不道老成凋謝久西州門外涕漣漣

平橋道中

盡日西風抵緯絲篷窓一卷裕之詩就中閑味還堪

記黃浦前頭睡覺時

洗墨池立碑

余光祖

安東邑治爲宋漣水軍舊地署右一池米南宮知  
軍時每滌墨于此明初貳尹李君侃曾暨碣年久  
湮沒無存余卽其遺址復爲勒石并紀以詩

重鑄一石到荒池芳蹟從教後代知好事漫嘲漣水  
令多情應識峴山碑龍蛇舞憶雙釣日風雨愁生坐  
眺時擬卜亭成招勝侶覓將黃絹共題辭

寄淮上曲江樓文會諸子

王汝驥

字耘渠  
金壇人

美人不可見頻夢亦奚爲落日華陽道長風漂母祠

相思尋舊簡投報渴新詩  
賸有臨文意竿頭進昔時

春日黃河閱工書所見

高斌

河干緩轡踏平沙  
雨潤輕塵風物嘉  
清磬數聲聞野寺  
炊烟幾縷望田家  
淡黃嫩綠三眠柳  
姹紫嫣紅四照花  
到眼春光行處好  
却令使客惜年華

傷淮民家貧

常安

我聞古人語瘠土民不淫  
淮南本澤國平衍無山林  
厥田惟下下半爲波浪侵  
男不務耕作女不勤織紝  
質遷不服賈何以致多金  
我來一問俗四壁聞呻吟  
愧乏旣富術時時增憂心

左孝子詩

母爲孤黃鵠哀哀哺其兒子爲畢哺烏反哺恒咿咿  
母病不可治子生亦何爲含悽操利刃割股持作糜  
糜熟母病已不知醫者誰從此鳩杖扶皤然鶴髮垂  
溫衾扇枕席晨夕娛庭闈當堦爛熳舞低聲祝哽時  
上盤堆玉酪下盤繪銀絲終天渾如一長係白雲思  
人生有如此跪乳何足奇

題邊頤公潑墨圖

顧琮

舊識邊蘆雁今看潑墨圖雲烟生咫尺風雨滿江湖  
捧硯人何異披帷友不孤愧余督運使焉得侶潛夫



潑墨圖

徐葆光

到處逢君潑墨圖，吞天胸次有江湖。  
頭銜自署邊蘆雁，淮北淮南鄭鷓鴣。

只畫蘆花不畫雲，怕他高處易離羣。  
湘江獨擁蘭橈去，一路紛紛總識君。

宿商家灣

王欽福

字時五

楚塞三春日，郵車一望賒。  
桃花明野水，柳色染平沙。  
吳壘屯雲影，章臺佇月華。  
只今燈火處，天外幾人家。

由桃源返淮上

過眼雲烟迹已陳，東西南北一閑身。  
隄邊桃李隨春

夢水際鳧鴨狎渡津  
自分江湖籌國事  
誰從風雨問行人  
淮陰可有尊鱸在也  
自歸思滿綠茵

題淮安郡城普濟堂壁

劉統勳

魚鱗屋瓦照清淮  
鴻雁安居得意皆  
拂却蒼苔看細字  
齷因覩縷見襟懷

香烟一縷奉金僊  
護念人人種福田  
鳩鵲入門携手笑  
阿儂施與善因緣

詠古

沈德潛字確士

淮陰貧賤時甘受  
少年侮如何既封侯  
羞與噲等伍能忍功  
有成滿假禍斯取  
欵器貴挹損此事鑒  
諸古

渡黃河

徐廷槐

字笠山

濁浪高西北南來怒未闌何年疏鑿易此日輓輸難  
袞袞官成隊蕭蕭荻滿灘江流隔幾許過客一回看

陸壘雲屯

畦文煥

野田無數鳴隨意自飛集借問此何處當年陣營立  
桓桓陸將軍振策揮吳卒零落小金牌留與耕人拾  
陰風天四垂盤鬱昏霧澁墳起隱荒堆疑聚鬼神密  
一帶繞河流水聲亦蕭瑟

過淮陰

方貞觀

韓侯祠畔水流長枚乘墳邊野草芳國士可憐終橫

死詞人休怨止爲郎升沉自昔如生歿少壯能銷幾  
夕陽容易辭家春又老不堪倚棹向蒼茫

登曲江樓

程國耆

漱澗晴湖一望收登高頻上曲江樓千帆出樹烟中  
沒萬雉連雲天際浮綠染鬚眉循竹徑涼生襟袖問  
漁舟東鄰臺榭吾家近載酒何妨日日留

漂母祠題壁

翁照字即夫  
江陰人

漂母祠前野樹枯重尋遺跡半荒蕪士甘窮餓今常  
有女識英雄古所無老屋三間風掩冉殘碑一片雨  
模糊劇憐韓信功成後不更歸來作釣徒

張鞠存吏部馬西樵孝廉過湖上

僧傳柴村 遐

地僻存吾拙何煩枉駕尋漫因初霽好應惜是春深  
草閣無多步湖天共此心荒寒如不棄還過聽幽禽

同友人夜泛蕭湖

僧燈岳宗 岱

蕭家湖上散晴烟最好涼秋薄暮天綠酒喜看名士  
譙青衫閑坐野人船桂輪似鏡虧猶半玉露如珠滴  
已圓夜色此時真入畫水光遙與白雲連

歷朝詩下

漢

雜詩九首

依玉臺新  
詠編次

枚乘

字叔  
淮陰人

西北有高樓上與浮雲齊交疏結綺窓阿閣三重階  
上有弦歌聲音響一何悲誰能爲此曲無乃杞梁妻  
清商隨風發中曲正徘徊一彈再三嘆慷慨有餘哀  
不惜歌者苦但傷知者稀願爲雙鴻鵠奮翅起高飛

前題

東城高且長逶迤自相屬回風動地起秋草萋已綠  
四時更變化歲暮一何速晨風懷苦心蟋蟀傷局促

蕩滌放情志何爲自結束燕越多佳人美者顏如玉  
被服羅裳衣當戶理清曲音響一何悲弦急知柱促  
馳情整中帶沈吟聊躑躅思爲雙飛燕銜泥巢君屋

前題

行行重行行與君生別離相去萬餘里各在天一涯  
道路阻且長會面安可知胡馬嘶北風越鳥巢南枝  
相去日已遠衣帶日已緩浮雲蔽白日遊子不願返  
思君令人老歲月忽已晚棄捐勿復道努力加餐飯

前題

涉江采芙蓉蘭澤多芳草采之欲遺誰所思在遠道

還願望舊鄉長路漫漫浩浩同心而離居憂傷以終老

前題

青青河畔草鬱鬱園中柳盈盈樓上女皎皎當窓牖  
娥娥紅粉粧纖纖出素手昔爲倡家女今爲蕩子婦  
蕩子行不歸空牀難獨守

前題

蘭若生春陽涉冬猶盛滋願言追昔愛情欸感四時  
美人在雲端天路隔無期夜光照元陰長嘆戀所思  
誰謂我無憂積念發狂癡

前題



庭前有奇樹綠葉發華滋攀條折其榮將以遺所思  
馨香盈懷袖路遠莫致之此物何足貴但感別經時

前題

迢迢牽牛星皎皎河漢女纖纖擢素手札札弄機杼  
終日不成章泣涕零如雨河漢清且淺相去復幾許  
盈盈一水間脉脉不得語

前題

明月何皎皎照我羅牀帷憂愁不能寐攬衣起徘徊  
客行雖云樂不如早旋歸出戶獨徬徨愁思當告誰  
引領還入房淚下霑裳衣

魏

遊覽詩二首

陳琳字孔璋  
射陽人

高會時不娛羈客難爲心  
怨懷從中發悲感激清音  
投觴罷歡坐逍遙步長林  
蕭蕭山谷風默默天路陰  
惆悵忘旋反歔歔涕霑襟

前題

節運時氣舒秋風涼且清  
閑居心不娛駕言從友生  
翱翔戲長流逍遙登高城  
東望看疇野廻顧覽園庭  
嘉木凋綠葉芳草織紅榮  
騁哉日月遠年命將西傾  
建功不及時鐘鼎何所銘  
收念還房寢慷慨詠墳經

庶幾及君在立德垂功名

宴會

凱風飄陰雲白日揚素暉良友招我遊高會宴中關  
平鶴浮清泉綺樹煥青蕤

飲馬長城窟行

飲馬長城窟水寒傷馬骨往謂長城吏慎莫稽留太  
原卒官作自有程舉築諧汝聲男兒寧當格鬪死何  
能拂辭築長城長城何連連連連三千里邊城多健  
少內舍多寡婦作書與內舍便嫁莫留住善事新姑  
嫜時時念我故夫子報書往邊地君今出語一何鄙

身在禍難中何爲稽留他家子生男慎莫舉生女哺  
用脯君獨不見長城下死人骸骨相撐拄結髮行事  
君慊慊心意關明知邊地苦賤妾何能久自全

唐

送歸中丞使新羅

吉中孚

山陽人

官稱漢獨坐身是魯諸生絕域通王制窮天問水程  
島中分萬象日處轉雙旌氣積魚龍窟濤翻水浪聲  
路長經歲去海盡向山行復道殊方禮人瞻漢使榮

咏柳絮

吉侍  
郎配張夫人

山陽人

藹藹芳春朝雪絮起青條或值花同舞不因風自飄

過樽浮綠醕拂幌綴紅綃那用時愁翫春懷不自聊  
宿楚國寺有懷  
趙嘏字承祐  
山陽人  
風動衰荷寂寞香斷烟殘月共蒼蒼寒生晚寺波搖  
碧紅墜疎林葉滿牀起雁似驚南浦棹陰雲欲護北  
樓霜江邊松菊荒應盡八月長安夜更長

寒食遣懷

折柳磯邊起暮愁可憐春色獨懷憂霑襟正嘆世間  
事回首更慚江上鷗鴉聲中寒食酒芙蓉花外夕  
陽樓憑高滿眼送清渭去傍故山山下流

長安晚秋

雲物淒涼拂曙流，漢家宮闕動高秋。  
殘星幾點雁橫塞，長笛一聲人倚樓。  
紫豔半開籬菊靜，紅衣落盡渚蓮愁。  
鱸魚正美不歸去，空戴南冠學楚囚。

東望

楚江橫在草堂前，楊柳洲邊載酒船。  
兩見梨花歸不得，每逢寒食一潸然。  
斜陽映閣山當寺，微綠含風樹滿川。  
同郡故人攀桂盡，把詩吟向泐寥天。

長安月夜與友人話故山

宅邊秋水浸苔磯，日日持竿去不歸。  
楊柳風多潮未落，蒹葭霜冷雁初飛。  
重嘶匹馬吟紅葉，却聽疎鐘應

翠微今夜秦城滿樓月故人相見一沾衣

憶山陽

家在枚臯舊宅邊竹軒晴與楚坡連  
芰荷香遠垂鞭袖楊柳風橫弄笛船  
城礙十洲烟島路寺臨千頃夕陽川  
可憐時節堪歸去花落猿啼又一年

李先輩擢第東歸有贈

金榜前頭無是非平人分得一枝歸  
正憐日暖花飄路何處宴廻風滿衣  
門掩長淮心更遠渡連芳草馬如飛  
茂陵自嘆常多病空有書齋在翠微

陪韋中丞宴扈都頭花園

一作楚州宴花樓

門外烟橫載酒船  
謝家携客醉華筵  
尋花偶坐將軍樹  
飲水方重刺史天  
幾曲豔歌春色裏  
斷行高鳥暮雲邊  
分明聽得與人語  
願及行春又一年

山陽韋中丞罷郡因獻

中丞名璿

笙歌只是舊笙歌  
腸斷風流奈爾何  
煦物一年春色在  
感恩千室淚痕多  
盡將魂夢隨西去  
猶望旌旗暫一過  
今日尊前無限思  
萬重雲月隔烟波

宋

忠烈詩爲趙公師旦作

徐積

字仲車山陽人

在昔皇祐蠻黨交  
構聚爲伏泉起爲  
攬馱出人不同意



其鋒甚銳州無敵兵城無守備所在奔亡賊勢益張  
橫身捍蔽爰有晉康羸兵數百摧堅沮敵殊死血戰  
氣吞逆賊按劍一呼背裂吻拆凶焰方熾公方虎視  
人方憂死飽食寤睡勇如項籍哀歌惻惻爲虞姬泣  
康州不然忘其妻息猛如敖曹強梁粗豪伏藏於橋  
康州不然坐叱凶妖李陵壯夫終降匈奴老母何辜  
顏魯雖賢所守不堅大節不全奇哉康州其勇絕類  
以義配勇其本在內不動如山不傾如地何物可搆  
何兵可制如令不死社稷所恃如令復生可備宿衛  
佩刀驟乘執戟殿陛用之朝廷朝廷之綱使當一面

勝于金湯無疆無界人迹鬼方如有斯人中國之光  
若斯人者決不徇利肝膽可漚頭顱可碎生乎由是  
死乎由是生亦可貴死亦可貴死而有子時方三歲  
死中得活此乃天意使世其家世爲忠義子子孫孫  
永不失墜我爲此詩激勵萬世

送山陽宰

大夫三年平恕如一靜而不煩民安厥室大夫去矣  
何以述之我述民言民實德之

北神烈婦

事見烈婦傳

海水猶可泛君身不可犯淮水猶可瀦君名不可污

鸞鳳猶可馴冰霜猶可親不是雲間月卽是月邊雲

淮之水示門人馬存

君不見淮之水春風吹春面洗青薰衣綠染指漁不  
來鷗不起漱漱澗澗天盡頭只見孤帆不見舟斜陽  
欲落未落處盡是人間今古愁今古愁兮將奈何莫  
使騷人聞棹歌我曹自是浩歌客笑聲酒面春風和

淮陰義婦

富商之妻李氏  
事見烈婦傳

酷賊姦讐旣已除銜冤抱耻正號呼當時但痛君非  
命今日方知妾累夫捨義取生真鄙事殺身沉子是  
良圖幾年污辱無由雪長使清淮滌此軀

送山陽宰高奉議

大夫歸旆暖搖春正好浮淮向汴津一片青山迎去棹  
兩隄芳草伴行人當官事業今彌邵滿橐文章老更新  
記取吾鄉蒙實惠吟翁亦是舊編民

寄路倅洪澤阻水二首

黃金宮闕紫瑤關鶴鷺思陪玉笋班仙仗好教鳧舄  
去客槎却在斗牛間有爲義對霜濤湧無敵詩同鐵  
陣閑誰報京師羣弟子先生更隱鬢毛班

前題

莫教容易過龜山多少人心願復還更有南城黃綬

客但吟西戶綠楊間  
纔經濁汴無澄浪  
且趁清淮洗醉顏  
安得就公歌一曲  
緩吟遲步夕陽灣

題紫極宮

卽紫霄宮

不須騎鳳跨鯨鼈  
來訪蓬宮是我曹  
玉笈著書金簡重  
碧牌題字紫垣高  
因思大道閑閑意  
頓覺浮生事勞  
一榻清風曾晝臥  
畧無塵夢及三刀

望淮亭和君錫並簡敦復二首

澤國茫茫似十洲  
有情空上夕陽樓  
可憑流水傳人意  
莫望遠山添客愁  
南浦雪思乘棹往  
北軒春負插花遊  
若論仕宦何非義  
二子無容說愧羞

前題

烟波何處是汀洲  
白鳥歸來且下樓  
水落更隨寒雨  
盡山空仍帶夕陽愁  
詩筒去是蘭亭事  
客棹來非剡水  
遊我問兩人同榜  
彥仕方行義若爲羞

題東軒

我家東畔好憑欄  
柳一林邊水一灣  
城下人烟都似  
野城頭雲樹恰如山

呈徐仲車

張耒

字文潛  
淮陰人

旭日照高簷  
夜霜猶在瓦  
纖纖墻邊柳  
春色已可把  
殘年能幾何  
奔駛劇湍瀉  
雖無功名求  
衰暮亦悲吒

出門問徐子兩計決取捨爲當勉自修汲汲不可暇  
爲當飲美酒送老在杯竿子當指我途我卽策其馬  
但恐懶拙姿終非服勤者

淮陰太寧山主崇岳逮與余諸父遊今年七十  
餘耳目聰明筋力彊壯奉戒精苦禪誦不輟聞  
余自黃歸欣然空所居而相延日與之語或寂  
然相對終日使人之意也消因賦此詩

我來之初季春月門外李花如積雪杜門燕坐度長  
夏庭樹秋風忽騷屑西馳老火不復燎急雨淒風爭  
應節紫貂曝日知有待畫扇依墻將怨別蒸雲積潦

漸收拾惡木煩蕪稍摧折不知此事誰主張躍馬奔  
車忽回轍嗟予行事蹈坎壈僅免豺狼膏齒舌三年  
閉戶俄江島脫粟無餘衣百結近者皇天忽悔禍雨  
施雲行咸凜雪復官還職遍海內爭脫囚冠鳴佩瑛  
老夫龍鍾衆人後一舸循江信公涉風波歷盡見故  
郡親友相逢驚白髮道人已老見我喜淨埽高堂容  
憩歇佛龕日近侍香火僧飯時容供粗糲讀書小技  
設勤苦安禪大觀無分別久便閑放輕祿利已脫憂  
危做縲綫天時進退古不忒人事興衰今屢閱酒濃  
村店足斟酌魚美長淮恣餽啜從今萬事付天工致



新安民看夔契

淮陰阻雨

檣竿日日春風轉  
渺渺孤舟數家縣  
朝來雨暗隔淮村  
白浪捲沙吹斷岸  
渡頭楊柳濕青青  
橋下涓涓野水生  
滿尺白魚初受釣  
斷行孤雁故能鳴  
平生行止任遲速  
篷底欠伸朝睡足  
從來江海有前約  
老去塵埃無可欲  
晚天暖日生波光  
桃杏家家半出牆  
春日春波好相待  
短帆輕櫓何須忙

遊楚州天慶觀觀高道士琴棋

頽垣蒼蒼鎖喬木  
草滿荒庭不容足  
壞簷破壁秋雨

餘珠網蕭蕭風滿屋黃衣道人出迎客野態生疎脫  
拘束圍碁盡掃一堂空烹茶旋煮新泉熱彈琴對客  
客臥聽悅耳泠泠三四曲離騷幽怨松風悲流水潺  
湲履霜哭日斜携手步空廊鳴鳩相呼竹間宿黃昏  
門閉人語絕空殿幽幽掩微燭我生資身最淡薄每  
厭煩歎幸幽獨何當不踏朝市塵長伴高人種松菊

對雪呈仲車

學堂歲暮無來客殘雪漫漫風獵獵當庭古柳三四  
株老翁携帚收殘葉二年閑散百事慵饑寒不自勤  
鉏鋪囊空甌倒誰復救典衣沽酒將空篋人間萬事

苦難齊以醉驅愁最奇捷丈夫未死誰能測幽憂何  
自同兒妾飲酣耳熱詩興道直上虛空恣陵躡饑喉  
凍噤誰與解正藉醺酣得嚙嚼少年舉白未嘗辭漸  
老深杯見還怯何當共有種稻田免向官壇走書帖

寓太寧寺

春寒客古寺草草過鶯花小榼供朝酒溫壇煮夜茶  
柏庭鳴曉吹樓櫓麗朝霞莫嘆萍蓬迹心安卽是家

淮上夜風

縣郭初轉柝船窓已閉篷星低春野路月淡夜淮風  
烟水東南澗魚鹽吳楚同久遊諳里社賒酒問鄰翁

登城樓

沙雨初乾巾褐輕獨披篋笠步高城天晴海上峰巒  
出野暗人家燈火明歸鳥各尋芳樹去夕陽微照遠  
村耕登樓已恨荊州遠况復安仁白髮生

離山陽入都寄徐仲車

孤城芳樹碧層層村落黃昏只見燈回首事如前夕  
夢出門心似下山僧仕求行道時難偶意欲謀閑力  
不能寄語東臯方釀酒待余歸日解行滕

題淮陰孫簿壁

荒涼官舍對淮流尊酒相逢爲少留夾道老椿鴉哺

子隔墻芳草牧呼牛渡頭人散前村市天際帆來何處舟自古詩人最多感新篇應解寫騷愁

初離山陽廻寄城中友人

落月昏昏向水低五更殘燭一聲雞祗應魂夢猶東去從此扁舟日向西

楚城曉望

鼓角凌虛雉堞牢晚天如鑑絕秋毫山川搖落霜華重風日清明雁字高

過漣水

城頭落日在旗竿城外長淮水浸天左海門前燈火

盡櫓聲嘔軋夜深船

淮陰道中

映日斷霞臨水盡  
出雲新月向人來  
野塘秋晚無行迹  
點點黃花照水開

淮陰侯廟

千金一飯思猶報  
南面稱孤豈遽忘  
何待陳侯乃中起  
不思蕭相在咸陽

雲夢何須僞出遊  
遭讒猶得故鄉侯  
平生蕭相真知己  
何事還同女子謀

題鶴林寺

丞相讀書處

陸秀夫

字君實鹽城人

歲月未可盡朝昏屢不眠山前多古木牀上半殘編  
放犢飲溪水助僧耕稻田寺門多斷埽分食愧農賢

陸君實輓詩

龔開

字聖子  
淮陰人

立事寧將敗事論在邊難與在朝分從來大地爲滄  
海可得孤臣抱幼君南北一家今又見乾坤三造可  
曾聞他年自有春秋筆不比田橫祭墓文

前題

尹應許

誰使權奸釀禍深末流無復救危杵君臣霄壤難同  
死社稷坵墟可再生叔寶井中空大辱魯連海上特  
虛名一家骨肉俱魚腹留得丹心萬古明

古今忠義獨斯人危在須臾見益真身不遠亡憂喪  
節君非同逝慮蒙塵平時誰執朝廷柄末路方知社  
稷臣楚些欲招招不得滄溟南望浩無津

前題

湯炳龍

字子文  
山陽人

七日陰霾事可知樓船魚貫果誰爲人心自感興元  
詔天意難同建武時黃屋朔風那有濟角巾東路覺  
無期公爲萬古綱常計兒女扳船不暇悲

間關海島豈謀身嬰白存心力不能天上龍章空結  
夢人間魚腹了中興英雄一死從君父忠義遺編托  
友朋萬里楚魂招不得詩成惟有淚霑膺



題江貫道百牛圖

我本山陽田舍叟家有淮南數千畝江南倦客老不  
歸此田都爲勢家有猶記少年學牧時去時日出歸  
日西我生衣食仰此輩愛之過於百里奚祇今辛苦  
耕硯席無處賣文長絕食卷中邂逅黑牡丹相逢喜  
是曾相識負郭無須二頃田一雙栗角能幾錢數口  
之家便可飽要如此圖知何年平生富貴非所願城  
府近來尤可厭何時倒乘牛背眠東風勝如仰看宣

明面

據此詩知北村爲山陽人非丹陽人也

元

題舒秀實鋤隱

卞思義

字宜之  
楚州人

賓幕歸來野興濃，卜居還得近城東。  
繞籬自刷荆榛地，傍屋添栽杞菊叢。  
一窺燕泥春雨後，數聲牛笛暮  
烟中。紅塵軒冕非吾事，老圃如今願已同。

明

泛舟

李徵

月滿船窓睡起遲，鄉情詩思兩依依。  
山花笑我重迴棹，村醪憑誰一典衣。  
撲面風塵偏作惡，傍人水鳥却  
忘機。故園到日春還在，幾樹薇花照竹扉。

仲夏既望憂旱

楊靖

字仲齊  
山陽人

火雲蠢蠢顯奇峰  
蟠竦西東駕赤龍  
大地生風增酷烈  
枯禾鎮日想陰濃  
爲霖傳說安能得  
噀雨樂巴豈易逢  
萬姓嗷嗷殊可念  
小臣非獨計朝饔

中秋

楊

泰

諡襄敏

長空萬里淨如洗  
一片冰輪漾秋水  
變態風雲碧落中  
廣寒官殿清虛裏  
嫦娥永夜不勝愁  
故捲珠簾控玉鈎  
桂樹婆娑香影動  
人間八月正中秋

李節婦曾氏

金濂

字宗翰諡榮襄

妙齡苦節晚歸全  
烈性真心鐵石堅  
斷指矢衷天地感  
自經見志鬼神憐  
蘋蘩職播共姜譽  
紡績勤追魯

敬賢此日旌書褒懿行萬年正氣凜  
韋編

秋日遊鉢池山

李恕

閑吟秋水意如何何似淮山秋水多  
徑可棄舟登古寺無勞著屐訪巖阿  
神仙舊迹餘丹竈伴侶新懷詠  
碧波千載巢由同寄想替纓真不易  
烟蘿

漂母祠

高安  
字志康

一飯世所有不及王孫饑千金亦易報  
受者未必辭王孫雖饑困氣骨亦自奇  
老母阿堵中亦識英雄姿但解哀王孫  
安計報施爲知有千金報一飯亦不施  
所以千載後婦人而鬢眉

漁磯獨酌

全

銑

字宗澗

清溪蔭垂楊下有燒削石風含水氣涼露洗苔花碧  
美人佳興道獨往日成癖坐石俯清流投竿聊取適  
向晚滯還期月華滿川白

和湯叅將節遊紫霄宮

聞道元戎小隊過尋幽深入碧雲窩上方樓閣連霄  
漢前代衣冠鎖薜蘿花樹亂飛鶯老眼鶯聲百轉雜  
清歌蹇驢不得陪吟賞追和陽春感興多

寄史叅議德敏

幾欲題詩寄遠思此情料得故人知雁拖秋色雲千

里梅泛寒香月一枝扇影朝回鴉鵲觀佩聲夢遠風  
凰池龍吟莫笑司空劍上下風雲會有時

秋江橫笛

史

敏

字德敏

短篷繫處秋滿灣天風灑鬢滄浪寒醉橫玲瓏碧玉  
管欲邀黃鶴仙人還清襟豪興正飛越誰解呼船賞  
奇絕一聲叫住雲不流江上清風挂新月

寄顧存道

金榜英賢別帝鄉銅章墨綬治宜陽關山路遶烟霞  
重草木春寒雨露香休慕陶潛栽柳宅且傳潘岳種  
花方鉤簾日與錦屏對援筆醉吟清興長

西湖烟艇

齊昭  
字雲漢

萬頃波光浸太清，獨憐漁父刺船輕。  
蘆中忽沒飄飄影，柳外徐來欸乃聲。  
盟鷗狎鷓迷遠近，醉烟歌月任縱橫。  
年來只欲從詹父，短棹夷猶過此生。

蔣叔郎園亭

史瓘  
字德輝

芳園傍城市，幽興託烟霞。  
地僻松扉寂，亭虛竹徑斜。  
穿林閑野鶴，入座擁名花。  
落日催寒色，城頭集暮鴉。

謁墓早行

潛亨  
字從禮，號水整

霜露趨先隴，城南路轉賒。  
樹頭搖病葉，牛背立寒鴉。  
時序驚心切，松楸淚眼花。  
西風天末起，吹恨入哀笳。

軒前秋晚水紅花盛開

西湖移種傍吟壇翠葉參差拂畫欄一簇晚霞烟外  
暖數莖秋雨夢中寒黃花綠竹知心久野鶩沙鷗識  
面難滿目蕭蕭江海趣尋常疑作畫圖看

喜雨

楊理字貫之

雨過西軒透葛涼隔窓雲影落瀟湘烟開汀草湖天  
碧水映江城樹色蒼兩鬢閑愁空歲月一年好景在  
池塘捲簾獨坐渾無事幾欲題詩洗渴腸

鄉思

顧達字存道

家住新城古剎傍小橋流水落斜陽月明鶴影翻松



逕風暖鶯聲鬧草堂一  
善脆思蒲菜嫩滿盤鮮憶鯉  
魚香病多欲去增慙愧  
未有涓埃報聖皇

西湖烟艇

船載香醪樂趣多  
暖烟深處酌金螺  
萍開白鷺窺蒼  
沼荷動紅鱗躍碧波  
清潁風光真可並  
古杭時景未能  
過醉歸不用喧絲竹  
自有漁人送棹歌

山居

張素  
字平鄉

茅屋青山下地幽人絕迹  
秋來兩三雁點破空江碧  
天師竹木蘭草圖爲清河大尹質魯劉公題

楊清  
清河人

君不見九畹之蘭馨且幽託根遠地誰堪儔含英咀  
秀經幾秋不隨桃李呈春柔又不見渭川之竹清更  
長夜來風雨鳴琳琅虛心勁節永不忘任教蒼翠凌  
風霜嗣教真人能貌此特贈雷封魯君子公餘展玩  
怡心神氣味孤高頗相似存心端不愧此君致身直  
上青天雲承宣百里勞忠勤光風一轉遐邇聞只恐  
人間非久見搖風玉珮鳴金殿自是同心有國香不  
羨河陽花滿縣

節孝祠

陸遠

道統師資接孟隣政和褒諡墨常新瀕淮井郭三子

戶誰是山陽第一人

南浦月

鏡湖十里接金牛  
菰米蓮房共一舟  
午後清風偏沁  
骨幾人詩酒度高樓

贈孝子凌鏗

李元字貞夫

割兒肉抹兒親  
一念之烈不顧身  
身且不顧名何足  
珍明有日月幽有鬼神  
羨一入口回陽春  
嗟嗟孝子  
一點血金刀萬古常如新

平橋

潘墳字伯和號照臺

古渡徒杠成南北  
半分路極目望征帆  
名利競朝暮

長虹下飲川怪底生烟霧農事不須憂龍挂溪頭樹

新秋

韓信城邊月劉伶臺下秋莫驚塵海夢好伴醉鄉遊  
天地蘧廬主風雲滉蕩倚夕陽重搔首曳履且閑謳

九日登紫霄宮

爲掖青霞上紫霄經秋霜髮短蕭蕭風驅宿雨烟初  
盡霜落高枝葉半凋杯酒閑情應共得桑田塵劫幾  
同消與酣還倚雲林望雙鶴盤旋碧海遙

拜節孝先生墓

趁草牛羊門自開一邱元氣鬼神培風前敗壁扶欹

清史列傳 卷之三十一  
樹雨後鳴蛙上祭臺世道總關新燕雀人心不是舊  
尊魯先生當日曾科第此道于今利祿媒

節孝書院

楊谷  
字遷喬

新宮倚東郭仰止切吾儕卓行真難並遺芳尙可懷  
行人戀榆柳野老拜庭階更愛遺文在還堪勒小齋

韓信荒城

蔡昂  
字衡仲號鶴江

漢家司農難用牝真主南巡將星殞蒼涼故國弔遺  
踪落日清淮去無盡王孫不歸城亦荒沙頭草樹紛  
成行尙有千年不平氣化爲雙劍騰青蒼

節孝書院

節孝祠前梅樹古嘉實離離足風雨野人採摘進中  
堂堂下娑娑紛拜舞百年淮海一徐翁史家立論文  
章宗誰使名編卓行後翁乎上友南陽龍

范張古廟

同舍交情別時語遠道悠悠會雞黍兩人臭味本來  
同一諾千金詎輕許巨卿故道出金鄉胡爲廟食淮  
之陽吾意淮人重然諾相與俎豆延清光

劉伶仙臺

建威將軍竹林叟今古閑情一杯酒何緣此地有高  
臺臺下頽波正東走晉朝名勝俱蒿蓬惜陰尙說長

沙公感激誰能訴真宰會須一剗遺囊空

鉢池仙境

侵曉烟霏開昧爽淮川下瞰平如掌山頭黃鶴動成羣  
山下青芝日應長昔年飛步凌蓬萊鳳笙鶴馭雲中迴  
茲山在眼不一到空令滿地生蒼苔

金牛高岡

淮西青山近如咫誰能移置西湖裏天遣此岡枕湖  
涘彷彿土牛鞭欲起上有老檜凌風烟湖光着此須  
增妍斜陽倒影浸空碧水仙開鏡梳朝鬢

南浦月華

沙口漁罾閑個個秋風不動蛟龍臥壁彩清涵水面  
圓微風暗觸玻璃破蘭舟杜楫坐中流美人不來生  
遠愁儻然露下荷衣秋晨光漸起天東頭

西湖烟艇

三年京國紛塵鞅十里西湖勞夢想披圖一見已欣  
然况復還家對蕭爽杭州潁州天鑿開漁舟遠泛蒼  
烟來倚棹回看天欲雨鯉魚吹浪聲如雷

淮陰曲

淮浦高樓高入天樓前賈客常紛然歌鐘飲博十戶  
九吳歛不羨江南船邇來寂寞居人少韓侯城下生



春草力盡難供官長求大室將焚無宿鳥老人向我  
分明語地有官倉誰適主積粟翻爲腐鼠謀當塗又  
見橫豺虎虎哉虎哉爾勿狂地官分義明秋霜鎮壓  
會須虎戢翼爾民從此安耕桑

過崔鎮

巷曲柳交蔭籬疎荳吐花驅牛下長坂喚渡立平沙  
充市多農具臨流半酒家誰能棄行役此地問生涯

西平道中

馮

煥

號南淮

西平古道曉驅牛正是孤臣萬里餘丹詔不來金鳳  
闕彩衣何日白雲廬山禽解語時相問流水無情只

自如珍重此身原許國莫令華髮暗蕭疎

時忤嚴嵩請茂名舉

午日賜宴

沈坤

字伯生號十洲

鳳闕開筵儼畫圖千官仙仗擁傳呼  
菖華泛酒光搖綠角黍縈絲日射朱  
獻壽祝延長命縷銷兵飛試赤靈符  
願今儲艾思醫國長奉堯尊頌帝衢

送馮南淮比部謫茂名

張侃

號鳳原

別酒纔傾意轉親秋濤雲日漫傷神  
明時亦復爲遷客直道應無愧古人  
入夢紫宸星象近天開百粵畫圖新  
卜居未許更初服濟世旋看仗此身

采桑詞

朱笈

號龍岡  
桃源人

采桑南陌上桑椹何難離何如戴勝鳥食之以充饑  
春蠶未成繭桑葉半已萎風雨忽打門縣吏來催絲

秋日憶家

潦倒乾坤雪上顛西風蕭瑟感流年草根深處蟲自  
語竹下一燈人未眠赤手猶思扶社稷清時何敢羨  
神仙故園風月三更夢秋水芙蓉憶釣船

春日遊寶光寺

丁士美

字邦彥  
清河人

野寺尋春花較遲晚來風雨更相欺肯緣抱病違芳  
侶不惜春寒赴遠期蓮社自携新漉酒杏園曾憶舊

題詩浮名已逝韶華暮贏得東風兩鬢絲

泛舟西湖

周于德

號前墩

野澗風多夏亦涼湖陰避客懶衣裳一雙白鳥不飛  
去無數紅葉相對香雲影天光隨几席葛巾紈扇共  
滄浪臨流自浴端溪硯解得蘭亭用墨方

水後宿田舍作

沈坊

字伯禮

雞鳴茅屋夜將闌獨醒深憂世路難水溢長淮連歲  
決霜飛中野漸冰寒嗷嗷鴻雁棲無定擾擾征徭病  
未安老我腐儒備過計欲從浮海事漁竿

瑞龍歌

吳承恩

字汝忠

憶昨淮揚水爲厲，冒郭襄陵洩無際。皆云龍怒駕狂濤，人力無由殺其勢。忽然溪壑息波瀾，細草平沙得龍蛻。崢嶸頭角異尋常，猶帶祥烟與靈氣。神奇自古驚流傳，螫地飛天總成瑞。高家堰報水土平，世運神機關進退。司空馳奏入明光，百辟趨朝笑相慰。獨不見當年神禹治九州，奏績元圭動天地。今茲吉兆協神龍，千古元符遠相繼。佇看寰宇遍耕桑，歷萬千年保天位。

平河橋

短篷倦向河橋泊，獨對青旗枕臂眠。日落牛筓歸牧

笛朝來魚米集商船  
遠籬野菜平臨水  
隔岸邨炊互起烟  
會向此中謀二頃  
閑搯藜杖聽鳴蟬

卻郡公邀同郭山人飲招隱菴

郭公名元哲亭在西湖嘴對岸

水環幽榭綠漸漸  
暖日從遊二妙兼  
秋社欲催元鳥去  
晴沙喜見白鷗添  
斜陽野望移前席  
遠樹輕陰入半簾  
多幸山公憐病客  
許陪高逸侍清巖

憶馮雪因時役于京

彈缺歸來夢採芝  
燈前憶爾醉狂時  
風塵到處經雙眼  
邱壑何年借一枝  
寶帶銜毳燕市酒  
錦囊驢背灑橋詩  
還家好買西湖曲  
萬朶芙蓉映釣絲

清江月三  
卷之三十一

三

隄上

平湖渺渺漾天光  
瀉入溪橋噴玉涼  
一片蟬聲萬楊柳  
荷花香裏據胡牀

淮郡

楊于臣字名世

郡界淮南北星野跨徐揚  
重湖滙南垂東望連扶桑  
大河併淮趨激怒不可當  
後軒前以輕旣脫艱膏梁  
卽幸不爲魚蔽天來飛蝗重  
臣轉漕軸七省厘輸將  
征調苦四出加派增流亡  
雖稱海王國鹽羨腴他商  
中原與江表轉制居中央  
卓哉大都會引領望龔黃

山陽

山陽山何許鉢池留半環鑿邢出淮口乃在肘脅間  
昂首語青雀艦尾高于山冠蓋塗相望莫責供億艱  
五牖不復完流沙墊重關仁矣陳元龍高堰障瀑湲  
農情士亦竄淳風詎可還戴星日出入勞瘁凋心顏  
拊摩亟斯夕子遺當不菅願言采風使存此勿遽刪

鹽城

橫海城鹽濱乃隔射湖舣尾閘借石礎捍海隄憑陵  
環城列竈場六月霜雪凝矯激販者豪悍鷲如蒼鷹  
借交通飲食健訟遞相承樵漁差自給編戶潛以增  
斥鹵漸可佃繇茲禮義興卓哉陸丞相異數今始膺



禦戎昔勞擾高枕猶未能狡篡與國履霜乃堅冰  
阜寧衛哲治補

割地分新縣佳名錫阜寧黃淮爭尾間肘腋通滄溟  
射陽環如帶廟灣固藩屏在昔勝國日倭寇穴門庭  
防海增營制城守勞健丁我朝神廟算海疆樹威  
靈水胥陸馬練文武互緯經要地扼喻口楊墩草尙  
青民風思近古郎官上應星勸君善締造書此以爲  
銘

清河

河淮莽交注悍激爭東奔百室聊成聚臨流開縣門

秋水每時至一望無平原河伯所吐棄艾牧或作卽  
朝謀不及夕惡知長子孫流離不復返賦役日以繁  
議欲委其地徙民成空言積逋逮胥吏搶地獄吏尊  
甯解宦遊樂惻惻畏煩言誰能告天子蠲卹來殊恩

安東

漣水昔稱軍乃不營百雉藟裡闢四門跋牂不可制  
往見塔下城今作城中寺念茲遷者勞緬想陸沉勢  
煎鹽貴天產商賈操其利營屯事可尋海壩無寸棄  
載葦高于山寨河聊可偕偉哉漕海策詎以人粟戲  
探物從左脅途捷效亦異三折鑿乃良任事勵厥志

桃源

桃源避秦地今欲避桃源編里稱中邑墟烟只半存  
逋逃時作藪狐鼠忽稱尊水沈不絕舸陸馳無停轍  
鬻子給衙役啼借燒吹喧但聞事敲扑不聞訟煩冤  
非不訟煩冤譙譴難繫援屈指銅墨綬幾人終飛鸞  
昔布併里議蓋苦供億繁自非范大令誰能爲此言

遊鉢池山

潘采

字世珍  
熙臺子

枳殼花開風正香登臨纔至已斜陽古藤交樹浮疎  
影野水連雲泛遠光仙馭不來花自老遺踪猶在鳥  
空翔何時真隱依山麓明月清風任楚狂

景慧寺 在鉢池山

春服初成興頗宜  
蒼松綠竹訪顛師  
細烹丹井消塵  
訣旋採山花療客  
饑悟後機心渾已  
化覺來真性本  
無私蒲團一坐楓  
林晚滿院爐烟共  
六時

登金牛墩謁大司成沈十洲墓 丁堯生

湖上重遊往事遷  
水亭山閣尙依然  
柳絲不改當年  
綠花萼猶爭舊日  
妍松暝鶴歸初日  
下芷香燕掠晚  
風前十洲何必論  
三岳自是金牛有  
洞天

涇河放關

蔡翰臣 字良卿

秋水湯湯灌百川  
蓼汀蘋渚渺相連  
黍苗歷亂西風

裏鴻雁哀鳴落照前地闢龍門原赴壑隄穿蟻穴亦  
滔天何人爲砥中流柱碧海桑田總晏然

九日登巽閣絕頂

吳交泰

字徵道

振衣此地卽高臺竟日淹留覽勝回帆影曳雲隨鳥  
沒笛聲背水送鴻來醉凌海色千觴少雄夾天風雨  
腋開華髮不禁追往昔茱萸歲歲迥相摧

陸丞相

王典

字堯載號龍淮

宋家善養士收功在崖山正色立危朝血淚何斑斑  
精衛沉滄海招魂不可還明明燕市月相望無漸顏

淮陰少年行

淮陰少年爭叱詫，嗔目語難相凌駕。  
王孫佩劍空雄豪，俛首從之出胯下。  
君不見張祿先生既相秦，僅免綈袍一故人。  
又不見故李將軍，詔復起遂殺灞亭醉呵吏。  
王孫王楚錦衣歸，却召少年作中尉。吁嗟乎王孫六合羅胸中，舉目轉盼生長風。  
重瞳之子拔山雄，談笑遂收垓下功。  
何況里中數年少，忍爭得失羞雞虫。  
古廟無人守尸祝，四顧荒涼堪一哭。  
我揮長句弔王孫，正值淮陰春草萋萋綠。

題遠舉樓

虎節遙分聖主憂，海天蒼莽入危樓。  
東南財賦勞飛

輓西北邊陲控上遊萬片雲帆天際落一江春水檻  
前流輕裘雅望仍多暇浪說通漕有鄮侯

河隄工成

東注河淮萬里遙年年交漲亂南條莫言排決煩人  
力且喜平成壯聖朝白馬沉波吳練遠蒼龍蛻骨楚  
氛銷萬家烟火層城暮愛聽鄉人擊壤謠

雪後甘羅城對月

馮一蛟

字仲雨

荒城名字古曲曲抱河流英氣蜚千禩雄名付一邱  
栖鳥驚令月積雪凍行舟萬頃玻璃色微茫水上浮

北極莽同友人眺桃花營故處

極目桃花塢空餘名字留光陰誠過客人代亦浮漚  
繁促笙歌地蕭條蘆荻洲惟餘沙上鳥泛泛不知愁  
坐止高蔭下

邱度

字汝洪  
號震岡

五柳蔭長渠真成隱者居扶疎侵几席蔽芾滿庭除  
坐月傾醇醴臨風檢異書楊花偏入座點點襲人裾  
步止華門裏

烟霞足一邱門掩綠溪頭習懶便閑適委心任去留  
空庭無刺啄小徑足盤游不羨天衢上趁起謁五侯

龍興寺

沈

栢字夢  
實

暇日聊乘興來過支邇林欣看新駐錫却憶舊論心



香積分天食茶烟逗午陰談空忘坐久更喜益朋簪

重經射陽湖有感呈楊大令

揚名瑞雲  
鹽城令

憶昔曾爲湖上客湖天極目使人愁風濤浩渺魚龍  
臥葭葦蕭條鶴鶴游一自桑麻開沃壤幾多籬落接  
滄洲羨君千載平成績太史重書大有秋

晚入清江

張世才

字德夫  
號幼白

大河聊鼓棹風颯草蕭蕭雲淨風啣日沙明岸拍潮  
前邨漁火暗比屋市聲鶯漸喜松扉近鄉思半欲消  
集環碧軒放舟

里社衣冠總舊遊蔬盤長日共淹留中林未厭看山

興野浦遙從泛月舟撲坐水花香送竿開廉兔魄影  
橫鉤留歎試傍城隅好波色嵐光晚更幽

賈帶河成

湖水當時曲抱城河隄改築事多更漫言川后安瀾  
久且喜淮流繞郭清雉堞連雲瞻象緯虹橋跨壑走  
濤聲波廻岸轉舟如葉鄭國渠成百世名

冬日邀潘仲蔚諸丈泛舟郭家池

蘭橈尊酒坐滄浪雅道依稀古范張倒影四虛天更  
濶平沙一曲水偏長山圍雉堞寒烟白樹倚琳宮落  
葉黃如此追隨消寂寞風流那說珥貂行

泛萬柳池

落日殘雲白紵涼  
蒹葭汀浦未飛霜  
更憐十里芙蓉葉  
色待得紅霞闕晚粧

溪田卽事

潘蕃

字仲蔚  
熙臺孫

塲圃新依射水涯  
塵寰不隔老烟霞  
門前未種陶潛柳  
隴畔還栽邵子瓜  
辟地爲杭堪卒歲  
誅茅結屋可移家  
蕭條生計何須問  
老向漁樵願已奢

劉伶臺

糟邱怪底有高臺  
荷鍾曾經此地來  
身在百年渾是醉  
名留萬古復何哀  
清談晉代成塵土  
獨醒湘纍伴

草萊放達欲從臺下臥停杯潦倒愧非才

張禮部園亭看月

潘萇

字孟深  
熙臺孫

池上光芒夜色饒飛雲捲盡月華驕仙郎愛客開金  
谷窳女凌秋弄玉簫風滿尊罍荷氣入酒酣衣袖桂  
香飄長虹一望嬋娟靜不數揚州廿四橋

溪上書懷

潘苞

字敬竹  
熙臺孫

長嘯掀髯天地孤不妨姓字臥菰蒲閒門永日從羅  
雀濁酒荒村自挈壺澤畔飄飄憐白雪夢中消息笑  
青蚨遠心寂寞潭如水一片清溪是五湖

宿通源寺

張世和

字价夫

招提門外晚烟蒼信宿繩床更漏長法坐仰瞻金佛  
色禪燈靜對火珠光維摩有意飛花艷支遁多緣共  
食香便覺真詮于此得泠泠清夢到西方

鉢池山

張大程字九萬

王子求仙入此山九華鍊就謝人間月明如聽鸞笙  
響松老逸期鶴馭還緱嶺浮雲空渺渺鉢池流水自  
潺潺共言丹竈多遺餌肯與頽齡復駐顏

西湖艇

十里西湖一鏡懸扁舟幾葉破湖烟張帆影亂遠山  
色打槳聲驚沙鳥眠風透菱歌來別浦月明漁火鬧

前川問誰領畧清幽趣泛宅浮家卽是仙

遠心園懷古

張泰燭

字爾調

東北開通萬斛舟若人鱗集紙房頭築城改運成荒  
圃開地爲園得倚樓伍相祠聯水月寺射陽湖接菊  
花溝無邊隙蹟俱難問惟有聽鶉載酒遊

當聯城未築時地名紙房頭爲運船屯  
集處遠心園中有倚樓張儀部所構

倚樓懷趙承祐

趙嘏才華足自豪倚樓長笛遏雲高誰知千載成孤  
調空咽長淮捲暮濤滿目酒人推阮藉當時舊宅近  
枚臯爲君結構成高臥詞藻風流在彩毫

園居

張芝階

小室書連屋虛亭竹拂窓衝波魚兩兩鳴樹鳥雙雙  
世態看雲變雄心仗酒降花前呼秉燭留客倒銀缸

秋日登狀元樓

安

氏

芝階妻

聖主掄元過早奇鄉居時負蓼莪悲禦倭郭外成堅  
壁受謗朝中作係繫墓冷空埋長劍恨樓高尙憶苦  
吟時秋風吹徹長淮水父老懷恩淚暗垂

自註云樓爲沈祭酒坤讀書處  
祭酒禦倭保障淮人受誣而死

昭卹院拜楊尙書墓

潘叔明

字公生  
仲蔚子

一坏荒土障黃河芳草蒙茸此日過仰止不嫌芹藻

薄昭垂何用于孫多墓前孤樹人皆識院裏雙碑字  
未磨得似龍逢恩獨至應來笑聽賽神歌

韓侯有後

韓侯有後妄耶真海上今傳韋姓人萬里託孤書有  
淚千秋祚土鼎無塵朱虛侯起先鋌呂安樂公降竟  
續秦雄長一方仍世爵須知天不絕忠臣

杜康橋

橋圯名猶號杜康經過空憶瓮頭香長淮到處青帘  
颺新釀誰家是舊方

陸丞相祠

潘叔獻



尾蹕浮嶺海神州竟陸沉託孤只有死辱國更何心  
偉節垂天地芳聲冠古今匡山遺碣在徒使淚沾襟

遊鉢池山

高登瀛

字同升

鉢池芳蹟幾千秋飛去雙鳧何處求月映山巖微帶  
白雨餘松影更增幽荒烟深鎖丹臺寂片石珍傳寶  
字留此會山靈應有約會將笙鶴與同遊

湖心寺答劉洞初

劉一炷

字天燭

寺古器塵遠蒼茫別院深小橋橫白水夾道覆青陰  
鐘磬閒鷗性魚蝦侶道心與君欣聚首說法叩禪林

暮秋湖上

郭九有

字無若  
廟灣人

黃雲斷秋色，騁望極蕭條。大陸生殘照，平湖落暗潮。  
涼聲天外笛，寒意雨中樵。最是悲搖落，楓林葉正飄。

前題

廢閣幽涼色，孤峰入破櫺。烟銷蜃氣散，龍去海雲腥。  
屋覆藤陰古，畦留菜甲青。寂寥誰是伴，鷗鳥在沙汀。  
登望海樓

共上危樓縱遠觀，幾邨烟樹望中寬。潮吞暮雨龍吟壯，閣射晴嵐鳳翼搏。淡蕩波心雲似幕，輕盈水面月如丸。九年來蜃市浮東郭，十里春城錦作團。

遊靈慈宮

沈

森

字萃夫

水抱亭臺山抱樓淮干此是小瀛州長橋橫泛干林  
月曲徑深藏萬壑秋風遞荷香來几席日薰花氣上  
簾鉤憑闌一眺欲飛去鳳吹仙音何處求

三洲吟

張奕穎

字毅孫  
號九霞

極目望雲山桐柏渺難指仙人不可接但見長淮水  
長淮昔獨流澄清無纖滓奔湍過鹿原激蕩龜山趾  
渦濠既會合洪澤乃鎮耳三洲竟何在淮浦無乃是  
常武大雅章率彼復截彼鱗珠暨魚貢旅幣並琛矢  
想像屬斯洲羹民復棲止年代屢遷易沙崩岸常徙  
三洲遂瀾漫鐘鼓音何起惟有山陽灣險急六十里

避之鑿內河洪澤漸逼迤誰知九河堙南遷與淮通  
潰決何代無宣房築瓠子惜哉唐宋後濁流浩無紀  
與淮合清口淤沙日墊底見河不見淮但曰黃河矣  
鴻濛判二氣嶽瀆安常理涇渭各源流河淮異涯埃  
胡爲清濁淆良爲川后耻擊汰發長吟誰能復挽此

古東門行

我不知孰是古東門但見樵叟牧豎登高原云是唐  
將程君墳將軍昔陪葬至尊昭陵六馬嘶黃昏衣冠  
誰塋感私恩至今人說咬金墩位在震方宜爲門不  
知何故偏向東北隅邊蹲當時舳舻競來屯清淮竟

挾濁河奔東城之外但空村紫霄飄緲撐乾坤仙人  
駕鶴離崑崙蛟龍飛動靈詞歎至今盤螭碑尙存此  
地仙蹤辟凡塵日月雙丸互吐吞建城傳自東晉人  
代湮年遠復奚論東門故蹟久沈淪銀鑄依然手可  
捫

環碧堂與古水陸院隔一水是歐陽永叔遊賞  
處

虛堂浮遠碧隔岸對精藍楊柳風蟬靜芙蓉水鏡涵  
舊遊思永叔禪意冷瞿曇魚鳥親人久遺踪尙可探  
望雲門外夏古杏花邨

射水迎淮濱江流到郡門空多楊柳岸尙想杏花邨  
雨過明霞出烟連碧草繁滄桑無限意一望已消魂

櫻桃園

櫻桃猶發昔年紅春色芬芳古郡東花裏藏兵能退  
賊至今人說楚王功

金牛墩懷古

夏日瑚  
字敷公  
號塗山

蔓草連荒阜天高雁陣分邨翁談往蹟英主宿雄軍  
箭簇沙塲冷牛羊夕照臨最憐埋恨處祭酒只孤墳

恢台園成

傍水成幽築誅茅得草堂所期垂釣處儼似浣花莊

楊柳月初上，薜蘿風正涼。何能謝櫻冕，讀易濯滄浪。

遊鉢池山

張致中

字性符

勝地留仙蹟，探尋意不窮。古藤銘歲月，秘穴想鴻濛。  
雲只依巖靜，泉爭向壑通。恍來雙鳥影，引目注遙空。

登新城南樓

憑高舒遠眺，樓閣日嵯峨。海氣連天盡，湖光接郭多。  
中原仍戰伐，井邑但烟波。相顧無長計，啣杯一嘯歌。

望清口

黃河九折從天注，馮夸慙舞潛蛟。怒斗大孤城落日，  
黃野雲低抹迷荒戍。白蘋風急雁西飛，一望歸帆隔。

浦微村落幾家烟  
火寂東南民力剩  
魚磯

桃源道中

章華往事露痕消  
民瘼于今半楚腰  
路入靈城疑是晉  
溪沿泗水暗通潮  
却稀禾黍充爲賦  
賸有魚蝦採作苗  
欲問桃源何處好  
時艱草木盡蕭條

靈慈宮贈戴鍊師

張又顛

仙家樓閣倚層城  
碧殿朱欄映水明  
丹鼎烟消從鶴夢  
滄波雲起洽鷗盟  
春風竹籜冠裁就  
秋月松花酒釀成  
一醉長吟海仙曲  
空疑雲外步虛聲

坐張天聞倚樓

李天授

字杜若



捫竹踏蒼涼書聲在此處入林初來言古照揭真素  
坐久見新光返照疑初曙倚樓縱遐觀曠感矜所顧  
春風動羣植枳花吹滿路寒姿出青松高森足良晤

鉢池山遇雨

悵望仙人境芳風振古留忽來雙屐雨坐對一溪秋  
古寺荒寒入空林返照流隔山鐘磬落疎韻濕悠悠  
肇敏邀同荀伯青來儀仲家尊生遊雲水清環  
門掩山光靜灑然坐此臺何年井掩鶴此日墓封苔  
晚景侵林入湖聲挾雨來清襟同照處秋緒落深杯

湖心寺

秋入花宮潔禪心湖自知清池間獨坐願景澹何思  
木落通幽徑風香識遠籬坐觀烟水外瓢笠意遲遲

檀度菴

萬木靜僧關空天坦步間燈搖雲外塔梵動月中山  
孤鶴神何遠幽花意自閒夜深羣籟發秋與鳥聲還

懷母

八首之一

沃起龍

字荀伯

遊子迢遙日惹幃分寸陰舉頭淮海日入耳故園礎  
孫繞彈棋席兒牽念佛心功名蕉鹿夢負罪一何深  
九日同扶季南郊坐雨憶弟儀仲清江

自從離亂別新城佳節何曾聚弟兄此地茱萸相對

飲清江風雨不勝情

宴花樓和趙渭南韻

卞爲豹

春橫樓外剡溪船客到仍開花裏筵萬堞雉烟浮海  
日三洲龍氣護淮天重膺白雪枚公後不負青山謝  
宅邊長笛一聲芳草發却教吹暖綠年年

紫霄宮

石可璽

字泥浦  
號石文

瓦殿孤城下連宵落照遲井垣懷古昔松檜肅威儀  
湍瀉蒼龍伏房青鬼火吹凌烟三尺土風鳥拜殘碑  
舞陽令潘若稚同男孟觀死節

雪埋烽火角聲殘魂魄猶依洛水寒月落千山夜臺

冷家山有夢不曾還

奸徒內應豎降旗思遠羞爲社稷人  
道是忠還是孝汗青共羨武侯兒

舌斷常山白日斜空教明月冷齋衙  
燕臺六月猶飛雪春到河陽不敢花

司農有印佩軍門城社雖墟氣已吞  
到處血腥迷夜火萬家風雨哭黃昏

一蒲菴納涼

閻修齡

字再彭

到此離城郭紅蓮小徑長香蔬烹豆莢  
新水試茶槍幾日怪風雨誰人足稻梁  
一匙常愧飽散髮話羲皇

郊行有感

春日潛行古渡頭，携尊何地足淹留。  
眼前花柳渾閒事，野鳥空山獨喚愁。

贈馬仁以

咸默字大咸

未晤煩君屢訪深，斯情聚處表名林。  
危樓風雨春初意，古屋梅花雪後心。  
石火山茶言入夜，新書古韻紀于今。  
澹然城郭無同異，楚水吳城見好音。

壬午六月，抑齋相公舟次淮干，擬上行部，不果。

十章之四抑齋周延儒也

沈傳字孔

雲翔綵鷁喧吳楚，郡郡爭先負努勞。  
群牧祗今資兩

露莫將霜斧易干旌

害氣中州淑景更燕齊白骨野縱橫淮南此日風光  
好戒爾行旌緩緩行

縱橫島嶼罷遠營黃蘗孤懸右北平異日封疆千古  
恨將軍奇策但銷兵

宏羊起舞夜無眠取次徵書下九天藏血若堪皆化  
碧大荒何地不金錢

碩項清波

王啟運

安東人

西枕桑墟東接河烟波深處起漁歌蘆花夢熟霜前  
雁苻帶青翻雨後鵝脣落湖灘收白小稻肥秋井開

蒲螺口錢塞賦千家急民業如今仰鈞裴

法華樓雨

胡從中

字師虞  
號天放

陰晦連昏旦倚樓醉眼酖河流  
袁浦盡雲宿鉢池多  
秋鳥還叢薄清鐘出薜蘿  
經心風雨過兀坐莫高歌

人日集茶坡草堂

節驚人日至忽忽數東皇  
此日何能改論人半已荒  
新雲低戶黯舊草倚年芳  
莫訝乾坤別春盤列草堂

招隱亭

古人杳難接姓字寄琳宮  
日落神仙遠花分杖衲紅  
陳玉叔守淮安招山人郭次甫來遂以杖  
鳴琴懷晚  
衲等事懸此亭王鳳洲兄弟嘗往來焉

節采藥挹真風雲樹西湖末高天滄海同

登七星樓

清秋憲府登臨地峻閣凌雲駕海鼇金榜直通南極  
迥玉憲低瞰北辰高背天鶚去橫霄漢遵渚鴻飛快  
羽毛只爲閭閻樂士大夫那惜翦蓬蒿

失題

朱日升字君旭

天高木落起憂思秋士悲歌正此時未敢言兮公子  
逝竊相傷者美人遲井中遺史生無愧河上長呼死  
不移何處靈均尋舊蹟臨風三嘆薦江蘼

春日構屋

張應錫字兼庵



茅廬久不葺相習數年間風雨留佳客妻孥失好顏  
著書存已見借地作深山莫道同虞仲殷民自古頑

安東春懷

今生何足幸白髮旅懷多客舍經三月吾家隔兩河  
寒水饑鳥啄春樹野雲過兵氣消南國歸心託放歌

夏日山莊懷安東朱隱士

田間四五月亦足慰蹉跎鳥啄殘桑椹風搖新芰荷  
邨童知事少麥飯適饑多不禁懷高蹈飄零隔大河

登燉煌塔望洪澤諸湖

在治中西門內

城西古塔晉僧留肯用人扶到上頭絕頂方知俯鳥

背遙空聊爾寄神遊天根泊水經多劫客子乘風正  
晚秋屈指年來多白髮危欄倚遍發長謳

月夜

孫棨

字東漸  
鹽城人

一月橫天滿秋聲飲夜林有懷千世造獨立五更深  
耳目寒于水山河重欲沉載歌屢復旦望古一沾襟

冬至詠懷

三首  
之一

張養重

字斗瞻  
號虞山

西北有浮雲飛來幾千里仰首一問之曾渡江淮水  
江淮我故鄉高塚纍纍起冬至修明禋風俗薦甘旨  
漂泊尙他鄉我獨非人子

蔣節女

蔣許字高漢思姪未嫁高珩孫誓不改  
嫁皆女同時皆崇禎初年事余故並稱

宋末多遺民未仕持高節吾鄉龔翠巖錚錚古先哲  
綿邈四百年淮水流嗚咽此義激深閨柔腸化堅鐵  
蔣女字高郎及笄禱未結高死矢靡他凝淚迸紅血  
貧窮志弗移春秋祀無缺青閨秉幽貞孤燈照冰雪  
咎女適同時傷哉淮隄決蕭郎婚未成溺死尤痛絕  
情義禮之變兩女能昭揭迄今共白頭艱辛經百折  
未嫁與未仕千秋相映澈此風與長淮涓涓永不竭

九月十一日紀事

霜風覆城天欲曉冷冷月照河邊草一聲雁過將軍

營四面吹角秋心老  
孟浪崔苻無賴兒  
揭竿競起淮陰道  
深入嚴城學跳梁  
荆軻弗密舞陽小  
短兵巷戰黃塵昏  
可憐血刃糜肝腦  
事既不成死無名  
空餘腐肉飽烏鳥

漣水夜歸

殘水留寒月宵征路正長  
人迷黃葉渡馬縮白橋霜  
野衲隨鐘起田夫喚犢忙  
河流聲不遠夜半更蒼茫

登龍光閣

閣爲崇禎時朱未孩中丞建

危樓面面玉玲瓏  
俯矚層城氣概雄  
萬堞參差迷近遠  
兩河噴盪失西東  
誰家砧響涼風外  
有客帆飛落

葉中我記閣成猶弱冠前賢高宴坐晴空

何烈女墓

苔滿殘碑草滿邱尙傳何女重千秋風塵誤落身名  
潔時代雖遷祀典留萬死芳魂歸白刃一生烈氣斷  
青樓謾誇此地饒歌舞盡化寒烟傍水流

携家歸白馬湖

背郭呼船到草亭孤帆一路柳青青自憐子美貧兼  
亂殊似淵明影荅形到處有情尋釣舫何人相伴看  
春星歸來只覓山中酒痛飲無煩誦楚經

漣水道中

水落黃河欲降霜奔湍萬里勢蒼茫人烟過眼先紅  
葉客路催行半夕陽大野晴雲飛海鶴西風秋草伏  
天狼短衣匹馬投村店豆粥孤燈共一床

再彭城西放舟

水綠城邊放野航一尊新酒麥秋涼  
揀花風起魚苗細芹菜泥融燕嘴香  
憑弔西臨杖里近悲歌南上釣臺荒  
祇今擊楫中流處三十年前見插秧

登劉伶臺

河上荒臺草亂青登臺披草問劉伶  
如何我亦埋名客沽酒無錢只獨醒

淮陰侯釣臺歌

張璵若

字伯玉

吁嗟乎天意真可疑韓侯功高三族夸拒通拒涉矢  
天日兵權旣去反何爲家人告變安知實欲加之罪  
寧無辭後賢諒稱不叛劉紫陽綱目嗣春秋會陳書  
執楚王信繼書后殺淮陰侯不以反書不去爵推明  
心迹剛厥幽呂雉殘忍赤人族國王呂氏生翻覆詎  
知身死肉未寒家無少長駢就戮志載軼事韓公雍  
當年治兵粵西東粵有洞長諸韋氏表稱原是韓侯  
宗昔當夸族中尉過竊侯幼子投蕭何丞相私給漢  
圖記渡江寓書越王佗改封韋氏長諸蠻蕭書佗册

今班班天意從來不可測天道從來多好還君不見  
漢室江山安在哉淮陰至今有釣臺

懷漣水王子鵠

宋曹

字份臣  
鹽城人

襄賁一水論交地隔歲音書曩亦稀笛裏懷人思不  
盡春深作客夢先歸生平誼重留雲子江海愁分老  
布衣爲念幽居高士在衡門咫尺共相依

陸丞相

王翼武

字文儵  
鹽城人

臣子何爲殉君死或存或亡聽之耳不知此是婦寺  
忠相公大義寧同此肯以孺子待吾君啣璧稱臣真  
足耻徽欽北狩竟何如德祐皇帝再悞矣完顏不屈



奇渥溫雉經蔡州猶爾爾何況大宗異亡金豈宜三  
有降天子請君負在微臣背君臣都俞赴海水以濤  
爲郁魚爲棺不使元臣得髮齒嗚呼徧觀古忠臣忠  
臣之忠完一已疇似相公善事君成君以義壽青史  
君有臣兮祖有孫亡國雖悲仍足喜

丹鳳臺

吳

璜

字姬望

傳聞王子喬或云淮王焉淮王王子後王子淮王前  
神仙亦淡漠不必問何年此山結太古混茫盤古先  
靈氣給寰宇洪濛幾黠烟五丁無巨斧神工作未全  
粗者及仙佛精者蘊聖賢河圖久未出鳳乃鳴其巔

酒酒鳳化雞雞鳳誰媼妍難化不以時神丹亦枉然  
小物何足惜昭昭臺畔泉長夕此中味可以樂便便

節孝先生祠

吳

珊

字嵩三

淮流浩浩來其水清且泚千古成一人萬年成一子  
徐君鍾靈異篤生在斯里緬彼遇石心念父無生死  
尋常忠孝事今古稱絕軌誰爲空桑人相望潁不泚

河道難

君不見淮水湯湯下東海千年故道分明在又不見  
黃河之水歸渤海一消一滴禹功成二水分流安瀾  
久滄桑幾度河東走崑崙直下纂桐柏奪我淮流主

人宅主客相爭迄不寧沙停海岸高如城以此二水  
戰心腹淮流潰南黃潰北鯨鯢入市鼯鼯奔沙鴨一  
去歸無門行人過此輒嘆息昔日桑麻何處却

冬日集一草亭時茶坡歸自天都虞山歸自瓊  
海天章歸自萊陽賦三遠人詩

臘月春風入人歸此一堂各言山海事共盡百年觴  
松柏無凋節圖書有靜香歲寒閑聚首留得幾徒狂  
雪舫至淮

霜落淮南更此遊王孫執手釣臺秋窮交老盡風塵  
隔客路饑驅日月流冀北馬空無駿骨海東家在有

漁舟懷人萬里憑樽酒短鬢蕭蕭爲白頭

歲暮安東逢張兼菴

連水西頭白日曛水堅十日恰逢君相隨惟有霜天  
雁夜夜孤飛逐海雲

風打窓檣雪濺花有家歸去羨無家長廊睽背僧寮  
好日影曛曛誦法華

桐園

邱象觀  
字彙川

秦鹿初奔逸桃源安得避梧陰鳥雀幽松子天風媚  
世事盡干戈道人獨酣睡方瞳檢藥書慎爾朱門刺

柘塘述懷

李挺蒼  
字升菴

幽居足素願自覺市城疎俯仰此天地寒溫只草廬  
園蔬因客剪酒秫倩人鋤竟日宜匡坐還觀種植書

前題

結茅成小隱樂志憇湖濱雞犬懽新節林臯愛早春  
晝天長若古水意澹於人綠野堪怡悅悠然脫角巾

登宴花樓和皇甫茂政韻

潘尊乾

蒼蒼野色盡高樓坐對雲霞天際頭浩渺長淮紋似  
織蕭疎平遠淡疑秋摘星應奮千霄志憑檻還添望  
遠憂聞道八公多勝賞飄然羽翰欲相求

里中馮孝婦割肝

方能權

字翼若

正氣蟠霄不可摧，寒雲裂碎天門開。  
捫腹拈刀尋腠理，血凝滿地臙脂紫。  
吞聲躑躅截水齒，鐵腸孤峙銛如矢。  
丁甲環呼驚又喜，露冷星芒風颯起。  
嗟乎男子肝似紙，馮婦之孝傳青史。

國朝

新城潘府

陳台孫

字階六

憶昔淮南幕府開，連雲蔽戟倭雄才。  
三軍鼓角城邊靜，千艦旌旗海上迴。  
茂草空庭喧燕雀，黃河舊壘鬱風雷。  
踟躕爲望梅花嶺，丞相祠堂萬古哀。

七夕集一草亭

嵇宗孟

字子震安東人

秋色澗柴荆天高起鶴聲入門人岸岸留客坐清清  
織月遲雲軫幽篁響夜笙居平憎謬巧未肯乞時名  
九日尊經閣登高

涼風澹四野悵望龍山陰采采晚秋色悠悠初雁心  
丹梯真宰近白酒故人臨莫怨茱萸少投簪已到今

墨池飛霧

連水景八首之一

五馬神仙愛學書襍頭親滌玉蟾蜍寒烟觸石乞新  
雨春雁窺人下太虛梅市一燈虛畫舫官齋兩字號  
顛盧揮毫曾念眉山否頓悟當年髯卽子

黃河再永

十二月十八日

湯調鼎

字右君清河人

河水四十日淮民苦百狀望流如望年臨河但惆悵  
望日忽解堅渡口喧濁浪小艤各生涯行人賀休暢  
元冥一夜風萬木皆東向凌晨限南北客愁如送葬  
君子念陽微國人嘆陰壯積寒勢使然春風鮮駘宕  
安知狂瀾久天不爲之障或者蜃氣張河靈示懲創  
曠哉四時情春榮合凋喪如彼直道早回邪與之抗  
寒暄關至理人事代衰旺且須緩旬日土牛迎彩仗  
會當青陽回暖日遲遲上白波起臥龍帆檣開列嶂  
萬物轉生面天心惠嘉貺傾否固有時褊情焉可量

惠濟祠



橫河編石砥長鯨香火崇臺列繡楹南狩宮車雲日  
麗內頒宸翰斗牛平春漕庾廩通吳會秋轉余皇出  
漢京一鎮兩河殿鎖鑰至今靈鷲接蓬瀛

漂母祠

靳應昇  
字璧星  
號茶坡

老嫗何許人漂於淮之滸一飯哀王孫高義空千古  
婦人眼猶青可笑重瞳瞽

聽楊懷玉太常彈琴

哀怨竟何事無人知此音雙親萬里淚故主百年心  
白日飛寒雨浮雲掩夕陰憂來誰可訴客坐聽難任

平河帆渡

迎門流水見行舟千里關河盡客遊人聽鷄聲晨棹  
發日烘鴉背晚帆收風波習慣會無厭湖海爲家各  
有求獨是蒲團趺坐者一瓢猶伴水田鷗

坐鷓巢望飲牛草堂懷張虞山川麥漣東

記得春深柳葉稠湖濱約共此扁舟饑來斗麥驅人  
去客到雙柑空爾留鳧渚風帆烟外遠草堂雲樹雨  
中收山齋夜夜餘詩話只爲懷人起暮愁

重九雨中坐倪天章一草亭

一天風雨當重九欲步高臺舉足難雲外客來雙履  
濕坐邊花發幾枝寒不煩出戶謀沽酒且與吟詩共

倚欄最愛主人能好事草堂秋興正漫漫

和先哲龔聖予自題畫馬原韻

輕蹄瘦骨踏重關逐電追風列上閑  
四百軍州人盡散誰騎丞相到匡山

重過節孝先生祠

張新標

字鞠存

古祠枕荒邱俎豆亦云久至孝感風雷大節光靡畝  
逮吾先哲人表章稱尙友

先大王父刻先生語錄先父曾經理其祠

遺像

列崇階高碑峙左右歲時伏臘辰肅禮徧童叟庶使  
人心淳再致風俗厚今我適東郊四顧復何有啄食  
烏雀喧營窟狐兔守此地古北邙寸壤爭休咎未知

數年間尙有遺踪否中古禮樂衰風厲甚毋苟締造  
存典型願隨采風後

招隱亭卽事

吾廬一水隔問渡卽花宮石井苔猶碧丹爐火欲紅  
荷香常帶雨竹蔭自生風揮塵來高唱元言未許同

歸夢

夢繞青山舊愁添白髮新無才安宦拙有道合家貧  
別業留丹竈荒臺檢釣綸故園招隱處應憶欲歸人

春日村居

一水當門曲刺天柳色黃風和迎蛺蝶溪煖浴鴛鴦

種稻疏泉脉等僧上野航前村謹社飲人影動南塘

鉢池山

丁大來

鉢池翳蘭若王子昔盤桓鶴向滄溟去松留白日寒  
浮生看過鳥下士笑還丹長眺烟雲際何當振羽翰

洪澤湖

何年洪澤鎮高下匯成湖水濶青山小天空白日孤  
征帆終一去歸雁且羣呼陵寢前朝近淒涼風雨徂

東卞友龍

劉芳聲

字何實

幽居雖不遠契濶已兼旬寒竹瘦如鶴老梅孤似人  
苦吟雙鬢短拙守一身貧爲報南州客溪山早晚春

園居

風雨荒苔砌蕭然對野禽嘯歌今日事湖海故人心  
繫艇通漁浦開軒滿竹林客來常岸幘橫几有鳴琴

癸巳九日集卞友龍聽秋閣

張而闇

字遠子

小閣城南烟樹迷板橋咫尺浣花溪十年閑放人厨  
顧九日登臨客阮嵇一雁橫天秋水澗片帆歸浦夕  
陽低移樽更盡茱萸與月落霜寒烏夜啼

射陽湖

潘取臨

字大也

河源渺何處已來滄海東浮雲橫雁路叢葦逼蛟宮  
帆挂千家雨濤生一枕風舟人話疇昔塵滿射湖中

夜抵小莊

匹馬入蒼翠，征途戀夕暉。  
寒城半林月，孤戍滿溪雲。  
夜發驚虬吠，餓驅逐雁羣。  
寸心猶自慰，擬與宦遊分。

百詩齋中分賦得劍雀瓦磬

劉

理

字赴宗

零落漳臺瓦，淒涼韻玉清。  
西陵誰望幸，東序偶同聲。  
匪石心如轉，兼金價似輕。  
霸圖銷歇盡，此物獨硜硜。

謁節孝先生祠

陸求可

字咸一

天生至性人，歛跡守寒素。  
閉門有餘歡，念茲生我故。  
長懷嘉遜心，聊慰生平慕。  
晨昏事非一，區勉從所務。  
人生於華盛，庸行實多誤。  
先生樂庭幃，鳳鸞戢修羽。

孝德致休徵連理並甘露舉世重芳規千載成獨步

坐秋

箕踞清光裏塵心盡欲刪砧聲何處急秋色向人間  
霜落初聞雁雲歸不辨山我家烟水外未識幾時還

秋晚訪徐動盈

讀易疎簾下斜陽半在山偶然相對酌可以寄餘閒  
暮色歸鴉外秋聲落葉間一樽傾未盡片月挂柴關

鉢池山

邱象升

字暉  
戒

勝地尋仙跡徘徊夕照殘鶴聲何處下洞府幾時寒  
河決迷丹竈臺傾落碧灘共憐山氣盡猶作十洲看



與劉水心西軒夜坐

偶共西軒坐天高月正明  
空階寒露重叢樹暝烟輕  
夜靜孤襟遠人閑衆籟清  
論心竟忘寐銀漢影斜橫

舟阻平橋再還省母

幾日開官舫遲迴只半程  
却因歸省易倍覺遠遊輕  
霜草長堤白河水淺壑明  
衝寒三十里樹樹哺鴉鳴

送舍弟季貞南歸

何事催南棹倚閤望正賒  
兩歸翻似別予客轉如家  
水疾檣烏穩風輕海燕斜  
登樓迺縱目惟恨暮山遮

宿淨土菴

惆悵城西寺何爲駐道征月殘僧梵靜風定佛燈明  
尙作還家夢逾增倦客情竹樓眠未穩杖上已鐘聲  
秋日陸咸一招泛郭家池

蕭然簾閣俯池幽招客偏宜坐素秋蔬圃霜殘留戲  
蝶芰塘風急起眠鷗魚骨斜傍疎籬挂酒舫輕墮落  
葉浮蕩漾不知城日隱梵林暮鼓出中洲

漂母祠

一飯於人豈足言英雄知己最難諉當年不有酬金  
事漂母何由此日存

聞鶴賦

卞爲鯨

字友龍

詔下五雲端窮簷萬國歡恩非由汲黯譴不及倪寬  
酷吏威將殺流民骨未殘春陵行可哭聞此輟妻酸  
宿湖心寺

帶月來投宿迷禪歷上方旛風心不動花雨夢猶香  
破壁洒虛白疎籬振落黃山城多戍鼓清夜助悲涼

漂母祠

老嫗眼能別英雄淚可收卽令仍望報美顏尙堪俟

開元寺

徐轉迅  
字勤盈

心澄是止水意淡卽空山寺僻烟霞古僧貧歲月閑

湖心寺

偶來湖上扣松關，獨向空林自往還。  
我愛山僧無一事，蒲團常對落花閑。

寓放生池

沈漢  
字天河  
鹽城人

自開山房捫野蘿，閑來帶髮有僧過。  
花從着雨垂枝滿，木既經秋脫葉多。  
千頃碧雲飛遠岫，一潭明月浸澄波。  
久耽幽寂成迂癖，烏亦留人戀樹歌。

晚泊韓侯釣臺

柳餘金線月沉鈎，四百炎精一釣邱。  
古碣斷文苔蘚臥，沙明夜夜泊漁舟。

讀沈烈女傳

孫一致  
字惟一  
鹽城人

沈家孀母

沈君桐峯妻王氏

抱完節膝下有女性尤烈婉婉

時嫻內則篇列女之傳都曉徹父存曾爲女相攸笄  
年許字書生薛書生不祿忽云亡女問訃至心摧裂  
避人飲淚只吞聲處子難向慈幃說從容就義殉綱  
常怡然引繩自裁決夜臺有日照肝腸凜凜正氣飛  
霜雪山或齋崩泉或竭烈女精誠永不滅

### 夏大水

田家力盡苦乘春入夏無端水患頻河上六年悲  
子淮南七邑赴波臣繪圖縱抗監門疏發粟誰憐  
婦  
詔人時總督麻公去位時論惜之此後不惟農業棄漁樵何地更

容身

丙辰大水

不盡洪濤八月初流民滿地哭無居室廬野日空歸  
燕禾黍秋風只飯魚蠲恤幾曾虧 國計轉輸猶自  
急軍儲戰餘那得謀生聚大有頻登太史書

貞女歌

爲高家  
未婚婦

閻若琛

字紫  
琳

淮海山之陽有衛曰大河蔣侯稱世胄生女如曹娥  
十歲能紡織終日機與梭十三身端好高門尋斧柯  
一語當親意承言兩姓和天不弔清白壻也嬰宿疴  
父死亦已久孀母相撫摩母爲宗祧慮迎婚恐蹉跎

未能待吉日見身奄逝波吁嗟掌珠墜天道竟何如  
女聞告父母欲語淚滂沱身是高家婦分當一相過  
荆釵與裙布常服見阿婆阿婆牽衣泣見亡悞汝多  
歛衽重致謝妾心不可磨歸家妝飾變無復湘裙拖  
家本勳舊族賣珠事牽蘿于今三十載亮節尙崔巍

送虞山南歸

朝來仲蔚賦歸歎襖被蕭蕭任卷舒千里夢魂迷蔣  
徑兩年心事繫潘輿烟消綠樹啼鶯後沙漲黃河放  
鷁初雙眼望穿淮浦月踏歌相送意何如、

洪澤漁歌

湯渡

字聖昭  
清河人

魏武當年此置屯，如今漁戶長兒孫。  
三秋水縮層成市，五月湖深鱸滿邨。  
中酒不妨眠荻浦，和歌何必鼓雍門。  
一舟蕩漾蓑衣老，不聽驚林五夜猿。

漂母祠

程涑字維東

王孫一飯恩，廟食光千載。  
漢室有陵園，荒烟臥土壘。

高漢思移居柘塘

李時震字恂菴

爲愛山林好，因將城市疎。  
懷人留麗句，遯迹寄新廬。  
波靜欣垂釣，雲深樂荷鋤。  
悠然何所繫，日對古人書。

漂母祠

憐才老嫗愧鬚眉，千古名留一片碑。  
贏得扁舟來往



容長廊粉壁遍題詩

讀漢陽府志恭頌外叔祖大叅邱公

李

鎧

字公  
凱

自昔苛政猛如虎天下蒼生日荼苦怪爾俗吏不師  
古坐視凋瘵竟何補讀史細將循吏數前有杜母後  
名父接跡者誰吾外祖當時通籍振寰宇督兵四鎮  
莫敢侮城危六合復寧處仁心爲質仁言溥金陵十  
庫目不睹獨存圖籍歸 天府改官白雲歷年五剪  
除大猶如腐鼠將擢西臺讒言沮一麾出守漢江滌  
烽燧四郊書馳羽公曰舍我其誰撫神相神誅對神

語炯炯此心神所許十年疑獄亂如縷一夕得白帝  
天所還將獄詞付燃炬恐滋尙鬼惑斯土有僧宣言  
誑三楚其徒數百紛飛盡男提女挈官負弩謁公公  
立收空國妖髡燭骸膏霜斧排斥異端何其武其他  
軼事難悉數有惡必鋤善必補蕭然解舍同逆旅蝦  
菜不具塵生益平生志不在華臚吁嗟薄俗官爲賈  
不識田間替榛莽安得灑公舊膏雨令我寰中各安  
堵

秋日雜詩

萬里滯播川客心久躊躇秋杪故鄉人傳我雙鯉魚

開緘驚喜集讀罷轉愁余初夏河伯驕洪濤沒田廬  
近乃寒宜房十室九空虛遙念伯與仲宿昔事詩書  
耕鑿旣不効擔石安能儲霜寒豈不同卒歲竟何如

前題

銀漢河耿耿攬衣步修廊徘徊見明月展轉思舊鄉  
兄弟皆白頭一別安能忘仰慚雲中雁振翼雙南翔

與四兄話鄉園事

鄉園歸未得風俗近何如儉歲還輸賦家貧恐廢書  
休誇枚叔里且講白公渠賴此安耕鑿吾生樂有餘

前題

多財良足患長物固應稀宦蹟曾何効家聲庶不違  
止須栽藥圃終返釣魚磯少小安貧約他時好共依  
有述侍御吉父公往事者詠之

歸耕已分老田間推轂何心又出山國士感恩無以  
報陳言聊復當街環

在廷亦念

帝憂勤未及聶公最軼群猶記歲除詢疾苦牛車千里  
雪紛紛

三輔凶荒不忍看萬人流冗繪圖難廟堂西顧憂方  
大咨爾山中舊諫官

督糧原是脂膏地，幾見清貧似使君。  
性不解食非釣譽，一生溫飽在三軍。

蒿目民艱結寸心，未殫開濟病侵尋。  
可憐星落關中後，野老吞聲直至今。

心傷衆母合崩摧，制府何緣哭盡哀。  
熟睹廉貞亦心折，蓋棺應悔舊嫌猜。

漂母祠

汪灝字素臣

河干老嫗辨英雄，楚漢遙分一釣中。  
何事鬚眉偏不識，却教千古笑重瞳。

巋然廟貌楚城隈，猶傍無雙國士臺。  
成敗緣何由兩

婦至今長樂使人哀

莊居

朱士全

字君完  
桃源人

流水斜陽下孤邨萬樹攢溪容霜後淡蛩語月中寒  
秣熟堪爲酒庭餘可種蘭憑高舒望眼秋滿荻花灘

送張鞠存

邱

眺  
字子高

萬里分今日揮杯語夜闌病羸還送客盤錯勉爲官  
酒渡黃河薄舟臨衛水寒相思應有夢關塞路漫漫

送郭無尙歸廟灣

遲迴不可別對酒忽高歌宇宙奔戎馬浮生寄薜蘿  
危橋過雨滑敗葉積霜多萬里秋來雁蕭蕭東渡河

上元

幕府烟花照夜分  
府中蕭管市中聞  
豪遊空憶三年  
夢月落西城人未醺

過淮陰侯祠

劉漢中  
字勃安

人傑起淮陰  
項嬴成裂瓦  
身後留荒祠  
何有椒漿瀉  
冕服觀健兒  
庭楹嬉繫馬  
誰爲王孫哀  
埽除將簪把  
上巳同諸友  
坐紫霄宮

城隅晴麗踏青莎  
道院蘭芳適興過  
靜許古琴橫几  
對香隨佳茗  
人既多不須曲水謀  
修禊却羨臨池可  
換鷺方外渾然忘  
坐久隣園新月挂  
藤蘿

過周蘭墩都督舊第

荒畦蕨蔓故侯家不是東陵舊種瓜  
惆悵少年經歷處空餘高樹晚啼鴉

陸公祠

潘聲冠

根斷泉源誰力爭孤臣飲恨獨論兵  
中興未遂先皇志再造仍寒幼主盟  
海泣魚龍舟倏覆山來風雨鼎旋傾  
身埋怒浪心難死想見胥潮尙未平

洪澤湖中

劉謙吉

始旦開洪澤旭日生微煦魚龍靜  
波濤空濶無一羽鬚眉明鏡中  
歷歷皆可數當其恣狂湖百怪猙獰舞



駭浪高于天萬石搜之腐雖有長年者撐突亦戰股  
高臥過安流竟省篙與櫂烟際浮遠空遙曠與終古

留別淮陰

小住爲佳耳胡然別緒添及春鰓項縮到席蟒臍尖  
雅會何由得征懷可自嫌平橋分纜去回首幾家帘

春日草堂集諸父執

先子茶爐雅事稀累年追舊款晴扉邨烟遶屋梅花  
亂春夜堆盤韭葉肥移席小山人未倦論詩滿座興  
遙飛韶光今日佳無比散策欹巾緩緩歸

遊鉢池

湖光西望鉢池山，隔浦沙鷗出沒間。  
林影至今仙跡在，一輪明月最清閑。

春興集早發

王兆熊

字沂菴

曉起華星沒，天空一雁過。  
荒邨留客少，老樹着霜多。  
面染風塵色，裝輕楊柳坡。  
迴思耕釣處，風月冷烟蘿。

田園漫興

未遂澄清志，歸來學把犁。  
絲疇鮮馬跡，青草遍牛蹄。  
日落長堤沒，雲深古木低。  
樵歌何處起，短笛夕陽西。

前題

風塵悲按劍，感慨向岩阿。  
歲晚餘松柏，天空老薜蘿。

山花迎杖遠邨酒挂旗多惆悵烟霞客躬耕意若何

春日過八蜡廟

精廬春自好徐步入方塘溪柳勻新綠瓶梅綻暖黃  
雲低栖野寺竹影瘦匡牀徙倚經壇晚清風度夕陽

八月之西莊觀穫

潘夏字西河

秋雨暮來歸西溪幾已促蝗飛侵我禾潦深蕩我菽  
稍有蝗餘穰更沉流潦曲督我百里道驅我風雨出  
豈不懷佳夕未能盈十斛所重父母遺聊以為餽粥

清河道上懸涼

馬駿字西燕

空邨浮淺漲百里盡飛烟異縣秋同潦孤城晚進解

春農遲有誤冷雨落無邊倦客曾無故悲生八月天  
射陽城下懷古

風俗耕魚重人今苦贍生海天纔罷戰井邑屢移兵  
地接厓山路祠留陸相名秋船城下過懷古意凄清  
九日郡樓同茶坡動盃作

髣髴龍山看遠天晴空一雁去無邊背城野色貧家  
菊著樹寒光破屋烟耆舊幾人猶地主干戈百戰此  
山川年來無恙同遊客酣酒堪爭李謫仙

歲杪與友人登龍光閣

驢背歸來已夕陽俯巡閣道野天荒滿湖冰雪寒飛

白四野沙塵晚射黃財賦東南留巨鎮郊壇今古在  
高岡雲烟過眼成千載得與吾徒清嘯長

過漁莊

閻若璩

字百詩

夾岸水紅花舟行逐港斜漸無人識處祇有網爲家  
溪上涓涓月潮平片片霞願言秋賽近酌酒賀桑麻  
東湖泛舟過石霞舉紫嵐兄弟

野水初無岸人從樹杪行萍開綠粲動鳧散值舟橫  
未厭身飄泊還憐爾弟兄廣陵濤正壯八月賦南征

淮陰侯祠

阮

晉

字鶴

雲連淮陰城波撼淮陰道淮陰有荒祠淮流常浩浩

豐碑旣已殘松楸亦已老  
緬彼匪綸人勲業爛蒼昊  
指顧三齊定轉盼群雄掃  
何以功成後此身竟不保  
男兒覓封侯誰知把釣好

趙忠烈祠

皇祐兵戈事已休  
何人更說趙康州  
捐軀自屬君臣分  
攀櫬如聞父老愁  
姓字輝煌垂簡冊  
蘋蘩寂寞冷松楸  
天心到處憐忠孝  
寸草孤兒一線留

陸公祠

先生節烈有誰攀  
只許文山與疊山  
浩氣自留雲漢表  
孤魂應在雪濤間  
庭荒碧草青風冷  
門暗金鋪白

畫閣一望威儀神凜凜千秋展拜泪潸潸

千金亭懷古

周

麟

字喬嶽

持竿空日日王孫事可哀英雄未得志一飯亦艱哉  
漂母敦大德終始意無猜人生尙恩義千金等塵埃  
如何重報日惡少狠同來

劉伶臺

荷鍾竟何處荒臺異地懸邨墟餘落日禾黍散秋烟  
四海家同在人生醉亦傳獨憐名利客不溯竹林賢  
遊湖心寺

蕭寺鎮湖曲垂楊隔岸分遠烟明似水高隴碧於雲

雀啣迎人語荷香吹面醺閑來携手處白日靜紛紜

萬柳池晚眺

戴時遴

字郁山

白蘋秋水近柴荆薄暮閑穿柳岸行雉堞烟中過帆  
影仙樓雲外落棋聲人歸遠浦傳菱唱魚躍清波引  
釣情如此風光堪寄傲何緣愁恨似虞卿

洪澤阻風

吳鉅

字任斯清河人

極目蒼茫浪拍天維舟柁杙淺沙邊桑田萬頃今何  
在蔓草蘆花冷暮烟

遊湖心寺

王世卿

字克教

長湖偶泛載詩船爲訪山僧落照邊徑轉松陰環古



寺樓叅樹杪接諸天燈明法座心俱徹雲冷禪關境  
自予回首漸聞清磬遠一灣新月帶寒烟

早春憶止園

杜首昌

字湘草

名園正放及時花屐齒輕輕惜草芽魚怯微寒藏暗  
水鷗乘新煖浴晴沙金尊滿引雕欄曲錦纜徐牽畫  
舫斜風景分明纔到取雲山逼向意中遮

送邱曙戒別駕歸里門

紅亭酒罷唱驪歌久聚難分可奈何離色一天南雁  
少秋風滿轡塞霜多投邨夢斷孤燈店問渡心寒濁  
浪河李白言情言不盡儘教蠟炬夜消磨

樸園先生枉駕荒園適予往謁不遇

晨起荆扉帶露開  
松陰滿徑濕生苔  
短筇纔向牙檣  
去高蓋偏尋土室來  
青草停車輝陋巷  
白雲出岫隔  
荒臺  
浣花曾有嚴公到  
只愧當時杜甫才

丁卯感事雜言

劉沁區

字水心  
鹽城人

淮水赴滄溟終古惟一途  
以其皆清流故與黃河殊  
河流靡不濁經過卽澱淤  
南徙勢使然挽回鮮良圖  
禹績永莫復隨時聊補苴  
全河合於淮始自有明初  
兩瀆並朝宗歷年三百餘  
雖苦岸善崩竟無遷徙虞  
因至南清河清濁遂同渠  
滌濁賴有清能將泥沙驅

湯湯執禦之東注挾與俱河性最猛悍從來淮弗如  
清口不豁達洪澤焉能滯周橋翟壩間所向成尾閘  
衝刷力須專可使分洩歟淮弱旁避河河強倒灌湖  
淮潰河亦壅矣怪交相湍水不行地中平陸龍蛇居  
漕堤告決頻斯人抑何辜下河秔稔鄉處處悲淪胥  
僉謀開捍堰沿海居人皆稱范公堤曰捍堰積害謂頓除程功易且  
速河淮于焉疏利弊矢口言條陳何紛拏故道若罔  
聞爲許亦已疎明者審全局闇者見一隅安瀾在上  
流下河患自無乘輅者伊誰曷不勤咨茹

橫塘久開壩曰減洪澤漲懸流遂直下建領高屋上

瀾漫入諸湖漕堤莫能抗暴潰更堪憂減水壩亦創  
從堤視下河其卑又倍丈水若下瞿塘出峽益奔放  
迤東阡陌連厥土非閑曠沃衍宜樹藝積漸起溇浪  
往者苦堤決猶有不決望卽今堤屹如亦復哀淪喪  
滔滔來未絕江河詎可量議使積水消但恐扼其吭  
遂掘范公堤理勢俱無當穿塲渠路陋毋論土高亢  
利導因自然茲已違所嚮歸海有巨派况難容浩蕩  
路捨雲梯關別議開者妄

晚泊射陽

空陂臨積水去此泊應難寺帶荒邨小湖吞落日寬

歸漁炊傍岸旅雁宿依灘何事川途曠篷孤枕未安  
淮陰侯釣臺

避秦密網暫泥蟠豪傑潛身一釣竿志豈在魚無遠  
畧謀將逐鹿且旁觀報人德恕俱能厚震主功名未  
易安悵望王孫空佇立萋萋臺草晚風寒

秋日登郡城西樓

危旌獵獵動斜暉城上風高木葉飛薄暮帆檣西望  
密深秋駝馬北來肥登樓似昔懷難遣泛宅於今願  
尙違數載決河勞築塞寒流又浸故園扉

淮上秋思

射陂東去湖波濶高望誰云可當歸沙塞新鴻秋歷  
歷烟汀遠樹晚微微風殘客最先聞笛月閨人應早  
授衣還憶西谿重九近蟹螯初壯鰕魚肥

謁宋丞相陸公祠

事已難爲始用公二王推戴幾人同南遷宮府波濤  
上北望山河涕淚中猶藉運籌延國步頻煩進講啟  
宸衷兩年特紀祥興朔正統相承自建隆

海上樓船四絕援肯修降表出厓門捐軀豈惜孤臣  
殉屈膝惟憂少主存勢迫驅孥先就義時平義士特  
酌恩登科不愧同文謝宋有三仁一榜掄

公與疊山  
俱登文信

國榜

過淮陰市

莫云袴下辱無因，佩劍應生惡少真。  
若使往來携釣具，誰將勇怯問漁人。

過招隱亭

邱象隨字季

太息五遊去

五遊山人郭次甫

風流事事殘，一林秋雨細半

壁。夕陽寒烽燧，留筇杖烟波倚石欄。  
淒涼詞賦客，未

許弔劉安

王元美作記歲久失傳憑弔者多援淮南故事

尋趙康州祠墓遺址不得

嶺上烽烟海上雲

祥興改元

先生大節最前聞，郊野遺近

迷秋草城市縱橫黯夕曛祇在當時旋有廟

史謂虞賊去州

人卽立廟祀公

何緣故土漸無墳

考有明郡志已不知墓所

谷陵任改高

深盡長使康州把屬君

### 望陸丞相祠

翠華又擁大洋中獨恨昏天起颶風幸海朝廷原不辱  
飛龍歷數竟無終徒將心力過張許却使功勛讓  
鄧馮遙望寒潮打祠屋猶依蜃市認行宮

### 過新城東平侯舊府

帥府高懸督府旗依稀鎖鑰似當時懸雲畫閣眠蒐  
犬接市陰槐叫野鴟清角行吟人跡斷哀笳徹夜鬼



燐吹穿城力引長淮入只與浮舟下海涯

漂母祠

推食何如進食心只知厚待是淮陰可憐百戰河山  
報不抵區區幾餅金

釣臺懷古

張鴻烈

字毅文

吁嗟乎王孫已矣臺烏乎存大河洋洋流千古英雄  
割據終黃土真王假王竟如何志士功成心獨苦喑  
啞聲來赤帝馳有客垂綸若未知入關徒取丞相籍  
壇無大將胡能爲是時韓侯仗劍出手挈山河歸漢  
室齊楚頻封安足酌感恩却在登壇日惜哉功高不

避身後車之繫隨飛塵景陽碧血爲幽草榮幸無如  
屠狗人吁嗟漂母何賢雉何刻侯也純忠難再得英  
雄得失亦何常封茅食土空紛張侯惟志存萬戶邑  
遂使青燐委路傍有人彈劍淮陰市年來磨滅懷中  
字邨醪麥飯弔秋原昔日荒臺何處是荒臺日暮起  
悲風烏盡弓藏千古同惟我子房自超絕避穀遠尋  
黃石公

劉伶臺懷古

劉伶臺下水冷冷劉伶臺上草青青長鯨吸破中山  
餓天上幾年無酒星左手荷鍾右携杓醉來隨意眠

林壑生逢麴蘖不肯醒兵厨良醜還堪索千餘年後  
有荒臺朱簷碧瓦都塵埃形骸土木瞻遺範晉代衣  
冠安在哉我今策馬携尊臺畔來呼君起飲三百杯

兒背畫馬

傷宋末遺逸  
龔翠岩也

汴宮瀕後臨安喧匹馬不敢窺中原龔生晚出事已  
去麻衣草屨歸邱樊家無壁凭無几縱筆淋漓畫奇  
鬼九原岳韓呼不起按兒背畫良馬誰騎追戰沙漠  
野龔生非徒畫馬者張萬歲王毛仲真馬蕃息連錢  
動生也頑民作畫師霧鬣風鬃寓哀慟

狀元兵

季沈祭  
酒寃也

倭躡華夏古所無震蕩陵寢趨中都祭酒思報國思  
殊盡散家財招卒徒紅旗閃閃卷甲趨大磯島寇淮  
海隅楚州太守氣豪粗守城亦挽兩石弧才不相下  
懇切膚釋倭不攻攻文儒同輩騰謗流天衢曾參殺  
人寧非誣坐令淹禁縲綹拘爲倭報讐何其愚功存  
桑梓名難汙險狠堪恨林與胡同鄉給事中胡應嘉  
搆陷祭酒知府范楨  
持其獄御史林潤劾  
之被逮瘦死獄中

萬柳池放舟

白雲丹籠渺難求水殿蒼涼此故邱烟鳥自從漁浦  
去夕陽偏照畫船遊一聲暝磬催新月兩岸蘋風送

早秋寂寞碑陰苔蘚綠側身懷古欲登樓

桃源道中

風急津亭唱鷓鴣更從荒邑問征途雞栖破屋牛羊  
少草没平沙儘餉無書鷄千帆爭入貢金堤百道尙

徵夫鄭圖豈悉南中苦屈指殊思雨露蘇

時方行  
賑濟

初秋雜感

六首之一

金人望

字道騷  
安東人

瘠北京何劇淮南業久蕪伶俜憐弱女早晚仗諸姑  
湖茨堪充飯池魚亦望租茆良連報決海邑實堪虞

茆良防黃險工  
隸安東縣

恭頌

聖駕南巡閱河布德詩

吳

晟

字西李

聖主帡幪薄海通民依舊自厯深宮特傳東狩三齊去正  
應時巡二月中 丹詔初頒花欲放牙檣將發凍全  
融河渠已奏平成績善後親勞度土功

晴波如綺漾河津遲日風花水驛春柳眼待舒青乍  
染梅心競吐綠剛勻江淮引領雲霓切齊魯沾恩雨  
露均總自

聖皇勤布德謳吟處處太平人

川瀆懷柔水不波昔年規度幾臨河須知蟻穴隄防  
固都是

驚輿柳沐過高下錯田成貢賦桑麻沃野載謳歌被恩豈  
獨淮揚境大地春陽盡太和

供億森嚴戒驛驩煌煌

天語念民勞畫船輕過花盈岸錦纜徐牽水一篙就日人  
家皆挾纈荷及軍士盡投醪仰知織悉關

宸慮時邁從前感未遭

閏三月再過湖心寺

劉

愈

字文叔

晴沙圍古寺落照在平田耆宿歸何處烟波憶往年  
重尋花雨境兩度暮春天風月閑如此誰能學坐禪

讀書準提菴

東風習習透窓紗  
徙倚危欄四望賒  
暫過故園翻類  
客久居僧舍却如家  
疎籬鳥下花枝動  
古渡人稀竹  
徑斜莫道春光無  
與共常將詩思問  
梅花

憶家園桃花

種得桃園千樹花  
花開兩度未還家  
于今正值春光  
好紅煖溪橋酒旆斜

碩項湖

張爲法

安東人

湖名石濩在漣東  
萬頃蒼茫一望空  
賈客往來青草  
外漁歌遠近夕陽中  
他年坐艇看魚躍  
今日乘牛問  
路通自是河臣經理到  
垂垂兩岸柳搖風



南莊

李孫偉

字遠令

櫓聲迢迢漸相催  
柳岸蒲灣幾溯洄  
水澗稻田驕雁  
鷺邨深蓬徑長莓苔  
寒蔬入饌山家味  
新柘成陰野  
父栽安得優游籬  
側臥菊英滿地此徘徊

北歸望湖心寺

邱履泰

隔岸湖心寺烟雲分外幽  
叢林寒鵲噪荒刹老僧留  
海內誰知已天涯盡客愁  
歸車將脫輟縱目水悠悠

板閘道中望靜度菴

邱履亨

靜度菴前楊柳多長條  
凋落竟如何寒風烈烈迴空  
谷野草荒荒映大河  
跋涉山川緣底事驅馳車馬向

誰過而今莫抱長沙恨欲傍禪關老薜蘿

寄懷張大雲子

黃之翰

字大宗

雲物江潭勝無端賦卜居時時懷采葛日日待烹魚  
一水秋鴻斷千山客夢虛故人應我念風雨罷攤書

丙寅夏五 名集瀛臺宜詢河議恭紀

嵇亮

字南軒  
安東人

香飄太乙藕花紅 名向瀛臺御苑東 玉語重宣

沉白馬金錢不惜莫哀鴻黃河久著安瀾績紫海行

看砥柱功

帝德如天民愠解康衢歌舞逐薰風

賦得月映清淮流

吳

愈

字亦韓

桐柏何竦峙淮流發其巔浩浩千里外不與濁爲緣  
迢夜生明月映之更淪漣水月成一體波流光與遷  
問有何所著言無何所捐有無雙遣外叅此水月禪  
寄語學道人此理非言詮

龔聖予畫唐馬圖

畫馬高士不可呼當時破屋叢菰蘆胸有天閑三萬  
匹神駿磊落無人識有時索酒甕生塵兒背作几墨  
光騰絕筆大叫風稜起換得壚邊春酒美把酒高歌  
歌不已縞素之色黯欲無矯矯不與凡馬徒我披此

卷燒酒畢高士在焉呼之出

王貞女幼字文學石子暉吉未嫁而守節撫伯  
子爲嗣教之有成其歿也鄉人義之迎神於貞  
女祠與咎蔣兩賢並祀焉

感嘆娟娟月應增淮水清共牢恩未接比玉性能貞  
劍挂耐心許戈揮返日傾閨中五色石親見補天成

耐開復申

劉永禎

字紫函

惟我不如意許君相對吟君今越千里好夢何由尋  
紅藥翻階色碧梧留院陰欣傳看小鳳來集玉山岑

將就中  
書之試

西莊

劉永祺

字頌  
眉

西莊竟夜雨戶外卽維舟綠野平翻浪黃雲盡覆流  
農歸迷故徑漁去沒中洲何日疏溝洫年年樂有秋

雪中渡河

吳寧謐

字靜  
公

三月渡河河水平六月渡河水泊城北風今夜永片  
大船小畏水不敢過打水開渡船來中流索錢聲喧  
雁雪不住日將暮解囊添錢求速渡

過板廠西街訪萬年少隰西草堂故址

野水殘雲外沙門慧壽居此間留別業歲晚伴樵漁  
地僻經過少年深巷陌虛夕陽空徙倚誰爲一廻車

張太史毅文招集依綠園觀荷

楊斐棗

字洪益

芳滌擬君子相憐共舉杯  
豔珠桃李質香迥鷺鷥來  
勝會三秋好新詩五色裁  
自慚蒲柳質蕭瑟欲生哀

登鉢池山景會寺

陸志寬

城北紅樓望裏開  
蔦蘿松柏似天台  
胡僧講法留方丈  
仙客燒丹剩藥臺  
白鳥啣魚荒岸過  
清童携酒遠邨來  
遊人絡繹心無事  
誰念關西戰馬摧

題漂母祠

許志進

字念中

王孫豈餓死一飯意何如  
古屋依飛鳥清淮徒怒魚

能先蕭相識如授圯橋書此際渾難忘

去聲

君恩報豈

疎

安東渡河

隄勢壓危城河流撼地聲扁舟吾利涉四月水猶平  
爲整他年事其魚萬古情柳津沙岸外薪土漫縱橫

廟灣道上

孤城臨海岸天水遠依微潮蹴河流轉風平估舶飛  
魚鹽歸小市花柳簇長圍咫尺蓬萊淺沙田薺麥肥

鮑烈女墓在郡南門外近齋令君

名恕

表而祠之

一坏馬鬣路人知黃土埋香姓氏垂猛火不傷真玉

性雙鶯常宿古松枝  
綸絲舊表烏頭闕  
碑板誰工幼婦詞  
多謝令君風勸意  
百年遺跡在新祠

程退翁爲圃東臯種牡丹芍藥數百畦  
花時如列錦繡  
值茲首夏牡丹盛開  
翁已謝世逾年矣  
嗣君御李上舍送花賦答

名園特爲牡丹開  
每到花時共舉杯  
今日種花人不見  
一天風雨送花來

重見花開又此年  
病餘辜負賞花天  
劉伶臺畔尋春路  
說着花翁一愴然

獨對妖韶泣露枝  
此辜還賦賞花詩  
願君封植同嘉



樹歲歲分將八九枝

王喬丹竈

潘有邑

鼎湖初去說騎龍雞犬淮南羨八公  
猴嶺仙遊王子晉丹成留得地爐紅

漕憲董公修復山陽縣學舊制紀之以詩

邱聞衣

字汝

山陽今學宮歷年三百二

創於明洪武三年

厥基聚五星先

正詳所記

形家稱學基裕合五星聚講

督府居其中司署並縣治

左曰清源廟右崇先師祭龍來凸五泡蔚然結紫翠

督府卽總漕公署司署舊衙築撫司久廢在督府左前縣治在督府右前清源廟卽二郎廟在督府左縣

學在督府右櫺星門外櫺宏整極壯麗門內東西垣仡仡

對相峙振衣暨省牲

櫺星門內西南隅省牲堂三間廟內左右振衣廳各二間規

模嚴且閎若夫殿廡間朔望有司至存誠崇禮齋師

儒勤學誨寰宇盡若斯吾邑寧獨異如何辛丑春朱

櫺忽焉毀移屏逼櫺星陰障如雲翳又如鼻塞物呼

吸弗通氣細民更無知遺穢偏此際見之欲裂背言

之堪隕涕試問毀奚爲往來便六轡三十餘年來侮

慢等兒戲櫺星至戟門恨復填胸胃人吏接茅茨雞

狗雜堦砌振衣暨省牲學役互典質時一遇昏喪過

殿鮮迴避旁徑窄難容戟門安所閉無禮大不敬習

焉率如醉明末到而今公私俱速戾庠門舊在酉明

堂水凡四市河與漕渠西湖與淮泗西北納辛峯

城西

北文通塔創者具精義後人不深考往往擅改置舊置學門西向

合水法也最吉成化丙午改南向志未載見鄉賢金

公銑聚奎亭碑碑存明倫堂後復西向志亦未載嘉

靖二十二年改南向二十六年復西向萬歷元年增

高西向學門爲九級後又改南向志亦未載崇禎癸

未八月復西向本朝康熙乙丑忽移西門於戊地

數年更不吉辛未董公捐俸大修縣學聖廟諸生

議復西門詳公蒙允壬申冬邑侯鄭號舍四十九遷

公捐俸倡修十月二十二日西門復延屬市僧炊烟出兩齋穿戶壞塗墜週日兩先生何儲

兩學

師 稍稍葺廢墜啟閉慎戟門學役粗知畏乙丑徐

中丞改柵如衆議有力者沮之人耳忽爲厲何幸逢

我公庠門復故地公曰門復矣舊制復猶未朱榭暨  
樹垣重修遵古志振衣暨省牲門外看深窻兩齋丹  
雘新諸生業此肄塞徑屏居人程工罔惜費書坊責  
當衢勒詩建隆碣音器吁嗟六十年今日安師位公心  
無所邀 聖心若云慰烏臺推獨坐思自

宸衷賜

壬申十二月公內擢

公去我心悲士民失所庇千年淮水清

俎豆永勿替茲舉匝一月小子喜不寐朴拙愧無文  
聊以紀盛事

康熙三十八年歲次乙卯

皇上南巡視河二月既望

駕幸淮安府城道經山陽縣儒學櫺星門

聖躬拱立逮過乃坐仰見尊 師貴道至意山陽縣儒學

廩膳生員

小臣

邱聞衣恭紀十韻

聲教重光遠梯航拱極同

九重巡楚甸萬物覩

皇躬采藻流芳滿園橋聽講通虎賁趨

宿衛

龍袞式賢宮論鼓珍周石歌臺陋漢風過叅天地化治定

古今功三策周河道雙流注海東望雲澤蚤沛

臨城得雨

看日杏增紅俎豆千秋重詩書萬世隆孔僖稱聖德

先後契

宸衷

城隅觀荷晚泛郭家池

楊開沅

字用九

午夢餘殘照扁舟問水亭  
苔衣輕送綠荷蓋遠扶青  
坐久生香細行來晚吹停  
留連情未已歸棹亂疎星

韓侯釣臺

王孫夔伏迹偏奇遠托碯溪  
世未知吞餌三齊無尺  
土垂綸兩漢莫鴻基高原鳥  
盡功難賞長樂鐘鳴恨  
已遲劉項山河誰復是荒臺  
猶自峙淮涯

三月三日集萬柳池

張

增

字合江

淮安府志

卷之三十一

藝文

臺

古人重上巳祓禊臨流水本以除不祥非作遊觀美  
渺渺春女心奕奕冶容子采蘭兼贈勺風流不知悔  
何如會蘭亭此事亦已矣城南萬柳池風日佳無比  
少長忽咸集散步林泉裏聚飲水之涯開襟情何已  
月淡復燒燈光輝徹花底有興一舒眉人生行樂耳

七夕曲江樓

張

坊

字源

密柳叢篁擁一樓碧溪新漲入初秋爭言問渡當茲  
夕誰復浮槎續舊遊雲隱長河看漠漠月來高閣故  
悠悠賦慙庾謝空憑眺乞巧無心祝女牛

元宵集天祐堂觀燈懷家大人京邸

積雪纔消啟夕筵，輕寒簾外遠浮烟。  
春來明月三分夜，人醉銀花萬樹天。  
眼底琴樽仍舊物，燈前簫鼓又今年。  
長安極北遙相憶，朝罷裁詩興渺然。

漂母祠

周雲書

字籍侯

轅釜不幸遇邱嫂，蓐食又有亭長妻。  
簞豆自是尋常事，俗態往往呈鬚眉。  
况乃婦人何足技，益見漂母胸懷奇。  
諸母皆漂身，寂寂一母飯信名。  
巍巍千秋廟貌，幾修傍四方。  
行客來瞻依窮途，屢下志士淚。  
高義猶感愚氓啼盤餐，置壁事已古。  
貰酒折券同堪咨，母也又勝王與武。  
豈因見怪捐金貲，嗟乎英傑軼軻人，不



淮步月記 卷之三十一  
識轍釜蓐食將安歸

淮陰侯釣臺

留得空臺震古今天生偉器豈湮沉分蛇逐鹿垂綸  
眼背水囊沙擊餌心他日重瞳曩百戰當年一飯勝  
千金不因奮跡風雲會入市寧辭跨下侵

讀唐韋應物寄淮上茶母三詩滿城憐傲吏終  
日賦新詩請報淮陰客春帆浪作期又登樓詩  
茲樓日登眺流歲暗蹉跎坐厭淮陰守秋山紅  
樹多則知茶母潛蓋嘗爲楚州刺史也讀李嘉  
祐送皇甫冉往安宜詩江皋盡日惟烟水君向

白田何日歸結云若問行人與征戰使君雙淚  
定沾衣則知皇甫茂政蓋嘗爲寶應縣令也皆  
郡邑志所未收賦此以章之  
閻詠字復申  
太守風流令亦仙想于大歷後先年秋山紅樹江烟  
水寂寂曾無一字傳

草堂

徐

賦

字古田

草堂依舊築巖阿怪石嶙峋跡未磨白過池塘山欲  
雨青垂庭院壁生蘿笙歌選技頻年少詩卷郵題近  
日多時有鄰翁來共語西窓剪燭醉顏酡

謁丞相陸公祠

顏

敏

鹽城人

康熙庚子歲

敏

承乏海陽恭謁朱丞相陸公祠堂

獲晤丞相十七世孫明經文璉新安廣文文振携  
宗族諸生等溯自丞相至今十七世本支相傳派  
衍蕃盛咸聚族於此奉祀祠墓其籍鹽城者皆丞  
相胞兄諱清夫字君明潮州管勾之後裔及宗人  
也東南海澨天各一方人代變遷始通鄉信爰賦  
長句志感

五千里外仰靈光四百餘年信渺茫身殉龍潛天墜  
水齋安甕屈客拋鄉封潮墓自丁樞院蹈海書傳鄧  
侍郎丞相雲孫風格在嗟憑梓里話滄桑

過雁堂寺

張蘭私

字虞書  
安東人

佛火耿微焰紅牆繡古苔聽經閑鳥集窺戶野雲來

金城晚照

當年返照照繁華金碧爭輝絢彩霞今日斜陽仍似  
舊冷烟衰草滿平沙

能仁寶塔

張鴻儒

字幼思  
安東人

古塔巍峩峙海陬深藏舍利寶千秋試登絕頂憑高  
望一線黃河傍寺流

朱仙墓

雷神  
殿後

陳名世

字希  
孟

古寺城圍側沙明駐客舟斷碑埋茂草孤塚枕清流

風定松濤靜雲歸夜月幽不須耽勝地戍鼓起層樓

萬柳池小集

撒文勳

字堯菴

雲水清環處飛觴引興長柳塘鶯語碎花陌燕泥香  
地擬鞦韆川勝人同曼倩狂醉來歸路寂明月照滄浪

賦得春水滿四澤

倪典學

字次

春入陽初上陂塘望不窮催花連夜雨解凍及時風  
漠漠孤邨外鱗鱗夕照中鷗羣舍南北魚戲沼西東  
隄柳連根綠溪桃倒影紅山莊紆徑入花嶼小橋通  
苔叟依蘭槳雲輕送箬篷短蒲滋近岸芳草界長空  
河灌將無異仙源渺不同暄和看穀雨播種便田功

秋杪歸里訪陳廣文晚芸看菊

劉信嘉 字子衆

對花猶覺酒腸寬  
勝友良辰笑語歡  
唇齒尙存需白  
墮頭顱如許合黃冠  
高情澹泊成秋實  
晚節蕭疎耐  
歲寒屈指素心能有幾  
興來秉燭夜深看

乙卯冬程君亦僧邀集娛軒未赴次邇求韻

老懶城闌出未能  
覺來高臥遜高僧  
已聞白足堂堂  
去安得生公細細承  
水閣留賓多舊雨  
南鄰荒圃怯  
春冰追歡猶記繁華事  
星燦珠聯闔寶燈

宿周家橋有懷

吳泓 字德源  
清河人

雪封前度徑茅店便爲家窓引湖光碧門隨風力斜  
脫衫圍緼火煮酒拭霜花忽憶栖遲客經年久種瓜  
庚戌大水免賦  
盧景掄

蜀賦前代有

聖主獨全除不惜金錢匿惟憂葑屋虛鞭笞應暫歇膏血  
得留餘下里惟相慶攢眉是吏胥

東莊觀荷

戴

晟

字晦夫

負郭溝塍曲圓荷間稻畦近風翻白紵映日舞清溪  
側想香秔熟欣看碧葉齊晚涼高興發屬和有新題

七夕後集蕪湖草堂

一輪猶未滿四鄉已清光碧葉明如鏡紅花暗有香  
微風來几席片刻異炎涼知己悅情話深深月轉廊

齋中卽事

王

城

字雉百

香裊爐烟暗透簾烏皮靜拭整牙籤奇文自覺傾心  
賞險韻何妨信手拈窗外竹枝喧敗葉堦前鳥語沸  
晴簷年光細數今非昨老去方驚歲月淹

過桃源謁朱龍岡先生墓

吳

泰

字方岳

軍聲破膽敵人寒百戰猶傳整鐵冠故國銅駝埋枳  
棘荒邱素馬奠椒蘭落花慘淡春無色啼鳥悲鳴舌  
未乾再拜駟車三嘆息得公幾董事何難



放生池泛舟贈東明上人

方池帶郭碧迢迢，小艇衝波信櫓搖。  
近水樓臺香旆，靄遠風鐘磬韻飄。  
飄山僧苦行真能定，隣舍分餐不待招。  
莽爾元言如惠遠，杖藜肯過虎溪橋。

泛月放生池

邱如升

字養正

同人聯袂木蘭舟，野寺鐘聲古渡頭。  
幾點漁燈雲外出，只疑神女弄珠遊。

春郊烟雨

萬綠重重隱郡城，滿溪春水拍堤平。  
楊花落盡萍初合，一路鶯聲帶雨聲。

補安化縣奇珠岩弟都中郎報家大人淮上

邱

綸

字洪岩

天涯同爾念高堂早把音書達故鄉銅印漫將治小  
邑板輿可得到南方臨門山水春偏好供饌魚蔬趁  
最長只是夢魂無定所淮南薊北兩茫茫

節孝先生祠

邱

翹

字通求

安定探道源秉鐸繼先哲先生出其門踐履務芳潔  
一語警頭容四體凜玷闕治心及養氣正直義招揭  
經濟指掌中邱園閉門闢詭慕泉石幽而今尙高節  
高堂有老親就養心怡悅朝夕將無違寧以人事輕

浩然自此伸吾道無磨涅

簷前松幹直日暮慈烏叫丰楸儼未透思敬當入廟

盛德韻尤長薄俗今之孝此責誰任之子心竊驚悼

賢令志維風

徐公近齋

修整飭堂奧月旦率鄉人奔走薦

清酬遺言端禮編累牘率道要講明非口說循守在  
惟肖誰非至性人  
黽勉從吾好

秋日同人過湖心寺

久憶湖心寺招尋到渡頭霜濃秋水落邨遠曙烟收  
渺渺長淮岸飄飄一葉舟已無塵世意雲樹不勝幽

送劉水心先生歸鹽城

歸路河水阻淹留漫隔年歲除鄉夢裏春到客杯前  
水暖雲光合山昏雨氣連一帆留不得佇立意茫然

題漂母祠

楚漢烟銷世幾新荒祠猶寄古淮濱寒雲野水三間  
屋白髮青裘一代人竿首饑烏啼落日階隅斷石臥  
荒榛一言直下英雄淚千古人思薦渚蘋

題宴花樓次皇甫茂政趙承祐韻

淮干南向古城樓暇日支筇到上頭東望潮濤應近  
海西看蕭葦不勝秋蒼茫遠帶孤邨影凋敝誰寬

聖主憂不敢臨風發長嘯恐驚人謂我何求

太守行春列畫船名賢招集此開筵千行柳色涵新  
雨一片湖光接遠天鴻爪盡消沙漱上漁歌還起戍  
樓邊風流勝會誰當繼空自憑欄憶古年

九日過紫霄菴感賦

郡郭東偏舊土岡登臨還復坐僧房寒深北地鴻紛  
至歲晚西風菊未黃老輩從遊追昔夢舊題塵壑遍  
修廊今朝趁喜風光好幾捻吟髭慢舉觴

鉢池山

蕭天選

字贊皇

曉巖鍊斷楚山平仙子乘雲上玉京  
縱嶺不歸人去杳月明何處聽吹笙

東莊夏日

戴

暉

字剛士

邨戶無人至時開  
篋內書飯炊登隴  
麥羹斫落潮魚  
鄰紡聞風外農耘  
督雨餘夜來仍犬  
吠歎後少寧居

東莊晚晴閑步

雨歇斷虹明斜陽  
放晚晴未辭芒屨  
濕稍覺葛衣輕  
溝水競長往田蛙  
底不平已忘歸路  
遠樹杪月痕生

依綠園

秋水浮亭榭凭欄  
面綠漪露荷猶剩  
葉風柳不多枝  
徑仄依廊曲岑孤  
躡磴危望中饒埜  
趣蘆荻隱茅茨

雍正三年仲春

上躬耕藉田禮成恭紀

嘉會堂課

王

燦

字射九

帝藉開千畝三推在仲春青旂瞻淑氣玉輅動清塵耒耜躬耕夙畚鍤播種新和風從角律靈雨應元辰典禮明禋重恩波勞酒頻艱難惟稼穡粒又配生民

黃淮並急三城索土堵門有感

萬里源長流萬派一方獨滙此狂瀾濁黃清泗蛟龍怒盪地兼天星斗寒不惜斗金排黑浪却教三戶借泥丸芻蕘縱有綢繆計無子空秤巧婦難時河工缺料

春陰雜感

八首之三

楊開泰

字彙征

廻思丙子夏築壩遏淮黃官道埋秋水人家哭夕陽

龍蛇蟠老樹雞犬剩高岡循吏沿門索填闡土一囊

前題

高堰尋常決隄防那得支溜天當此日由地是何時  
鶉結中洲聚鳩形遠市移監門曾繪否仰竚

九重知

帝念淮民切變輿入楚城正逢春雨漲不獨夜濤驚決壩

昭神武疏河戴 聖明感恩諸父老翻覺淚頻傾

萬柳池

游

煜

字且復

炎歊避地應無計選勝遙期萬柳池廿畝澄瀾清鑑  
髮四圍蒼翠綠侵眉披風蟬噪喧仍靜聽雨漁歌合



復離日暮放船空際望水光樹色景中迷

淮陰侯故城

許其恕

字忠行

我儀淮陰侯因訪淮陰市淮陰舊築城乃在清淮汜  
帝能將將國士死從此孤城沒蒿蕪漢家宮闕四百  
年銅駝一臥荒烟裏廢壘巖巖安足論仰天握手問  
青史我來何處弔漁竿長恐淚溢臺前水

劉伶臺懷古

晉魏方忿爭中原日塗炭名賢甘隱跡鎩羽悲中散  
養生適得死沉醉不知亂偉哉劉伯倫兀然釋憂患  
雷霆不足驚羈縲何能絆韜精託晦冥高風留傲岸

此地景芳躅築臺臨河畔黃河辭故道滄桑幾更換  
山林互明滅瓦礫滋散漫風流未泯沒千載增浩嘆  
珠湖泛月

程嗣立

字風衣  
安東人

酒罷捲疎簾春庭月將曉樹搖波影留星落蒲根小  
一曲展湖光菱歌望中杳啞啞宿鳥翻何事繁懷抱

前題

岸轉雨洄復草深香馥郁悠然入混茫宛在冰壺沐  
烟景昨來非晴光此時獨同聲發浩歌餘響弄松竹

南灣莊居

墟里暖晴暉連天草色肥隔籬呼酒伴盡日看花飛

溪水喧鶩鴨兒童餉蕨薇漸諳邨裏習一月不長衣

前題

山郭入雲封孤烟細雨重柴門獨漚酒暮色且從容  
疎竹聽棋靜深花勸酒濃家家荷鋤出簑笠事春農

漂母祠

清淮波漾楚西門沙岸迢迢廟貌存市上人皆輕國  
士溪邊母獨飯王孫裙釵未必懸真鑑豪傑從來重  
報恩却怪漢高曾貰酒兩家折券竟無言

誰莊

前日梅花開似雪昨來桃放又成霞一春忙煞看花

眼關內牡丹新迸芽

淮陰侯釣臺

沃樂

字韻音

淮陰城下水瀾瀾國士當年抱釣絲  
寄食已慙亭長婦帶刀還怯市中兒  
鼈歸龍伯登壇見網設漁且躡足危何似富春江上客羊裘不易帝王師

過平河橋

邱起元

字珠巖

一棹四十里萬柳遙邨碧雞犬聲嘈嘈  
居人歡日夕稻香出南畝何如

天子澤我亦農家流二頃謀未獲今且過江去鋤犁暫時

釋

渡河

出門三十里破浪渡黃河氣與波濤壯詩兼雨雪多  
前途逢雁影舊隱愧漁歌聊復乘風去天邊試一過

韓侯釣臺懷古

劉培元字萬資

王孫沉跡方數奇城隅垂釣聊爾爲一朝登壇作大  
將興劉蹙項憑驅馳鼎足三分謝不取羞與絳灌爲  
等夸功名若復保盈泰當同呂望垂磻溪不爾碎  
隨黃石猶令嚴瀨方清規被誣授命在長樂仰天嘆  
息心誰知蒯通就捕爲爭辯當年反狀猶傳疑嗚呼  
臨風弔國士空臺屹立何崔嵬

鉢池山

古云王子潘難可與等期沿涯卽山麓仙風披我衣  
緬惟逸世姿天骨本嶮崎求之服食間毋乃日勞疲  
俯視鉢池下青蓮漾晴漪嵐光烟景豁風雨亦霏微  
還將入城市悵望孤雲馳

詠懷之一

卜築謝塵境山下撫流泉力耕奉甘旨呼兒理芸編  
素心三五人賞析追先賢花開一吟眺清音寄琴絃  
長此足怡悅悠悠忘歲年

將赴 廷試別里門

劉培風

字萬吹

去住渾無計高堂有老親茫茫成底事草草一勞人  
雁度寒山月雲連淮水濱歸家調膳日應復值陽春

枚舉舊里

楊哲夫字存

荒涼文館是耶非漢代才名間世稀芳躅已隨秋草  
沒故居猶見白雲飛何嘗宜室無明主閑置梁園等  
布衣惆悵長堤求往跡深情無限對斜暉

附 淮人書目

枚乘集一卷

枚臯 撰皇太子生賦 又賦百二十篇

陳琳集十卷

趙

三卷 渭南集

張耒 宛邱集七卷

徐積 節孝集二十卷 詩一卷 語錄五

十四條

王資深 撰周書方 言數十卷

王洋 東牟集三十卷

龔開 陸

二公傳 韓 挽陸丞相詩

湯炳龍 北邙集

趙質翁 張頤集

金原

舉雲谷集

卞思義 宜之集

秦約 樵海集

買進 樂道子詩集

李文 易辨疑 記 四書直解

陳擇善 遼隱集

史敏 松泉集

金銑 省菴集 漫叟日錄

高雲 靜齋集 香奩百詠

韋斌 詩文 數卷

潘

亨 永壑 遺藁

張素 榆泉集 史咏物詩 詠

顧達 錦屏山二十咏 眺豐亭記

蔡昂 頤貞堂稿

李元 文會堂稿

潘塤 家藏集 蘇志

楷 記室 淮郡文



吳承恩

射陽集

馮煥

南淮近集

倪澗

雲門錄  
露葵稿

王典

龍淮詩

文集

潘萇

開中草

潘蕃

大夢軒集

潘苞

鹿門稿

楊

伯柯

宗廟考  
東征客問

求野錄

陰平條議

正名錄

左傳摘疑

詩古文集

沈柿

遊蜀紀  
日問吟

入蜀吟

短草  
蚤吟

張侃

鳳原集

劉光世

青藜館集

張世才

儀曹奏疏  
遠心圖集

楊子臣

淮郡兩朝實錄  
脩草四十一卷

堂集

枝平

梁光明

語錄

唐之秀

語錄

馮天祚

齊遊吟

沈文祚

潘靈齋詩稿  
草集唐詩一卷

南遊

潘叔暘

匪莪室詩草

張

泰燭

遠心圖詩集

岳鍾秀

類說一百卷  
白雲樓詩集

沈森

懷咏堂草

張奕頴

霜吟

張致中

符山堂詩  
眉尹文集

潘嗣袞

素慮稿

沃

士彥

二然居士集

石可璽

與新茶坡合刻  
二子詩集

馮一蛟

開園圖十二

書

沃起龍

燕遊草

沃起鳳

禮記滙解四十卷  
史論 杜詩解易

張

養重

古調堂詩集

咸默

舟車詩草

張應錫

六友堂詩集

郭允

觀著

尙論篇剝復否泰  
經世策數十萬言

閻修齡

秋心秋筋冬涉影閣諸集

胡

從中

藉胡堂詩集

王之楨

楚詞集注 史局通論

朱陸異同辨

太極圖論

宋曹

會秋堂文集

劉自竑

尺蠖鳴河朔吟 幹音集

張新標

淮

詩

嵇宗孟

立命堂集

卞爲鯨

長嘯閣集 十一卷

靳應昇

河

集

潘尊貴

腹老詩集

邱象升

南齋詩集

陸求可

寄菴文集

陸騰蛟

石林彙編

卜永昇

滄菴文集

張爲法

五雲阿詩集

徐

越

奏疏 四卷

孫一致

世辨堂集

李時謙

奏疏 一卷

李鎰

恪素堂集

馬駿

聽山堂集

張新棟

頤菴集

閻若璩

尚書古文疏證 四書釋

地 田學紀聞 石華峙 綱目享成 沈漢 聽秋開

注 卷西堂集 灌花老 邱象隨 西軒 杜首昌 杜稿

臥園 劉程 國集 周麟 日省編 徐轉迅 高臥堂

文集 劉漢中 頌酒詩 周麟 日省編 徐轉迅 高臥堂

賁堂 阮晉 自吟亭 王兆熊 級蘭 周鼎元 史論

詩稿 劉沁區 西洛 張鴻烈 奏疏稿 曲江樓集 淮人咏

篇 劉沁區 詩存 張鴻烈 山陽縣志稿 淮人咏

淮 金人望 艾存集 吳晟 清溪 劉愈 百一 劉

詩 謙吉 詠芥 楊才現 皋聲 戴時逸 竹軒 潘夏 漱

集 汪之藻 止止 吳愈 共學啟蒙十二卷 許肇

亭 起 河防賦曝 吳寧謚 鑄錯軒稿 汪灝 是山堂集

秋 許志進 謹齋 阮應商 春秋彙 楊開沅 禹江

集

顏敏

蕉篔詩文集

周雲書

棠村詩集

邱迥

異堂詩集十卷

錄一卷  
筆記二卷

張坊

蕉源詩集

戴晟

寤硯齋集

邱起元

江華詩集

戴璋

怡齋詩集

王燦

問津堂集庚戌集

慎行草

楊開泰

著春帆南村  
草堂諸集

程嗣立

水南詩鈔

劉培元

素園集

淮安府志辯謔敘

昔柳子厚作非國語後世又有作非非國語者陳晦伯作正楊後人又有作正正楊者書傳間是非訛錯信未可以一人一時之見妄生疵議也然讀古人書如冥行者之摘埴東西朔南罔知所向與雖有一知半解而蓄疑就錯不卽辯晰過時輒忘終蹈誤其爲不善讀書等耳郡志闕一方掌故國史之所而時代聽其淆訛建置任其錯亂秩官人物牽引傳會略無條理何以成信史而垂後世淮安舊志創于成化其本不傳增修于正德隆慶體制謹嚴訛錯尚少天啟志遂多紕謬康

熙志因之又加甚焉同一山陽不問其爲兗州爲河內而槩以爲晉義熙中所立之山陽同一淮安不問其爲東平爲泌陽而槩以爲宋寶慶中所改之淮安兗州則南兗北兗之不分楚州則東楚西楚之不別以光武子爲分封于此據酈道元水經注是未嘗讀范史也列曹竟爲忠烈之首據歷代忠義傳是未嘗讀鮑宣傳也梁適知淮陽軍未嘗知淮安軍也張吉 懷安鎮未嘗守淮安鎮也以至因交陵之名遂遷楚元王墓于此因元王王楚遂移申公穆生于此每一開卷耳目瞽亂雖欲不辨勢不能已後之博雅好古者又能辨予之誤而更

訂之亦如非子厚而正晦伯者則尤予之所厚望也志  
辨訛第三十一

淮安府志卷之三十一

辨訛

山陽辯 漢有兩山陽一山陽郡今山東兗州府地景帝中六年分梁孝王子定別爲山陽國武帝建元五年置山陽郡一山陽縣今河南懷慶府地屬河內郡以太行山在其西北得名漢獻帝延康元年曹丕奉帝爲山陽公卽此地俱與今淮安之山陽無涉此地舊爲淮陰射陽二縣地晉安帝義熙中始置山陽郡縣亦同時並立自晉以前此地不稱山陽雖山陽池山陽濱山陽灣之名其來已久而未嘗以名郡縣則



凡封建秩官人物之稱山陽者皆非此地也又通典  
謂吳王濞反山陽王率衆于此拒之因名按漢有兩  
山陽王一元帝之子名康旣與吳楚反時遠不相涉  
一梁孝王之子名定卽前所云景帝中六年始封者  
是也亦後于吳楚反時十年吳楚反乃梁孝王率兵  
捍之孝王在諸子固未嘗王也且吳初起兵於廣陵  
西涉淮並將楚兵破梁於棘壁未聞有人拒之於射  
陽者通典所言年分與地俱不合

淮安辯 舊志載楊士林淮安人隋末朱粲剽掠漢淮  
閒士林起兵攻之旁郡響應粲大敗士林率漢東四

郡降唐高祖以爲顯州道行臺按潘中丞淮郡考云  
淮水東流入海凡經行之地皆曰淮隋以淮蔡等處  
立淮安郡西魏立淮州隋復改爲淮安縣宋以陳州  
立淮寧府而吾郡則爲楚州不謂之淮也然則隋唐  
歷宋史所稱淮人者皆彼中人非吾郡人也唐又有  
泌州淮  
安郡亦  
非此地郡志載士林入人物志江南通志亦載入淮  
安府武功中惟文獻志云士林實桐柏淮安郡人今  
考隋書地理志開皇五年改淮安郡爲顯州士林降  
唐高祖以爲顯州道行臺蓋卽以舊所據之地官之  
其爲桐柏之淮安人無疑此地淮安直至宋理宗時

才置不得與前此淮安相混也

春秋時淮安一府非楚地 桃源縣舊志有卸甲莊在  
縣治東北四十里相傳楚莊王遊幸在此卸甲又有  
細腰宮在治北十五里靈城在治西北十七里相傳  
楚靈王所築章華臺在靈城南二里謬妄特甚案文  
獻通考云楚州春秋時屬吳左傳哀九年吳城邗溝  
通江淮杜註於邗江築城穿溝東北通射陽湖西北  
至末口入淮禹貢雖指云山陽縣北五里之北神堰  
卽古末口也又國語夫差起師北征闕爲深溝於商  
魯之間北屬之沂西屬之濟則自淮河以北如清河

桃源宿遷皆爲吳出兵經由之地楚地安得至此左  
傳楚築州來鍾離巢三城以禦吳州來爲今鳳陽府  
之壽州鍾離爲今鳳陽府之臨淮縣巢爲廬州府之  
巢縣吳楚七十年之戰爭止在今廬鳳二府去此絕  
遠靈王被弑於乾谿亦在今亳州終靈王之世未嘗  
至淮郡一步安得築城并造臺乎其在莊王時又無  
論矣

曹竟非淮安山陽人 天啓志列曹竟爲忠義傳首云  
見歷代忠義傳按漢書鮑宣傳後附載山陽曹竟字  
子期去官不仕於莽莽死漢更始徵竟以爲丞相封

侯竟不受爵會赤眉入長安欲降竟竟手劍格死西  
漢時此地不名山陽竟非兗州山陽郡人卽河內山  
陽縣人耳入之淮郡志書殊失考證

光武子封山陽公非此地 郡城有都土地祠其神封  
山陽公此本不必實有其人俗人讀三國衍義見曹  
丕奉漢獻帝爲山陽公遂視爲此地真實典故不知  
獻帝紀註明言河內山陽何得移指此地舊志亦知  
此說之非乃云漢世祖建武十五年封子荆爲山陽  
公治山陽十七年爲王國山陽公乃世祖之子按此  
說見於酈道元水經注宜爲可據而實非也光武時

此地郡縣並無山陽之號建武十五年封皇子十人如右翊楚東海齊南東平淮陽臨淮左翊琅邪九處孰非郡縣何獨子荆乃封之以非郡非縣之山陽乎非兗州卽河內乃與九皇子爲一例耳道元因明帝本紀永平元年徙山陽王荆爲廣陵王後世之地山陽廣陵接壤遂以建武時之山陽錯認爲義熙後之山陽也

交嶺非楚元王墓 舊志不載楚元王墓入陵墓項內叢說內一條云交嶺楚元王名交其墓在城東北邊河俗稱爲高嶺淮安土音以交爲高也按項羽王楚

其地兼有淮之南北韓信滅楚王爲楚王其地亦同  
及降封淮陰侯後漢分楚地爲二以在淮北者封元  
王交以在淮南者封荆王賈後轉封吳王溲楚封東  
海彭城薛郡三郡三十六縣是時淮陰射陽先屬荆  
後屬吳絕不在楚封境內元王墓豈得至此況後漢  
書郡國志彭城國彭城縣下註云城西二十里有山  
山有楚元王墓又文選有傅季友爲楚元王修墓教  
註云在彭城宋公過見故修之元王墓歷歷可考豈  
得以交之一字遂傳會在此耶淮人又傳楚王墳在  
射陽湖濱諺云射陽九里一千墩不知誰是楚王墳

一地所傳已有異說尚何足信

公路浦非清江浦 舊志公路浦卽淮口清江浦也引  
寰宇記袁術向九江將奔袁譚路出斯浦按水經注  
淮水右岸卽淮陰也城西二里有公路浦昔袁術自  
九江東奔袁譚路出茲浦因以爲名道元所謂淮陰  
卽淮陰故縣今清口甘羅城卽其遺址又城西二里  
乃是公路浦疑卽今清口黃淮交會之地今清江浦  
在淮陰故縣東幾三十里其非城西二里之公路浦  
明矣又伏滔北征記曰廣陵西一里水名公路浦袁  
術自九江東奔袁譚於下邳由此浦渡何以此浦又



在廣陵不知魏晉閒廣陵太守治所實在淮陰伏滔所云廣陵西一里卽道元所云淮陰西二里也術從此向下邳其不東出清江又無疑矣

隋無漣州及金城縣

舊志沿革載安東縣隋爲漣州

及金城縣漣水縣

安東志同

按隋書地理志並無漣州及

金城縣唐書地理志泗州臨淮郡下註云武德四年始以漣水縣置漣州并置金城縣貞觀元年州廢省金城縣以漣水屬泗州總章元年隸楚州咸亨五年復故是隋時初未嘗有此州縣也二志俱誤

申公穆生辨

按楚元王嘗以申公穆生白生爲中大

夫既而穆生去申公白生留是三人同時仕宦於楚者誓志載穆生於秩官載申公於流寓遺白生不載不知何所分別而殊異若此考元王王楚其地未嘗踰淮卽云今淮北三縣當日應屬楚境則三人亦宜同列秩官申公不應獨居流寓明人撰山陽古蹟者並列有穆生遺館一題似以元王禮賢之館真在淮安不知中大夫職居禁近卽有遺館亦當近在國都何至遠在鄰境因此地前後皆名爲楚而不考時代疆域分合之蹟故遞相沿誤如此

淮陰辨 淮陰立縣始自嬴秦見史記淮陰侯傳註魏

晉以後相沿不改惟魏書地理志既有山陽郡治山陽城淮陰郡治懷恩縣矣又有城陽郡幷城郡各領一淮陰縣同時並出重複糾紛使讀者茫無依據細考城陽郡屬豫州幷城郡屬西楚州皆暫時僑置不久卽廢均與此地無涉

楚州辨 秦漢閒以沛國陳州汝南爲西楚以東海吳郡廣陵爲東楚此地雖曾屬楚不專名楚州也隋開皇十二年始廢山陽郡置楚州唐宋因之不改惟北魏時曾置楚州治鍾離城楚州之名已見於此然非淮陰之楚州又置西楚州領幷城等郡亦非此地

有直瀆縣後一條東平郡下領縣二有淮安縣註有  
割直瀆破釜以東淮陰鎮下流雜一百戶置是直瀆  
在宋以前雖屬盱眙自齊以來卽割屬淮安矣此時  
淮安其地甚愜未至如後世之大然已在今郡治之  
內孝子正是淮郡人不得以史稱盱眙遂置不錄也  
王敬則非南沙人 南齊書王敬則傳作晉陵南沙人  
南史敬則傳云臨淮射陽人也僑居晉陵南沙縣齊  
書但據其僑寓之地未嘗詳考本籍舊志不載敬則  
蓋未見南史耳

徐有功非漣水人 正德隆慶二志皆不著何縣人自

天啟志始稱有功爲漣水人按唐書徐有功傳不言何縣人但云國子博士文遠孫也文遠傳亦不言何縣人但云南齊司空孝嗣五世孫齊書徐孝嗣傳東海郟城人自孝嗣至有功歷世久遠而史家但詳世系不著郡縣則自孝嗣以來皆爲郟城人無疑又有功傳後載其五世孫商客新鄭再世因爲新鄭人商遷新鄭史家尚必詳敘使有功遷漣史家必無缺而不書之理且史旣不書作志者又何據書之今考其致誤之由則以舊志徐有功列王義方之後王爲漣水人徐下未註某縣天啟間作志者遂蒙上文而槩

稱之也

吉中孚非鄱陽人 唐史無中孚傳雜見吳通元盧綸  
傳中綸傳稱中孚鄱陽人吳興先賢傳及全唐詩傳  
皆同按盧綸李嘉祐皆有送中孚歸楚州詩李云淮  
上及春歸盧云但說淮南樂又云下淮風自急則中  
孚爲楚州人無疑中孚妻張夫人詩名又著全唐詩  
傳亦稱張爲楚州人卽中孚可知矣

梁適非知淮安軍 宋理宗紹定元年始升楚州山陽  
縣爲淮安軍宋史梁適傳適仕仁宗朝位至宰輔嘗  
知淮陽軍非淮安也淮安置軍在適歿後百餘年矣

地志太宗置淮陽軍於邳州地在淮水之北取水北  
曰陽之義淮安則在淮南故曰淮陰淮陽屬京東東  
路淮安屬淮南東路疆域截然舊志作梁適知淮安  
軍仍明一統志之誤也又舊志名宦傳是梁適秩官  
志作知楚州梁通誤中又誤令人何所考據隆慶志  
兩處皆作適

米芾未嘗知山陽 宋史米芾傳擢禮部員外郎出知  
淮陽軍未嘗知山陽也當芾之時山陽尚爲縣舊志  
云移守山陽何也芾嘗知漣水軍知雍邱縣史皆載  
之豈獨不載知山陽事亦淮陽之訛也

淮安鎮辨 宋史忠義傳張吉慶州卒爲淮安鎮守烽  
西夏寇東谷掠得之脅降不從見殺按宋慶州屬陝  
西路所轄有東谷砦懷安鎮而無淮安鎮西夏入寇  
何得遠至此地吉傳中蓋訛懷爲淮舊志采入淮安  
志忠烈傳蓋瞥見宋史淮安二字不暇細審也

孫魴非淮人 馬令南唐書及十國春秋皆有魴傳皆  
不著何處人但云鄭谷避亂江淮魴從之遊而已全  
唐詩傳以魴爲南昌人舊志稱魴爲淮人不知何據  
文獻志削魴不載蓋以史無明文也魴非淮人而嘗  
從鄭谷遊必往來於江淮閒者移入流寓或不失傳



疑之意耳

趙槩未嘗知漣水軍 舊志載槩人流寓蓋據節孝先生詩序中語以布衣時曾居山陽致仕後復來遊淮欽公名德故引以爲重耳乃秩官名宦中又復列槩以爲治平中曾知漣水軍多善政安東古蹟中有豹隱堂以槩微時授徒漣水及以學士來知漣水軍後人遂以豹隱堂稱之安東志並引石曼卿詩爲證及考宋史槩傳絕不載知漣水軍事槩果曾知漣水節孝先生詩序中何無一字相及况旣爲漣水知軍則當但列秩官名宦不應又列流寓矣一書之中何先

後矛盾如此

周宗非漣水人 舊志稱周宗漣水人乾化中吳以宗  
爲昇州牙吏歷南唐爲鎮南節度使云云按宋史及  
五代史南唐世家皆有周宗名字皆未著何地人陸  
游南唐書稱宗爲廣陵人馬令南唐書稱宗爲秣陵  
人十國春秋與陸同皆無有作漣水者不知舊志何  
據

歐陽澈非鹽城人 宋史稱澈爲撫州崇仁人今所傳  
飄然集亦稱崇仁歐陽澈著舊志稱澈爲鹽城人蓋  
以朱子語錄爲據考語錄實未明言澈爲鹽城人也

朱子云熹族叔祖居高郵時一日使人往鹽城小邨  
買物事乃云彼中三四日大雪叔祖甚怪之時八月  
安得有雪後人自彼中來問之果然乃歐陽死時也  
程國棟鹽城新志云澈傳未載豐城范應鈴爲立祠  
學中范則崇仁學官也其爲崇仁人無可疑者且楚  
州八月大雪史亦無其事布衣與陳太學東枉死臨  
安市非時之雪不降於行在所烏足以示天戒而警  
其君臣哉此語頗爲有識但郡縣志書載之已久鹽  
邑並崇祀鄉賢疑或別有考據姑仍其舊而略爲辨  
之如此

張德興當爲張德興 舊志忠烈傳有張德興考宋史  
瀛國公本紀及元史昂吉兒傳皆作德興三書所載  
事蹟略同當從正史作興爲是又文獻志見元史昂  
吉兒傳刻本誤作昂克兒作舒民張德興以爲與淮郡無與  
故削不載不知宋史瀛國公本紀實稱淮民張德興  
舊志蓋據宋史也

陳瓘當入秩官 舊志陳瓘載在流寓按宋史本傳但  
云移楚未嘗名爲何官移楚之後他徙與否史無明  
文舊志以爲通判楚州遂移家焉未知何據既嘗判  
楚卽當列之秩官不應僅列流寓矣

韓渙非丙辰進士 正德志本載渙爲延祐乙卯進士  
康熙志選舉卷內亦同至仕績傳忽從文獻志改稱  
延祐丙辰進士按元史選舉志延祐二年始廷試進  
士賜張起巖等及第出身有差五年又廷試進士霍  
希賢等五十人延祐元年爲甲寅二年正爲乙卯丙  
辰則爲三年不逢廷試進士之歲不知文獻志何據  
又趙質翁傳云元自延祐甲寅始設科取士亦非常  
作乙卯

陳玘龍非明時人 舊志仕績傳列玘龍於張素顧達  
之後疑爲明成宏間人考鹽城志則元人也緣本傳

未註於何年出仕遂顛倒失次如此

葉贊陳讓非庚辰進士 正德隆慶二志皆稱二人爲

天順甲申進士天啟康熙二志及江南通志忽改稱  
庚辰進士按皇明貢舉考以甲申爲是甲申不逢會  
試之期考明史選舉志天順七年癸未試日場屋火  
改期八月會試明年甲申三月殿試故是科進士不

稱癸未而稱甲申也

隆慶志人物  
亦作庚辰誤

羅銓非宣德閒進士 按太學題名碑錄銓永樂辛丑

進士自隆慶志以下仕績傳並稱銓爲宣德閒進士

考正德志本云宣德中由進士拜監察御史蓋言拜

官之日在宣德中後人誤刪中由二字遂誤

徐聯非淮安衛人 舊志不載徐聯通志淮安府宦績  
傳載聯爲淮安衛人選舉志又稱聯爲鳳陽人考太  
學題名碑錄聯乃長淮衛人長淮衛屬鳳陽選舉志  
不誤以長淮遂誤作淮安耳

黃諫非山陽流寓 舊志流寓載有黃諫按諫傳自官  
翰林及謫判廣州未嘗一日居淮及卒官回籍然後  
以王紘之故得以旅葬山陽未得遽稱此邦流寓也  
諫子琳始家於淮遂占籍焉此可謂之流寓矣而志  
反不載於理皆爲未合今改稱琳名

葉恩非葉淇子 舊志選舉稱恩爲淇子按淇中景泰  
五年進士恩中嘉靖二十九年進士相去已百餘年  
恩豈得爲淇子考葉氏家傳恩蓋淇之姪曾孫也是  
爲近之

王宏卽王洪 舊志忠烈有王宏又有王洪皆安東人  
皆勦白蓮賊被獲爲賊釘於樹間而死考安東志有  
洪無宏明是一人誤分爲二者

名宦鄉賢改祀議 淮安舊領十一州縣凡各屬之名  
宦鄉賢統祀郡庠此舊制也今邳海二屬旣已分割  
境土不相統轄矣諸賢木主理宜移歸本處奉祀今



尚沿舊制俱留置郡庠於理不順俗人慮擅改先賢  
祀典必將得罪鬼神恐降殃禍此殆不然鬼神不享  
非禮之祀既非淮屬而淮人祀之諸公有靈必不受  
饗今但移祀本地亦非擅行黜退何懼之有

淮安府志雜記序

前漢書藝文志易十三家有古雜八十篇詩六家有齊  
雜記十八卷春秋二十三家有公羊雜記八十三篇孝  
經有雜傳四篇五經有雜說十八篇又別載雜家者流  
有推雜書八十七篇雜家言一篇晉書束皙傳所見魏  
襄王家中竹書亦有雜書十九篇古人著書各有篇目  
而遺聞佚事無可主名者則不惜以雜稱之附載于各  
書之後淮安志于一郡典章人物河渠賦役諸大政類  
皆爲表爲志爲紀傳以載其全至于放逸舊聞與叢說  
瑣書入之正編則無可附麗棄而不錄又實足以廣聞

見稱多識參互考訂不無小補淮郡在宋元以前爲戰  
爭重地兵燹所被典籍無存二枚賦百二十餘篇今才  
得二篇淮陰楚州各有圖經今皆失傳則舊事之可紀  
者十不一二其散見正史及各家文集者尚多可采一  
時不暇徧及姑就所知蒼萃成卷事取其信而有徵言  
擇其尤雅者凡牽引傳會與猥鄙不經之談皆所不錄  
或以存信或以傳疑皆足與全書相表裏志雜記第三

淮安府志卷之三十二

雜記

楚漢春秋其書不傳內載項王使武涉說淮陰侯侯曰  
臣故事項王位不過郎中官不過執戟及去項歸漢  
漢王賜臣玉案之食巨闕之劍臣背之內愧於心其  
言與漢書小異並存之

初學記載漢宮有韓信殿信旣被誅何爲用以名殿  
淮陰侯死後不知窀穸何處今山西靈石縣有韓侯嶺  
嶺上有墓墓上有碑康熙庚午王學士頊齡自陝西  
典試回經侯墓下有詩云曾從淮市瞻遺廟又向汾

山拜古坵伏勝不妨容惡少比肩偏是恥樊侯藏弓  
烹狗誠何恨食鄴封留亦已休惟有墓前三尺碣冷  
風淒雨自千秋又淮安崔國屏遊西安聞城東七八  
里有韓侯墓甚大親往拜之歸而告人其言甚詳是  
又一墓也果孰爲侯藏魄之所哉

明萬歷間於甘羅城得古錢二穴以鑄關壯繆像今像  
在高家堰錢猶及見其一長寸餘形如風鐘上有一  
孔下有篆字歷歲既久丹砂翡翠斑剝可觀俗因呼  
爲甘羅錢又郡志載金牛岡亦時出此錢與朱彝尊  
所見甘羅錢又異

淮陰侯有後其說初見於張大齡支離漫語舊志載潘叔明之說詳矣後有大理寺司務錢塘趙時楫言其鄉人吳思穆順治中爲粵西縣令巡行山峽間見少年將軍廟像英風雅槩敬而拜之命工修飾其堂廡卽有土官率宗族百餘人稽首稱謝云廟神卽淮陰侯子因蕭相國托孤於南海尉趙佗佗封之於此子孫繁衍自漢至今奉祀不絕因舉相國與趙佗書及佗所賜勅諭以示吳吳甚以爲異歸而告人其言不妄是說與大齡之言相合邑檢討張鴻烈官京師遇海澄余編修艷雪訪問此事亦云韓侯之後韋土官

在廣西地方與廣東接境益信其說爲有徵然兩廣  
土司韋姓甚衆毛初晴蠻司合志所載在東蘭者有  
韋富撓在桂林古田者有韋銀豹在永寧者有韋狼  
要韋朝義在義寧者有韋總官韋千里在馬平者有  
韋王朋等不知孰爲侯後安得遍歷諸洞一詳訊之  
崔鴻三十國春秋曰劉裕次山陽聞何無忌敗績卷甲  
兼行將濟江而風急衆咸難之裕曰若有天命風當  
自息卽登舟移時風息按今所傳止有崔鴻十六國  
春秋不聞別有三十國春秋僅見此條

太平御覽所引書目有淮陰圖經經籍考有楚州圖經

二卷陳振孫曰教授嘗川吳莘商卿撰太守爲毘陵錢之望大受時淳熙十三年惜二書今皆不可見

文獻通考載淮人所著書目漢則有枚叔集一卷三國則有陳孔璋集十卷唐則有趙渭南詩三卷宋則有張文潛柯山集一百卷徐仲車節孝集二十卷又詩一卷枚叔集今無專本隋志梁時尚存二卷至宋已亡通考所載一卷亦自漢書文選中鈔出者而已孔璋渭南二集世有傳本柯山集今亦罕見但有張文潛集及張右史集二本卷帙互異次序多寡不等不知編輯出何人手也惟節孝集爲近年刊本頗稱精



好至元人王贊善洋之東牟集趙質翁之覆甌集湯炳龍之北村集卞思義之宜之集不知世間尚有其書否自明以來年代漸近人文蔚起如金宗潤史德敏高從龍潘從禮張元卿蔡仲衡潘伯和顧存道楊柏柯吳汝忠王堯載楊子世輩皆有刻集行世今雖間有存者然亦不可多得矣

楊升菴集載劉季裴曰自古守淮莫難於謝元又莫難於楊行密元以八千人當苻堅九十萬之衆清口之役行密以三萬人當朱全忠八州之師而卒以勝者扼淮以拒敵而不延敵以入淮也按謝之守淮在壽

春非此也清口卽今之河口正淮郡之門戶也

歐陽公于役志載景祐三年丙子歲六月丁巳次洪澤  
明日食畢解舟以前晚入沙河乘月夜行向山陽二  
鼓宿闌下黎明至楚州泊舟西倉飲於倉亭出倉北  
門看雨庚申小飲舟中艤舟城西門門閉泛月以歸  
辛酉爽於倉亭壬戌小飲倉北門舟中夜宿倉亭癸  
亥夕坐水次納涼已而大風雨震雹暴至乙丑小飲  
水陸院東亭看雨丙寅飲於西倉丁卯登倉北堰上  
亭納涼已已泛舟北辰宿倉亭辛未夜飲倉亭壬申  
泛舟北辰癸酉小飲倉亭甲戌小飲魏公亭看荷花

晚移舟楚望亭自泊舟西倉及移舟楚望亭凡十有七日當日所謂西倉倉亭堰上亭魏公亭楚望亭者皆不過在郡城內外今遺址俱不可考惟北辰知爲今新城之北辰坊水陸院尚在今北門內城郭不殊風景已異豈必桑田滄海始改舊觀哉

東坡與節孝先生交好志林言徐仲車古之獨行人也於陵仲子不能過然其詩文則怪而放如玉川子此一反也耳曠甚畫地爲字乃始通語終日面壁坐不與人接而四方事無不周知其詳雖新且密無不先知此二反也昔王肅三反而斯人有其二可謂異矣

程德孺不知何許人曾知楚州東坡集有表弟程德孺  
生日詩第五句云嘗活萬人寧望報自注君在楚州  
予在杭州皆遇饑歲活數萬人云云今舊志秩官無  
德孺名而坡詩亦未詳載其事非此句則德孺之名  
湮沒不傳矣德孺名之元見坡詩註

福建志載丁從龍者邵武之泰寧人紹定間率鄉兵擊  
賊有功授忠義郎領兵淮安攻破土城克復其地授  
忠翊郎又金華志載南宋邵困卽淵蘭溪人教授潭

州朱子帥湖南日薦其學行晚年由楚州倅奉祠家  
居著有禮記學庸解等書兩人事功學問必非庸流

舊志皆不之載知前人之湮沒者多矣

柳貫題江磯圖卷後曰此淮陰龔聖予先王所作余初見先生錢唐湖東年已七十餘疎髯秀眉顧身逸氣如古圖畫中仙人劍客時時爲好事者吟詩作書畫韻度冲遠出尋常筆墨町畦之外

趙明誠金石錄有淮安石刻五皆唐人書一娑羅樹記李邕撰并行書一張松質與李邕書一淮陰太守趙悅遺愛碑張楚金撰行書無姓名一題悅碑陰王忻撰一楚州修城記范昭撰鄭萼正書五刻今皆不存娑羅雖有拓本亦重摹失真董文敏謂宋拓亦無全

本今又安得見北海真蹟哉

天順二年大河衛百戶閔恭奏各衛歲運薊州倉糧三十萬石駕船三百五十隻用旗軍六千三百人越大海七千里風濤險惡多被沉溺臣見新挑沽河北望薊州正爲水套沽河相對止四十餘里其間阻隔者十里若挑通饋運則海濤之患可免從之當時百戶中有人如此而廟堂之納言又如此

明實錄載正德五年遣禮科給事中陳鼎往淮安變賣平江伯陳熊產業得銀乙萬四千四百兩有奇還奏加俸一級鼎阿奉劉瑾爲時所鄙八年熊已卒其母

袁氏奏訴乃盡給還瑄之功在漕運數百年率由不改一旦以逆瑾故籍之亦大失議功之典矣或云開通清口濁流內灌淮安運道日高三城皆居金底以此歸罪於瑄非也瑄開清口本但以行糧艘糧艘一過卽行閉閘其令甚嚴官民船隻皆由仁義禮智信五壩入淮原無終歲通行之例行直達法自是後人圖便求不能禁非瑄之所及料也

嘉靖時議郊祀分合朝臣大小皆與焉時大學士張璉翟鑿等主分祭而以成憲及時未可爲言山陽與議者庶子蔡昂郎中盧蕙與尚書方獻夫主合祭而亦

未嘗以古禮爲非當時雖小臣亦不附宰執如此

海州士人李植嘗夢至一水殿中觀宮女戲毬山陽蔡繩爲之傳甚詳有拋毬曲十餘闕其兩闕云侍宴黃昏晚未休玉階夜色月如流朝來自覺承恩醉笑倩傍人認繡毬堪恨隋家幾帝王舞茵蹂盡繡鴛鴦如今重到拋毬處不是金爐舊日香蔡繩李植皆不知何時人所作傳亦不傳可惜也

倪處士啟運山陽舊事載淮之善書者數家正統中任琅以楷書人監仕至福建汀州府同知而其字不傳世宗朝有二吳吳萬山善草書吳厚邱善楷書一日



湖廣黃鶴樓火額盡焚求能書者來聘厚邱舊額離  
樓數里卽朗然可覩厚邱至先書三字懸之遙觀不  
明未慊衆意靜思良久曰得之矣別作三字每點每  
畫遠離數寸絕不黏帶更懸而望之與舊無異今三  
字仍厚邱筆也神宗朝有熊斗陽善書如西門何天  
之衢天妃祠之君子堂新城南門之狀元樓皆莊重  
有丰神其草書尤偏晉人今亦無傳至於縉紳中則  
有胡南津漣張幼白世才皆善書者也諸生中有崔  
麟趾陳心益亦無愧云

唐永泰中李湯任楚州刺史有漁人夜釣於龜山下沒

水見大鍊鎖盤繞山足尋不知極遂來告湯湯命漁人及能水者數十出其鎖力莫能制加以牛五十餘頭鎖乃稍稍就岸時無風雨驚浪翻湧觀者大駭鎖窮見一獸狀如猿白首長鬚雪牙金瓜闖然上岸高五丈許兩目不開兀若昏寐目鼻水流如泉涎沫腥穢人不可近久乃引頸伸欠雙目略開光采如電顧視人衆欲發狂怒觀者奔走獸亦徐徐引鎖曳牛入水去竟不復出湯相顧錯愕不知其由按此卽古岳瀆經所載禹命庚辰鎖淮渦水神無支祈徙於淮陰龜山之足下者是也岳瀆經雖有淮陰二字龜山實

不屬今淮安境內特李湯以楚州刺史挈無支祈出  
水耳

劉遐妻邵氏冀州刺史績之女也驍果有父風遐累官  
徐州刺史假節鎮淮陰卒於官部曲不樂他屬共立  
遐子肇欲爲亂邵止之不從乃密起火燒甲仗都盡  
衆遂已肇得襲爵遐嘗爲石季龍所圍邵將數騎拔  
遐出於萬衆之中其忠勇如此遐鎮淮陰未有政績  
可錄邵氏實大有造於淮者

吉侍郎中孚與盧郎中綸同爲大歷十才子吉曾薦盧  
於朝二人交尤篤盧有同吉中孚夢桃源詩同者和

也唐人詩題多有此語後人不知同字之義疑二人  
同作一夢誤甚檢唐詩可見又中孚止一詩傳世其  
妻張夫人詩載才調集者二首一拜新月一拾得韋  
氏花鈿以詩寄贈文獻志又收得古意柳絮二首較  
侍郎詩存世爲多

綦母潛唐開元十四年進士爲淮陰太守傳記無考惟  
韋應物有寄淮上綦母三詩云滿城憐傲吏終日賦  
新詩其非簿書俗吏可知矣舊志不列於秩官何也  
趙承祐有詠錢塘詩云一千里色中秋月十萬軍聲半  
夜潮惜全首不傳又溫飛卿有和趙嘏題岳寺七言

律詩今承祐集亦不見此原唱其遺逸者多矣又承  
祐行二十二見杜牧之集

許渾詩云韓信廟前楓葉秋淮地初無楓也司空曙送  
吉枝書詩云聽猿看楚岫劉方平淮上秋夜詩云猿  
嘯空山近淮無山林焉得聞猿聲此不過詩人寄興  
之詞當不必徵其典故也然淮地舊無百舌鳥近年  
有之山陽境內無虎康熙庚辰冬清江浦人烟叢集  
處忽來一虎又安知當日不真有楓與猿耶

徐節孝先生行年四十不婚不仕久之鄉人迫令就試  
則以雙輪載母躬自推行葛衫草屨行道之人不能

辨也登治平四年進士第未調官母亡遂不復仕及  
路振通判楚州始爲娶妻子故先生子小名路兒  
未知卽是安道否也

洪澤湖濱舊有洪澤鎮又傳有洪澤村未之見也守汛  
高良澗上者於康熙辛巳年五月二十日未刻見西  
南風驟起甚雨隨之湖波山立入申刻雨霽風止虹  
見於東返照射湖鬚眉畢見有若帆檣數百艘環水  
如城亘十餘里問之上人云此洪澤村也頃歲尚有  
居民五十家以水避去水漫其上者二尺意水落而  
村出耳踰年河防使者張公命汛員刺舟往探還言

東西街道舊有千餘家十五年水漲遂被湮沒今村  
基止沙灘一線高尺餘長七十餘丈濶八九丈不等  
然則昔之所見正此地也

宋元祐間初冬蘇東坡在淮時有漁舟泊於龍興寺東  
橋側更闌夜靜漁人尚未寢聞橋上兩人坐談一日  
爾明日何往一日羅浮去兩日便回回日作一戲法  
與爾看漁人心甚疑之兩日後早起往候時天宇晴  
霽至日午天斗變雷電交作烟霧濃靄晦不見人時  
廟前貿易之人頭髮蓬起或男子髮結婦人髮或老  
人髮結孩稚髮百貨狼藉委地東坡目擊其事因作

十月六日在楚州記所見古詩云風高日暗水雲黃  
淮陰夜發朝山陽山陽曉霧如細雨烟烟初日寒無  
光雲收霧捲已亭午有風北來寒欲僵忽驚飛電穿  
戶牖迅駛不復容遮防市人顛沛百貨亂疾雷一聲  
如頽墻云云舊志有詩而未載及此事康熙中志并  
詩不存聊記於此亦足以廣異聞也

刀劍錄云赤烏元年人於會稽山石匣中得淮陰侯韓  
信劍乃少年時所佩者帝以賜周瑜

韻語陽秋載真君泉在漣水軍軍治中蘇長公會題字  
于石欄上又作長短句所謂倦客塵埃何處洗真君



堂下寒泉水是也漣又有藍家井亦佳絕丹陽葛常  
之常侍其父文康公寓漣水二年以惠山泉比試而  
惠泉反不及每日烹茶更用二水遂棄惠水不用今  
安東城中積水瀰漫二泉已不知所在矣

趙嘏未第時常家浙西號一美姬及計偕入都留姬獨  
處會當中元有鶴林之遊浙帥某聞其美遂奄有之  
明年嘏及第聞姬已他屬因以一絕句貽之曰寂寞  
堂前日又曛陽臺去作不歸雲當時聞說沙陀利今  
日青娥屬使君浙帥不自安遣使歸之嘏方出關赴  
渭南尉相逢于橫水驛見車騎甚盛問何人曰送趙

先輩娘子入都姬舉簾見蝦相持一慟而絕因葬之於橫水之陽

文文山于至元十五年進屯麗江浦入般澳益王昺衛王繼立文山上表自劾有詔獎諭之其略曰方敵愾之正惡鞠旅勤王及皇路之已傾捐軀殉國脫危機於虎口涉遠道於鯨波雖成敗利鈍逆覩之未能而險阻艱難備嘗之已熟如金百鍊而益勁如水萬折而必東相傳此陸丞相君實先生筆也

宋初運道自黃浦至故晉口入射陽湖晉口卽今寶應人所謂山陽溝也自射陽湖西達三脚村入雙溝迤

運而來經郡東門入今新城故河道香橋則爲南閘  
天妃宮則爲北閘二閘險溜異常過閘然後祭神出  
口溯淮以達於汴至宋南渡漕不赴北韓蘄王守淮  
屯兵北神正昔日運道入淮之地及黃河入淮此口  
築塞不行至明初陳平江督漕初改由郡北出故沙  
河以入洪澤及築西湖漕堤又改由郡西一直北上  
開鴨陳口入河前此故道皆廢矣